


श्रीः ।
रसमोदक-हजारा ।
भाषा-काव्यम् ।



जिसको
श्रीमन्महाराजकुमार श्रीमत् कुँवरस्कंद गिरिजीने
नाना प्रकारके छंदोंमें निर्मित किया ।
जिसमें
सुरस नायक नायिका भेद विस्तारपूर्वक वर्णित है ।

वही
पन्ड्या रामनाथजी मु०पन्ना-बुन्देलखण्ड
द्वारा प्राप्तकर,

खेमराज श्रीकृष्णदासने
बंबई

निज “श्रीविष्णुटेश्वर” यन्त्रालयमें
मुद्रितकर प्रसिद्ध किया ।

कार्तिक संवत् १९५७.

श्रीगणेशाय नमः ।

अथ

रसमोदक हजारा.

——
प्रथमोल्लासः १.

दोहा ।

मन भज तनय महेशको, नेक न रहै कलेश ।
ध्यान करे फल होत है, सुख बुद्धिबल वेश ॥१॥
शिवसुत षोडश नामके, बलप्रताप सुखपाइ ।
रसमोदक शुभ ग्रंथको, विरच्यो सरस बनाइ ॥२॥

कवित्त ।

हरन सुदुःखहूके दलन दरिद्रहूके,
करन जु सुखहूके देनहारे ज्ञानके ।
पापनके जेते जे समूह भवसागरके,
तेते सब छूटिजात नेक धरे ध्यानके ॥

(४)

रसमोदक ।

भनत स्कंद ऋद्धि सिद्धि अरु संपदाहूके,
विनश्रम पावही सो कीन्हें गुणगानके ।
शत्रुदल गंजन सु भंजन कलेशहूके,
ऐसे पदपद्म शिव करुणानिधानके ॥ ३ ॥

दोहा ।

हरत दुःख दारिद्रको, तुरत गरीबनिवाज ।
अष्टसिद्धि नवनिद्धिवश, होहिं सकलशुभकाज ४

कवित्त ।

भूषण अनेक साजे सिंहपै सवार राजै,
शोभा यों अनूप छाजै अर्द्धचंद्र भालिका ।
दुष्टमुखभंजनी महेशमनरंजनी है,
श्यामतनुमंजनी सुजनप्रतिपालिका ॥
भनत स्कंद धरै ध्यान सो विशाल काये,
सोहै मुंडमालिका करै सो जमजालिका ।
हरत कलेश सुख भरत हमेश वेश,
करत सुबुद्धि स्वच्छ नित्य प्रतिपालिका ॥ ५ ॥

दोहा ।

जगदंबा अब कृपाकरु, पूत निकंबा जान ।
हे अंबा तेरी शरण, दास आपनो मान ॥ ६ ॥

सोरठा ।

शिवसुत प्रथम गणेश, द्विती शिवाशिव भज चरण ।
तृतीय सुकवि उपदेश, बंदि रचौ यह ग्रंथको ॥ ७ ॥
कृपा शारदा कीन, हिये शारदा अति बढी ।
जिमि जल चाहत मीन, सुमति शारदाको चह्यो ८

दोहा ।

प्रथम कहत शृंगार रस, नव रसमें कविराव ।
होत नायका नायकहि, आलंबन रस भाव ॥ ९ ॥
ताते प्रथमहि नायिका, नायक बहुरि बनाय ।
भाव हाव जे तरुणके, ते पीछे कहगाय ॥ १० ॥
उर उपजत लखि जाहिको, रस शृंगारको भाव ।
ताहीको कहि नायिका, वर्णत जे कविराव ॥ ११ ॥

(६)

रसमोदक ।

नायिकाको उदाहरण-कवित्त ।

कीरति किशोरी छवि वरणी न जात मोपै,
कोटि मेनकाकी गति होत मतवारे हैं ।
अंग अंग शोभितही लोभित निरखि होत,
प्रगट प्रदीप्तमान उपमा न टारे हैं ॥
भनै असकंद रच्यो वदन विरंचि जबै,
आभा जौ न रही तासु करन मँझारे हैं ।
दीन्ह्यो जो निचोय धोय एकठौर चंद्र भयो,
छिरकेते बूँद भये तौन नभतारे हैं ॥ १२ ॥

दोहा ।

भौर मयूर चकोर शुक, करकच आनन बिंब ।
लखि अनंद हिय सरसते, कंज मेघ शशि बिंब १३
तनिभाँति सो वरणिये, प्रथमहि सुकिया नारि ।
परकीया पुनि दूसरी, गणिका तृतीय निहारि १४

सुकियालक्षण-दोहा ।

पूरण पतिकी प्रीति मन, दिन दिन अति सरसाहि ।

लज्जा शील पतिव्रता, सुकिया कहिये ताहि १५॥

यथा-कवित्त ।

कंचन वरण नैन खंजन अधरबिंब,
पंकज कपोल कंठ राजतकपोत है ।
सास दिवरानी औ जिठानी मनमानी वेश,
सुनिमृदुवानी झरै सुमन सुगोत है ॥
भनत स्कंद पिय आनंद अनंद भरी,
सौत सतसंग रंग रंगन उदोत है ।
ऊनीहू न होति होति दूनी द्युति आननकी,
सहज सुभाय बदै जगमग जोत है ॥ १६ ॥

दोहा ।

सास सराहत रीतिकुल, ननंद सराहत चैन ।
पीय सराहत प्रीति मन, सौत सराहत वैन ॥ १७ ॥
तीनभाँति सुकिया कही, सुग्धा मध्या जान ।
पुनि प्रौढ़ा परवीन कहि, सकल केलि सुखदान १८

(८)

रसमोदक ।

मुग्धालक्षण-दोहा ।

जाके तनुमें होत है, यौवन उमँग नवीन ।
ताको मुग्धा कहत हैं, जे कवि रसिक प्रवीन १९

यथा-कवित्त ।

होनलागी वंदन विलोकै द्युति चंद मंद,
मृदु मुसक्यानको कपोलनपै ढार है ।
सुखद सुवैन कोकिलान मान खंडनको,
नैन नये खंजनकी उपमा निसार है ॥
भनत स्कंद कछू अंकुर उरोजनसों,
अंचल उचाइ दिन दिन अनुसारहै ।
देखतही अधिक अनंद नंदनंदनके,
सौतनके शाल बाल अति सुकुमारहै ॥ २० ॥

दोहा ।

वार दियो मन लालने, लखि नवरूप रसाल ।
दिनप्रति दूनी द्युति बढै, सौतिनके हियशाल २१ ॥

पुनः कवित्त ।

सुख सरसातदेखैं कंचन वरणगात,
लाल मन मोहिरही खेलत अलीनमें ।
मृदु मुसक्यानकी कपोलनमें गाड देखि,
मन गड़जात कौन ऐंचत बलीनमें ॥
भनत स्कंद स्वच्छ आनन विमल बाल,
पेखै सम चंद्र प्रभा रहत मलीनमें ।
गोरे गोरे गातन उरोज छवि दूनी बढै,
उपमा न पाई जात कमलकलीनमें ॥ २२ ॥

दोहा ।

ता मुग्धाके कहतहैं, कवि द्वै भेद विचारि ।
प्रथम कही अज्ञात पुनि, ज्ञात यौवनानारि ॥ २३ ॥

अज्ञात लक्षण-दोहा ।

निज तरुणाई को जिहै, आगम जानि न जाइ ।
ताहि कहत अज्ञातहैं, जे सुजान कविराइ ॥ २४ ॥

यथा-कवित्त ।

रहस रच्यो वृंदावन गोपी ग्वाल आये वन,

(१०)

रसमोदक ।

राधिकारमणसह राधिका सुहायेहैं ।
मंज मंज कुंजनमें जाइछिपैं चारों ओर,
देखे जो जहाँई तहाँ कौतुक दिखाये हैं ॥
भनत स्कंद भई तृषावंत प्यारी अति,
नीर तट जाइ दुवे कर पर शाये हैं ॥
अंजलि भरत छोड अंजलि भरत देख,
पीवत न मीन मृग खंजन रमाये हैं ॥ २५ ॥

दोहा ।

रहसकेलि श्रम तृषावर, यमुनातटपै जाइ ।
अंजलि भरिछोडत भरत, पियत न मन अकुलाइ ॥

पुनर्यथा-कवित्त ।

खेलन नवेली संग लाग गई कुंजनमें,
लखिकै नंदलाल ख्याल दीन्ह्योहैं मचाइकै ।
दौरि दुरि हेली सब सघन लतान बीच,
आप चले ढूँढ़नको प्रेम सरसाइकै ॥
भनत स्कंद मिस छुवन सुधाइ गहि,

लेत भरि अंक नेह नूतन लगाइकै ।
रसवश चातुरी न जानै कछु बाल लाल,
अधिक अनंद होत मन सुखपाइकै ॥ २७ ॥

दोहा ।

छुवत छिपावत जोरसों, मोहिं लगावत अंग
ऐसो खेल न खेलिहों, लाल तिहारे संग ॥ २८ ॥

बरवै ।

अब नहिं कुंजन जैहों पियके संग ।
आइ अचानक मोसन मिलवत अंग ॥ २९ ॥

दोहा ।

करिमंजन ठाढ़ी कहै, कालिंदीके तीर ।
मो कटिभार सु आज यह, सह्यो परत नहिं वीर ३०

ज्ञातलक्षण-दोहा ।

चढ़त जासुके तरुणई, जानत जो बरनार ।
ज्ञातयौवना कहतहैं, विमलबुद्धि आगार ॥ ३१ ॥

(१२)

रसमोदक ।

यथा-कवित्त ।

लोचन विमल नवीन दलपंकजसे,
होनलागे सरस रसीले सुखचैनसों ।
गोल गोल गहब गुलाबी हैं कपोलदुवौ,
बोल अति रसकी निसासी लगे देनेसों ॥
भनत अस्कंद जोर यौवन जनायो ताहि,
वरषन लाग्यो अति प्रेमसुधा बैनसों ।
गजगति चलत नवेली निज छाँह देखि,
भेंट होत मनमें अचानकही मैनसों ॥ ३२

दोहा ।

चलत नवेली छाँह लखि, सखियन डीठि बचाइ
मनमतंग जबते कियो, मैन महावत आइ ॥ ३३

पुनःकवित्त ।

रूपगुण सरस नवेली अलवेली सुन,
नेकहुँ न मानै बलि सुवश हुलासमें ।

द्वारपर आवै छिन छिनपै कहाँलौं कहौं,
सीखत न सीख नये गुणन विकाशमें ॥
भनत रुकंद देखि अधिक ठिठाई यह,
मोहिं कहिआई तोहिं लगत निराशमें ॥
दिन दश बीशहीमें छूटि लरिकआई गई,
तिमिर नशात जैसे रविकेप्रकाशमें ॥३४॥

दोहा ।

रहत अकेली सुमनवश, छाँह विलोकत बाल ।
ताछवि देखैं चोपसों, पगे रहत नँदलाल ॥३५॥

पुनः यथा—सवैया ।

नित दूनी बढै द्युति आननकी, औ विचार करै
रतिकी छतियाँ । कछु कामकलानके कौतुकसों,
रसके चसकेकी सुनै बतियाँ ॥ असकंद प्रतीति न
प्रीतमकी, सखियानके संगरहै रतियाँ । कर
कंजसों आरसी लै मिसकै, मन मौजसों बैठिलखै
छतियाँ ॥ ३६ ॥

(१४)

रसमोदक ।

दोहा ।

नवल बाल छवि नवल सुख, नवल काम छविचोप
नवल तरुणई तनु चढ़त, लखत आलसी ओप३

पुनः यथा-सवैया ।

दृग अंजन दै रुचि सों रचि अंग, उमंग मनो
कछू दरशात । सुनै मृदुवैन अलीगणसे, मनस
करमोद किये सकुचात ॥ भनै असकंद उरोज
कंज, कलीसम चारु कहे सुसकात । लिये क
आरसी आनन ओप, शशी दिन रैन विलोक
जात ॥ ३८ ॥

दोहा ।

करि मंजन सौरभ सहित, लहि केसरमुखचंद ।
बैठ आदरस भवन रुचि, तनु द्युति निरखि अनंद ॥

पुनर्यथा-सवैया ।

अंग अंग उदित अनूप अधिकान लागे, पागे

प्रेम वैन सुधा बुंदन झरतहै । उरज उँचाइनपै
चाह चित चौप चारु, कंचुकी कसत हिय शंकहि
करत है ॥ भनत स्कंद रसप्रीतिहि सयान सीख,
प्रगट दुराउ कामरीति न डरतहै।बैठि निज मंदिर
विलोकि मुख कंज दीठि, सखिन बचाइ मन
आनंद भरतहै ॥ ४० ॥

दोहा ।

अंजन दै खंजन निरखि, उरज कोक शिशुदेष ।
करदल पंकज परसकरि, सखिन छिपाइ निमेष ॥

नवोठालक्षण-दोहा ।

लाज धरै उरमें डरै, रति नचहै सुकुमारि ।
ता मुग्धाको कहत हैं, सुकवि नवोठा नारि ॥ ४२ ॥

सवैया ।

शुभ नूतन रूप विशाल बन्यो, लखिकै मुख
चंद मलीन परै । मृग खंजन देखत नैनन

(१६)

रसमोदक ।

को, सुनि वैनन कोकिल धीर धरै ॥ असकंद भनै
निशि होत जबै, तबहीं अतिहीं उर बीच डरै ।
ननदीन सखीनके संग परै, पियके हियकी न
प्रतीति करै ॥ ४३ ॥

दोहा ।

नेह सखिनके संगमें, अधिक लगावति बाल ।
नेक प्रतीति न लालकी, सौत हियेमें शाल ॥ ४४ ॥

पुनः सवैया ।

कर मंजन भौनमें ठाढ़ी भई, नवबाल
विशाल सुछैल छरी । सजि अंबर भूषण अंग
सबै, छतिया अँगिया बिच एक परी ॥ असकंद
भनै भयो आइबो त्यों, पटओट छिपी डर लाज
भरी । मनौ पंकजकी लखिकै पियको, मुखचंद
कलीसी लपेटधरी ॥ ४५ ॥

दोहा ।

सुनि आगम पियको तिया, डरी खरी लजिआइ

बाह छुवत निज सखिनके, लगी धाइ उर धाइ ४६
पुनर्यथा--कवित्त ।

बाल नव सरस विशाल छबि छाई अति,
इयाम हित चाहिकै लगाई यों सरोदनी ।
बातन लगाइ चली कुंजन लिवाइ लियो,
बीच मग जाइ किये सुरत विनोदनी ॥
भनत स्कंद देख मन वश ताके भयो,
भुजभर लीन्हीं जान मनकी प्रमोदनी ।
अंक इमि त्रासमान ज्यों लखि प्रकाशमान,
भासकर आसमान रहत कुमोदनी ॥ ४७ ॥

दोहा ।

लखी लाल सूने भवन, गही अचानक आइ ।
झझक छुटी कंपत परी, धरक न हिये समाइ ४८
सवैया ।

निकुंजमें खेलनको गई दौर, हँसै विहरै वही
केलितरंग । तहाँ लखि कोकिल कीर कपोत, रहे

(१८)

रसमोदक ।

थकि और अनेक विहंग । भनै असकंद समौ
लहि श्याम, दुरे निकरे कर प्रेम उमंग । विलोक-
तही डरलाजभरी, सुकँपी छिपी जाइ सखी
नके संग ॥ ४९ ॥

दोहा ।

खेलत सँग सखियानके, अति मन प्रफुलित गात ।
लखत लाल उर बालडर, धरकन हिये समात ५०

विश्रब्धनवोढा लक्षण ।

कछू कछू उरमें धरै, प्रीतम प्रीति प्रतीति ।
डरै नवोढा रतिविषे, सो विश्रब्धकी रीति ॥ ५१ ॥

यथा--कवित्त ।

चंपक वरण रूप रतिकी हरन प्यारी,
वारी मत देख कह्यो कछुना सरोदनी ।
कंचन महल जड़ी मन अनमोल ताते,
प्रीतम बुलायो गई रतिकी विनोदनी ॥

भनत स्कंद अति छवि छकि आतुरसों,
कर गहि लीन्ह्यों चाहि मनकी प्रमोदनी ।
देखि मुख लाजभरी अति सकुचात ऐसे,
लखिकै लजात जैसे रविको कुमोदनी ॥ ५२ ॥

दोहा ।

ज्यों मर्कट रवि अंत लखि, रहत लता सों जाय ।
त्यों ब्रज बाल विलोकिनिशि, कछु मनमाहिं सकाय

पुनर्यथा-कवित्त ।

नव ब्रजनारि रूप रति अनुहार भली,
नितप्रति आवै करि बतियाँ सुनाय जाय ।
नैन सैन करिकै मनोज भरी चातुरी सों,
रसहूको चाहै डर बसहू भगाय जाय ॥
भनत स्कंद उठी छतियाँ नुकीली तासों,
चोप चसकीली चारु चौगुणी चढ़ाय जाय ।
पिय रति चाहै तब अति सकुचाय रहे,
छाँह परे जैसे लाजवतिहू लजाय जाय ॥ ५४ ॥

(२०)

रसमोदक ।

दोहा ।

चख जोरत पिय चोपसों, लाज करति सुकुमार ।
ज्यों कुमोदनी रवि लखै, करै न तनु विस्तार ५५

पुनर्यथा--कवित्त ।

मृदुल कपोल लागे विहसन मंद मंद,
आनंदकी कंद शोभा सुरत समीरहै ।
अंबुज अमल दल विमल सुहाये नैन,
सरस सुवैन जाके वसत अमीरहै ॥
भनतस्कंदशुभ आनन छटाकी छूट,
निपट कलानिधिकी कौमुदी कमीरहै ।
मैन हिय वास बढी रतिकी हुलास ताते,
प्रीतमके आस पास रमक रमीरहै ॥ ५६ ॥

दोहा ।

आवै नितप्रति प्रेमसों, डरवशजाय भगाय ।
पिय रति चाहै प्रीतिसों, तबहीं अति सकुचाय ५७ ॥

यथा-सवैया ।

रहै आठहु याम सुकाम यही, निजधाम सखी
नके संगपरै । बतियाँ जु कहै कोउ आवनकी,
छतियाँ लखि डीठि बचाइ डरै ॥ असकंद है जात
जु भेट कहूँ, अतिप्रेम बढ़ा हिय शंक करै ।
पिय चाहत प्यारी न अंक भरै, घनके वश
दामिनि ज्यों न परै ॥ ५८ ॥

दोहा ।

चसकीली वह चोपसों, रसहित आवत धाय ।
परवश परत न जानकै, डरवश जात भगाय ॥ ५९ ॥

यथा-सवैया ।

साहसकै रसके वशमें गई, देखन आनन पीकर
साजहि । लाल निहाल भये अवलोकि, लई भरि
अंक विशाल विराजहि ॥ त्यों असकंद भनै करते
छुटिजाइ छिपी धरिकै उर लाजहि । भामिनी

(२२)

रसमोदक ।

ढूँढ़े न पावत हैं हरि, चाँदनीमें मिलिकै दुर
भाजहि ॥ ६० ॥

दोहा ।

रस चाहति हिय डरति कछु, रहत सखिनकेसंग ।
होत अचानक भेंट जो, नेक न छावत अंग ॥ ६१ ॥

मध्यालक्षण-दोहा ।

लाज काम सम जासुके, मनमें दोई होइ ।
मध्या तासों कहत हैं, कवि कोविद सबकोइ ॥ ६२ ॥

गथा-कवित्त ।

आई सजि अगन उमंग केलि मन्दिरलौं,
सुंदर सुजान लखि मोहन निहारिवो ।
ताही समै सहित सकोचवश लोचनके,
समुद सरोजसे निचोहैं छवि धारिवो ॥
भनत अस्कंद परयंकपै पियारो तहाँ,
अंकभरि लेत है निशंक मुखसारिवो ।

उल्लास १.

(२३)

सरस सुधासे प्रेम मधुर विलासेवैन,
बार बार मंजुमुख नार्हीको उचारिवो ॥ ६३ ॥

दोहा ।

सुवर सुवर सुवरी घरी, धरी न धरकहि मैं न ।
भरी लाज मन दल कमल, पियके देखत नैन ६४

यथा-सवैया ।

परयंकपै पौढ़े दुहुं सजि अंग, प्रसंग अनंग
हियेमें चहै । तजि नूपुरदूपुर पाँइनके चित
चाइन चाप प्रमोदलहै ॥ असकंद भनै पिय
चाहत अंक, तहीं अनखाइ सकोच सहै । मन
मोहन सुंदर केलि करै, छतियाँके लगै वतियाँ
न कहै ॥ ६५ ॥

दोहा ।

छवि लखि मूरति श्याम वह, आनँदउरनसमात ।
सखि भरि आवत प्रेम उर, कहत वनै नहिं बात ६६

(२४)

रसमोदक ।

पुनः-दोहा ।

जो सोवत पिय मुखहि की, होत विलोकन हान ।
जो न नीदवश होइतौ, गहन चहत पिय पान६७

प्रौढा लक्षण ।

पतिहीके रसलीन मन, केलि कलनकी खान ।
प्रौढा तासों कहतहैं, जे कवि बुद्धि निधान॥६८॥

यथा-कवित्त ।

सुरति रची यों विपरीति प्राण प्रीतमसों,
विज्जुल छटासी करै इयामघन नीचै है ।
झुकिझुकि बारबार मिलि मुख चूमि चूमि,
अधिक अनंद भरी मुख तनु सीचै है ॥
भनत स्कंद त्यों अनंग की उमंगनमें,
धरत न धीर परी कंचुकी दरीचै है ।
वेंदा लागि मोतिनकी टूटि लर छूटि भई,
मानो मुख चंद्रकी प्रकाशित मरीचै है ॥६९॥

पुनर्दोहा ।

पगी सुरति विपरीतिमें, प्यारी हितहि लगाइ ।
पिय जब मुख चूमन चहै, तबै रहै शिरनाइ ७० ॥

पुनर्यथा-सवैया ।

रंग भरे हितसों मिलिकै, परयंकपै पौढ़े
दुवो सुख पाई । होनलगी रतिकी विपरीति,
अनंगने आपनी रीति जनाई ॥ त्यों असकंद
चह्यो पियने मुख चूमन लाज करी शिरनाई ।
आननपै लट आनपरी शुभ चंद्रने मानौ दरार-
सी खाई ॥ ७१ ॥

दोहा ।

छूटिपरी मोतिन लरी, बेंदाके चहुँ ओर ।
मनौ चन्द्रमुख ने करी, प्रगट मरीचै जोर ॥ ७२ ॥

प्रौढाभेद-दोहा ।

रतिमें जाकी प्रीति अति, रतिप्रीता कहि सोइ ।
आनँद आनँद मोहिता, प्रौढा भेद सु दोइ ॥ ७३ ॥

(२६)

रसमोदक ।

रतिप्रीता-यथा सवैया ।

भली जो बनी वह माधुरी कुंज, घने द्रुमपुंज
मवीसी मवास । पियासँग केलि कियो निशिमें
मन दै रतिमें अति कीन्हें हुलास ॥ भनै अस-
कंद परी चकचौंध उदै सुध आइ भई है निरास ।
लख्यो मुखचंद्र चकोरिनहै, लखि कंज प्रकाश
विसारे बिलास ॥ ७४ ॥

दोहा ।

पगी रही रतिरंगमें, निशिभर प्रीतम संग ।
लखे कंज मुकुलित जबै, भई पीयरे रंग ॥ ७५ ॥

पुनः-दोहा ।

लखि रवि पीरे पहुफटे, है उदास ब्रजबाल ।
कहत न कछु चुपचाप है, रही देख मुखलाल ७६

आनंदात्संमोहा-कवित्त ।

प्रातसमै प्यारी उठि प्रीतमके संगतै सु,
आई रतिरंग तेरी सुखको निबाहिकै ।

युग्मश्रुतिभूषण कपोलनपै दीप्तवान,
 द्वैरवि फँसेहैं मनौ पंकज सराहिकै ॥
 भनत अस्कंद केश छुटके छबीलीके सु,
 मानों अलि पुंज पुंज छाये हैं सलाहिकै ।
 शुभ मुख तापै तिल दौर सुधाहेत मनौ,
 चूमत पिपीलिकाहै चंद्रविंब चाहिकै ॥७७॥

दोहा ।

रति करि प्रीतम संग उठो, आनंद वश तिय भोर।
 बिहँसत सुधि न शृंगारकी, छुटे कंचुकी छोर ७८

पुनर्यथा-सवैया ।

पगी रतिरंग लगी पियसंग, अनंग उमंग
 जगी सब रैन । छुटे कुच कंचुकीके छराछोर,
 चुरी करकीं करकी सुध हैन ॥ भनै असकंद
 खुलीं अलकैं, विथुरे कच त्याँ बलि अंजन नैन ॥
 हिये हुलसी मन मोद भरी सु, कहै इमि प्यारी
 सखीनसों वैन ॥ ७९ ॥

(२८)

रसमोदक ।

दोहा ।

जो सखि तुम मोहित कही, भई सही वह बात ।
मुक्तमाल विगलित लखी, आनंद उर न समात ८०

पुनर्यथा-सवैया ।

लई भरिअंक निशंक निहारि, पिया परयंकपै
प्रेम बढ़ाई । रची विपरीति तची रति अंग, उमंग
मनोज करी सरसाइ । भनै असकंद अनंदमें वीर,
रही न हमैं सुध प्रीतसमाइ । हरा कुच कंचुकी
केशलैं छूट, छरा गहि गोद रही सकुचाइ ॥८१॥

दोहा ।

रची सुरति विपरीतिअलि, भरि भुजपियनिजअंक।
छकित छवीली छवि सरस, बैठीसमुद निशंक ८२॥
मान समैमें होतहै, मध्या प्रौढा दोइ ।
धीरा बहुरि अधीर गण, धीराधीरा सोइ ॥ ८३ ॥
चतुराईके वचन कहि, कोप गोप कर सोइ ।
मध्याधीरा कहतहैं, जे प्रवीन कविलोइ ॥ ८४ ॥

मध्या धीराको उदाहरण । यथा-सवैया ।

अनूप बनी बलि रूप रसाल, प्रमोद भरी
मुख राजत चंद । मयूर कपोत सु कोकिल कीर,
चकोर रहे छकि प्रेम अनंद ॥ भनै असकंद तहाँ
गये श्याम, पगे मुखकोक कलानके छंद । विलो-
कत नैन किये अरविंद, रही चुप लाज मनो-
जके फंद ॥ ८५ ॥

दोहा ।

ललित लाल लोचन निरखि, मनु पाटल द्युति ऐन ।
पलन परत कल विन लखे, यह छवि मूरति मैन ॥

पुनर्यथा-सवैया ।

साजि शृंगार विचार खड़ी, निज भौनमें
कंचनसी लसै डाली । प्रेम समेत परो रसमें, हितसों

(३०)

रसमोदक ।

तहाँ आय गये वनमाली । देखतही असकंद भनै
इमि, वैन कहै दृगमें करि लाली ॥ आज छकी
छवि में इनकी, यह मूरति माधुरी मोहन आली ८७

दोहा ।

आये छवि छाये छटनि, पगे प्रेम बड़ भाग ।
मोहित रति पति सम दृगन, वरषावत अनुराग ८८

यथा-कवित्त ।

सरस रसीली सब गुणन उजागरसी,
बैठी तहाँ अमित प्रकाश उजियारीको ।
चंचरीक चारों ओर मोदित मदंध ताके,
तनुकी सुगंध मान खंडित निवारीको ।
भनत अस्कंद तहाँ आये नदनंद प्यारे,
अंग अंग रूप दरशात उरधारीको ॥
विनगुणमाल लाल उरमें विशाल देखि,
पंकज समान भयो चंद्रमुख प्यारीको ॥ ८९॥

उल्लास १.

(३१)

बरवै ।

ललन ललित लखि लोचन यह सुखदैन ॥
मोचन विरह विथा भल मूरत मैन ॥ ९० ॥

मध्याअधीरालक्षण-दोहा ।

कहै कठोर वचन प्रगट, पियसों कोप जनाइ ॥
मध्या कहत अधीर तिय, तासों सुकवि बनाय ९१

उदाहरण-कवित्त ।

कौन हित मानिकर ह्यांलगि पधारे आइ,
कठिन कठोर चित्त काविधि इतै ढरचो ।
रूप गुणआगर अनूप रस सागर हो,
परतिय चाहि मोहिं आनँद हिये भरचो ॥
भनत स्कंद कोक कलन प्रवीन प्यारे,
वह क्यों सहैगी यों विछोह दिनको परचो ।
मोहिं समझावत रिझावत मिलैगौ कहा,
रैन जित जागे उत जाव इत का धरचो ॥ ९२ ॥

(३२)

रसमोदक ।

दोहा ।

आये वनवानिक भले, छाये छवि अनुराग ।
पाये सुख तित जाहु किन, भाये रति निशि जाग ९३

पुनर्यथा-सवैया ।

बैठी हती निज मंदिरमें, रतिके अनुहार नये
रस पागी । बैन कछू अनखाय कहे, लखिकै
तिय दूसरेके अनुरागी ॥ आये कहा किहि
कारणको, असकंद भनै तुमतो बड़भागी । रोकै
नकोऊ तुम्हैं हितसों, जित रैन जगे तितहीं मत
लागी ॥ ९४ ॥

दोहा ।

रैन जगे रसमें पगे, परतिय संग सुजान ।
तुमसे प्रीतम पाइकै, किहिविधि कीजत मान ॥ ९५ ॥

पुनः-दोहा ।

तुम्हें वसी करकै वसी, भली उरवसी आन ।
क्यों न मनायो मानहै, जोकर जानत मान ॥ ९६ ॥

उल्लास १.

(३३)

मध्याधीराधीरा लक्षण-दोहा ।

रूखे कहिकै वचन कछु, रोइ सुरोष जनाइ ।
मध्याधीराधीरतिय, ताहि कहत कविराइ ॥९७॥

यथा उदाहरण-सवैया ।

गये घर इयाम विलोकत बाल, कहे इमिवैन
कछूक विनिंद । भनै असकंद नयो रस चाखि,
वसे कित रैन मलिंदमदिंद ॥ अहो धन भाग कहा
कहिये सु, मिले तुमसे पति मोहिं गुविंद । गिरे
चखसों अँसुवानके बुंद, मनो मकरंद झरै
अरविंद ॥ ९८ ॥

दोहा ।

सहित स्वेद सीकर सुमुख, निरखन किय हिय चैन ।
वचन रचन भरि वारि दुहुँ, कहि बलि वारिजनैन ॥

पुनर्सवैया ।

आये घरे नँदनंदन ज्यों, अस्कंद भनै लखिकै

(३४)

रसमोदक ।

ब्रजबाल है । नैनन नीर भरचो करिरोष, कहै इमि
वैन कियो उरशाल है ॥ क्यों सहों एतो बिछो
घनो, उत जाव हमैं विधनै लिख्यो भाल है
प्राणपियारो मिलै तुमको, अति छैलछबीलो कौ
सो निहाल है ॥ १०० ॥

दोहा ।

पिय लखि वारिजनैन भरि, बोली वचन रिसाइ ।
तुमसे पति जाको मिलै, ताको सुख सरसाइ १०१ ॥

प्रौढाधीरा लक्षण-दोहा ।

रतिते रहै उदास अति, प्रगट न कोप दिखाइ ।
प्रौढाधीरा नायिका, ताहि कहत कविराइ ॥ १०२ ॥

उदाहरण-सवैया ।

पिया परयंकपै पौढि रहे पिय प्यारी विलो-
किकै मूखे सुभाइ । जुही वर मालती हार शृंगा-
रके, हारदये उरमें पहिराइ ॥ भनै असकंद गहे

उल्लास १.

(३५)

करके द्युति, क्षीण भई मनमें रिसछाड़ । मनौ
बिन नीर गुलाबके फूल, तिहुं पर ग्रीष्म आतप
पाइ ॥ १०३ ॥

दोहा ।

लखि आगम आनंदभरी, खरी प्रेम परवीन ।
छुवत छरा छरकत छटनि, आनन विरी लईन १०४

यथा—कवित्त ।

छैल ब्रजचंद्र आये मिलन छबीली काज,
रजनी बिताये नेह अधिक लगाये मन ।
प्रफुलित गात भये देखि शुभरूप अति,
कंज कर लीन्हो गहै मै नहू बढ़ाये पन ।
भनत स्कंद अंक भरत सु बोली बैन,
सकुच दुराये कुच छीजिये न मेरो तन ॥
औसर व्यतीत भये सुन नंदनंद प्यारे,
भरन न देत नीर बारिधि बलाहकन ॥ १०५ ॥

(३६)

रसमोदक ।

दोहा ।

पति हित प्रेम अनूप लहि, हरषित सहज सुभाव।
हाव भाव अनुभावको, अनुचित लखत न चाव॥

प्रौढा अधीरा लक्षण-दोहा ।

डर दैकै तिय पीयको, फूलमार जो देइ ।
प्रौढा कहत अधीर यह, कविकोविद मत सेइ ॥

उदाहरण-सवैया ।

गह्यो कर यूथ सहेलिन बीच, लिआइ विलो-
कत सो अँग अँग । बताइ कछु सखियान सुनाइ
रिसाय कहै तजौ यौन कुसंग ॥ भनै असकंद
प्रसन्न भरे, परनारिन सों विरच्यो रसरंग । सुधारत
मालतीकी छरी सों, पियके हिय होत मनोज
उमंग ॥ १०८ ॥

दोहा ।

मृदुलकंज कर मालती, लै लचकीली डार ।
हनत हेर हँसि श्याम तनु, किय परतियको प्यार॥

पुनर्यथा-कवित्त ।

जाइकै लिवाइ आइ रास केलि मंदिरते,
करिकर रोष यों सुनाबै बैन आलीको ।
कीजियो न ऐसो काम प्रीतम हमारे तुम,
लीजो उर लाइ फेर सौत प्रीति पालीको॥
भनत असकंद तूतौ छैल ब्रजनारिनको,
गैल जाइ रोंकै गाय गाय राग तालीको ।
करि दृग लाल रोष रस ब्रजबाल खड़ी,
फूलनकी माल लये मारै बनमालीको॥११०॥

दोहा ।

कहत सुनाइ सखीनको, अब न लीजिये नाम ।
मारदेत बनमाल लै, त्यों हरषत मन श्याम१११॥

प्रौढा धीराधीरा लक्षण-दोहा ।

हैं उदास रतिते रहै, पियपै भय दरशाइ ।
प्रौढा धीराधीर तिय, कहत सुजन रसगाइ११२॥

(३८)

रसमोदक ।

तथा-सवैया ।

कछु नैन उनीदे झुकी पलकैं अलकैं बिथुरीं
रस चाखि नयो । इहि भाँति छके मदश्याम
गये, लखि बाम अनूप प्रमोद ठयो ॥ असकंद
भनै भरि अंक लयो, मनसों नवप्रेम मनोज दयो।
मनभावतीको मुखचंद्र भलो, रिसके वशमें
अरविंद भयो ॥ ११३ ॥

दोहा ।

परसत परम सुजानके, तनु छिन छरक रिसाइ ।
तेह तरेरे तयोरकरि, बैठी भौंह चढाइ ॥ ११४ ॥

पुनर्यथा-सवैया ।

बनी अलि रूपकी रास बनी, रतिकी द्युति
कोटिन वारई देत । गये तहँ श्याम चढ्यो मन
चोप बढ़यो, अति प्रेम करै हियहेत । भनै असकंद
विलोकि रही, कछु भौंह चढ़ावत मान समेत ॥

गहे करके मुखरोष चढ्यो रग चंद मनौ अर-
विंदको लेत ॥ ११५ ॥

दोहा ।

गये श्याम शोभा निरखि, बोली कछू न वैन ।
गहे कंज करवालनै, करे तरेरे नैन ॥ ११६ ॥

ज्येष्ठाकनिष्ठालक्षण-दोहा ।

ज्येष्ठ कनिष्ठा कहत हैं, जहँ द्वै व्याही नार ।
जेठी प्यारी कविकहैं, लहुरी घट निरधारा ॥ ११७ ॥

यथा-कवित्त ।

बैठीं ब्रजबाल दुवो साज निज मंदिरमें,
आये नंदनंद तहाँ अमित अनंद सों ।
चंदन प्रसूनहार हिय पहिराये देख,
दरपन दिखाइ एक रूप कर फंदसों ॥
भनत स्कंद दूजी नजर बचाइवेश,
विमल कपोल दुवो परसत छंद सों ॥
भरभर भौरनके ढर वर कंज मानो,

(४०)

रसमोदक ।

सरवर छोड़ मिल्यो पगपरचंद सों ॥ ११८ ॥

दोहा ।

एक पीतपट ओट करि, एक अंकभरिऐन ।
मुखपर फेरत कंज कर, दूजीके उर चैन ॥ ११९ ॥

परकीयाभेद—दोहा ।

ऊढ़ अनूढ़ा भेद द्वै, कहत सुकवि अभिराम ।
चाहै जो परपुरुषको, परकीया वह वाम ॥ १२० ॥
करै प्रीति परपुरुषसों, व्याही औरै जाइ ।
ऊढ़ा तासों कहतहैं, रसिक मुजन कहिगाइ १२१ ॥

यथा ।

तनु नूतन विशाल छवि छाई अति,
शोभा अनूप मनौ विधि रति गढ़ी रहै ।
अमल कपोलनको मृदु मुसक्यान देखि,
मुनि मन मोहिजात लालसा बढ़ी रहै ॥
भनत स्कंद नेह लगन लगाई मैन,
ताते निजमंदिरके द्वारही खड़ी रहै ।

उल्लास १.

(४१)

कल छिन एकदू न परति विलोके विन,
मोहनकी प्रीति नई चितमें चढ़ी रहै ॥१२२॥

दोहा ।

लगी रहैं चहुँओरते, चुगल चवाई नार ।
नेहलगेकी वात यह, कीजै कहा विचार ॥१२३॥

पुनर्यथा-सवैया ।

न जो बैठिये संग सखीनकेतौ कहै, का करै
बैठी अकेली जुदै । फँसी नेहके जालमें कैसी
भई, सो कहा कहिये अपनो मनुदै ॥ असकं-
दभनै यह प्रीतिकी रीति, हियेमें लगी छुटै
कैसे मुँदै । मति साँवरे रंग रँगी सो कहै, चकही
कब चाहत चंद उदै ॥ १२४ ॥

दोहा ।

नई लगन नँदलालकी, चढ़ी हियेमें ऐन ।
खड़ी रहै निज द्वारपै, विन देखे नहिं चैन ॥१२५॥

(४२)

रसमोदक ।

पुनर्यथा-कवित्त ।

सघन लतान बृंदावन बीच आयो कान्ह,
ताहि लखिवेको करी इन चतुराईये ।
मैन भरे अधिक रसीले ऐन चैन देखि,
सरस सुशील भये तजिकै रुखाईये ॥
भनत स्कंद समै भूलत न येरी वह,
सहठ सुजान मान लहट लगाईये ।
शशिमुख वाको ताको सरस अमी पी छके,
अंचलके ओट दृग चंचल चवाईये १२६ ॥

बरवै ।

सखि विचार यह मनमें कहिये कौन ।
आवै जो इह मगमें रहिये मौन ॥ १२७ ॥

पुनः-सवैया ।

गइ वा दिन खेलन कुंजमें फाग, बदी यह
बात वहाँकी रहै । तहँ आइगयो रँगमें सरबोर,
विशाल बनी वह झाँकी रहै ॥ असकंद भनै

उल्लास १.

(४३)

लखिकै सबरी, गहिबेको चलीं हम ताकी रहै ।
तबते कछु नैक न चैन परै, मति मेरी भट्ट
छवि छाकी रहै ॥ १२८ ॥

दोहा ।

बढ़ी प्रीति उर श्याम तनु, घटत घटाये नाहिं ।
देखनेके मिस एक कर, चढ़त अटारी माहिं १२९

पुनः-दोहा ।

मेरे मनमें चढ़ि गयो, वह रँग रूप रसाल ।
कहौ सखी कैसे छुटै, विना मिले नँदलाल १३० ॥

अनूढालक्षण-दोहा ।

अनव्याही अनुरागनी, और पुरुष सों तौन ।
कहत अनूढा ताहिसों, कवि पंडित मति भौन ॥

यथा-कवित्त ।

पूजन गिरीश गई बाल नई मंदिरमें,
मोद लहि अमित प्रमोद उर ठानै है ।
दोनों कर मलयागिरि चंदन विशाल लैकै,

(४४) रसमोदक ।

अक्षत परश शीश सरस सुहानै है ॥
श्याम श्याम सुमन चढ़ाइ मन मानै सबै,
भनत अस्कंद बेशकौतुक दिखानै है ।
चंद्र जान उदित सुपंकज मुदित जान,
केश निशि मान मानौ भौर भरानै है १३२
दोहा ।

लगी प्रीति पूरण हिये, लखि लोचन अभिराम ।
मिलै मोहिं विधि विनव वह, ब्रजजीवन घनश्याम ॥
परकीयाभेद-दोहा ।

गुप्तविदग्धा लक्षिता, कुलटा मुदिता सोइ ।
अनुसैना युत भेद छै, ये परकीया जोइ ॥ १३३ ॥
भूतगुप्ता लक्षण-दोहा ।

सुरत करै कर गोवही, गुप्ता भूत वखान ॥
कहत ग्रंथमत देखिकै, जेकवि सुमति निधान ॥
यथा-सवैया ।

एक दिना तनु साजि प्रसूनन, हेतु गईवनतूसुन

लेरी।सो चहुँ ओर विलोकि चकोर,समौ लहि साँझ
दशौ दिशि घेरी ॥ त्यों असकंद छटा घनश्याम,
निहारि डरी करि लाज घनेरी । भागत केतकी
कंटक लागि फटी रँग चौपरी चूनर मेरी॥१३५॥

दोहा ।

अब न जाब पनिया भरन, चाहै सास रिसाइ ।
चतुर चवाइन चौगुनी, देती दोष लगाइ ॥१३६॥

पुनः—सवैया ।

यमुनातट कुंज कदंबके पुंज, प्रसूनन हेतु पठा-
वती हौ । श्रम स्वेद विलोकि विना समुझे,
मनमें जु कहा दरशावतीहौ ॥ असकंद अबै न
कहौ हमसे, हकनाहक मोहि लजावती हौ । सब
बैठ भटू गुरुलोगनमें, किहिकाज कलंक
लगावती हौ ॥ १३७ ॥

दोहा ।

भीजी रंग गुलालमें, नेक न परचो लखाइ ।

(४६)

रसमोदक ।

करगहि मुख केसर मली, वीर कौनने आइ १३८॥

पुनर्यथा-सवैया ।

आज प्रभात गई यमुनाजल, मोद भरी मनमें
मति ठानी ॥ देख चहुँदिशि धाये भट्ट, तजि पुंज
मलिंद सुगंध सुहानी । त्यों असकंद भनै लहि
प्रेम, धिरी चहुँ ओर हिये अकुलानी ॥ का कहिये
यह कंप अरी, तबते यह देहदशा दरशानी १३९॥

दोहा ।

ललित लता कंटक कलित, कुंजगैल लपटात ।
वसनफटे उत जात सखि, मो मन अति सकुचात ॥

पुनर्यथा-कवित्त ।

कासों कहौं आजकी कथा में यह मेरी भट्ट,
बीती जो विथाहै काहि काविधि सुनैहौं मैं ।
सहजसुभाय चित्त चाहिकै विनोद मान,
मंजन अनेक कर कुंज छवि छैहौं मैं ॥

भनत स्कंद किन कोटि उपहासैं मोहि,
तासे बहु सासकी अनेक सहिलैहों मैं ।
सैहों ना चकोरनकी चुंग चोट चारों ओर,
आजतें न भूलहू कलिंदीकूल जैहों मैं ॥ १४१ ॥

दोहा ।

सखि गुलाबके फूलकी, डार नवाई आज ।
करते छुटि अँगियाफटी, हिये धरक अति लाज ॥

भविष्यगुप्ता लक्षण-दोहा ।

करन सुरति चाहै हिये, आगूसे कर गोइ ।
गुप्ता ताहि भविष्यकहि, वर्णत कवि सबकोइ १४३

यथा-सवैया ।

मौरसिरी जहँ हैरी भली विध, सोनजुहीकी
लगी गति प्यारी । नीकी लगी भली माधवीकी
छवि, सेवती चारु अनारकी वारी ॥ चंपन भौर
भनै असकंद सु, केतकी बेलमें पेंच निवारी ।

(४८)

रसमोदक ।

आज मैं देखन जैहाँ वहाँ जहाँ, फूली गुलाबकी
है फुलवारी ॥ १४४ ॥

दोहा ।

विमल विलोकन जाय हों, नूतन वह वन आज ।
गुंजत मधुप मदंध तहँ, शोभित नित ऋतुराज ॥

पुनर्यथा-सवैया ।

हमें फूल गुलाबके टोरने हैं, शिव पूजबेको
मति यों ठई है । यह गाउँ चवाइनको चरचो,
सुनिकै डरपै जियसों दई है ॥ असकंद भनै
सबहीके भट्ट, विधने लिख्यो भाल सोई भई है ।
हम यासों सुनाइ कहैं सब सों, फिर कोउ कहै
न कहां गई है ॥ १४६ ॥

दोहा ।

मौरसिरी जहँ है अरी, सौनजुहीकी दौर ।
देखन जैहाँ आज मैं, फुलवारी को ठौर ॥ १४७ ॥

वर्तमानगुप्ता लक्षण—दोहा ।

करतजात जाहिर मुरत, गोवत तुरतहि जात ।
वर्तमान गुप्ता कहत, ताहिसुजन अवदात ॥१४८॥

उदाहरण—कवित्त ।

और बनवाइवेकी चरचा चली है कहुँ,
तिनहि दिखायवेकी आन परी इनको ।
येतौ ब्रजठाकुर न देयँ तौ करोंगी कहा,
माँगत हैं आरसी अँगूठी चारदिनकों ॥
भनत अस्कंद यामें कछु वरजोरी नाहिं,
सुनियो सखीरी यों सुनाइ कहौं किनको ।
सौंह कुलकानकी नदानवन देहौं नाहिं,
निशिको दिवसको घरीको एक छिनको १४९

दोहा ।

प्रिय रिसाइ कुंजन गई, मोसों कहत मिलाइ ।
बार बार यह कहनको, कान्ह कान लग जाइ ॥

(५०)

रसमोदक ।

यथा-सवैया ।

काज अनेकन हैं गृहके सब एक करै नहिं है
मतवारो । हों हरभाँति सिखाय चुकी सखि, तू
कहि जो कह्यो मानै तिहारो ॥ त्यों असकंद भनै
यह कौतुक, देखिकै को न करै निरधारो । बैठ
इकंतमें रूप धरै सखि यो बहुरूपिया कंत हमारो ॥

दोहा ।

सखी सुनौ यह पथिक इक, बातें रचत अनूप ।
कहत एक दिन में यहाँ, नयो खुदाऊँ कूप १५२ ॥

द्विविधविदग्धालक्षण-दोहा ।

करि चतुराई वचन सों, मिलै क्रिया कर जोड़ ।
वचनविदग्धा क्रिया इक, कहत विदग्धा सोइ ॥

यथा-कवित्त ।

कारे कारे दिशन दवाइ चहुँ ओरनसों,
आये घन गरज मचावत तरंगमें !
कूक उठे कोकिला सकूकदै कुहूक उठे,

धुनि सुनि मधुर मयूरहू उमंगमें ॥
 भनत अस्कंद होनलागी हिय मंजु मार,
 मैनकी विरह लागी बढन सु अंगमें ।
 डरत अकेली निजभौन में अँधेरी रैन,
 प्रीतम न आये रहे सौतन कुसंग में ॥ १५४॥

दोहा ।

रैन अँधेरी मैं डरौं, ननदी गई रिसाइ ।
 सखी नकोऊ संगमें, पियको सौत सुहाइ ॥ १५५॥

पुनःसवैया ।

न आये पिया घर सौतन संग, रहे सुखसों अतिही
 मनमान । सुनै इमि वैन कछू रिसके, ननदी गई
 रूठ कियेही गुमान ॥ भनै असकंद कहा कहिये,
 न सखी कोउ संग उये किमि भान । धरापर धूम
 करी धुरवान घने घन कोरे लगे घहरान ॥ १५६॥

दोहा ।

पिय सौतनके संगमें, फँसे लगाय सनेह ।

(५२)

रसमोदक ।

घन घमंड आये सु मैं, डरत अकेली गेह ॥ १५७

क्रियाविदग्धा यथा—सवैया ।

लागिगई सँग हेलिनके, बट पूजवेको र
विचार महरत । आयगये वे अचानकहूँ घने
श्याम तहां घनश्यामकी सूरत ॥ त्यों असकं
भनै अतिही हिय, चाह बढी यह बात बिसूरत
वेदी सम्हारनके मिस बाल सु, आरसीमें लख
लालकी सूरत ॥ १५८ ॥

दोहा ।

पटहि दाबि ठोढ़ी दुविच, लखत छाँह मिस ओर
झुक झुक कसकमिरोर लै, कसतकंचुकी छोर १५९

पुनर्यथा—बरवै ।

अटक्यो आइ भमरवा रसके हेत ।

न सकै भरी गगरिया कसकै लेत ॥ १६० ॥

पुनर्यथा—सवैया ।

चली ब्रजकी वनितानके संग, अली पहिरे

उल्लास १.

(५३)

मुकतानकी माल । मनौ छवि छीनलई रतिकी
अतिही बनी रूपकी राशि विशाल ॥ भनै अस-
कंद सुकुंजनमें लगी, खेलनआय गये नँदलाल ।
विलोकतही पटओट भई, कस कंचुकी लागी
उधारन बाल ॥ १६१ ॥

दोहा ।

चलत सखिनके संगमें, चितवत चारहुँ ओर ।
कहुँ घन कहुँ वन कहुँ सुमन, छवि हितनंदकिशोर ॥
बरवै ।

मनमोहनको मग में लख्यो सुजान ।
वैदी लगी सँवारन अधिक सयान ॥ १६३ ॥

पुनर्यथा-कवित्त ।

अति अनुरागी बाल ठाढ़ी यों सरोवरमें,
बार बार कंचुकी के छोर छुर छुर जात ।
झुकत झपाकसों छिपायतनु ओढ़ै पट,

(५४)

रसमोदक ।

मोतिनकी माल हिये बीच लुर लुर जात ॥
भत अस्कंद त्यों अनंग अंग अंग ओप,
साँवरे सलोने कान्ह ओर मुर मुर जात ॥
लगत समीर जुरै मानौ वश लाज कंज,
मुकुलित लोचन विलोकि दुर दुर जात १६४॥

दोहा ।

घिरी सखिनके जालमें, बैठी बाल रसाल ।
कर उठाइ घूँघट करत, लखि निहाल नँदलाल ॥
लगी सम्हारन भालकी, वेंदी बाल विचार ।
इकटक रही सु आरसी, छवि तनु लाल निहार ॥

लक्षिता-लक्षण ।

सखी लखावै प्रीति जो, परपति चिह्न दिखाइ ।
कहत लक्षिता ताहिसों, जे प्रवीन कविराइ १६७॥

सवैया ।

कहै मानिये चाहै न मानिये जू, तुमतौ नँदन

दके अंक लसी । अतिप्यारी मनोहर मौज भरी,
बतियाँ सुनिकै कहौ वंकजसी ॥ असकंद भनै
अबहीं ते भट्ट, चितमें हितसों निरशंक फसी ।
अबै लागती नीकी सुहाँईतनी, छतियाँ ये भली
कली पंकजसी ॥ १६८ ॥

दोहा ।

श्रमकन अलि अलकन मनहु, झरत प्रेम अनुराग ।
मनमोहन तू मोहनी, दुहूँ आज बड़भाग ॥ १६९ ॥

पुनर्यथा-सवैया ।

का कहिवेमें निकास अरी, किहि हेतु सों
मोतिन माँग सँवारी ॥ छाई सु प्रीतिघनी उरमें
लखि चातुरी तेरी भई हम वारी ॥ वारी रही तू
भनै असकंद सु कौनके नेह सों नेह लगारी ॥
चोपसे देखत चारहु ओर, सु कौन है तू नई
झूलनवारी ॥ १७० ॥

(५६)

रसमोदक ।

दोहा ।

भली बनी वानिक विशद, मृदुल मालती माल ।
अजौ अगुण गुणलौ प्रगट, भई सरस रस जाल ॥

पुनर्यथा-कवित्त ।

रूपरस राते ये नवेली तेरे रम्य युग,
सौतिनको ताते मनमोहन सुहाते ये ।
भनत अस्कंद इतराते लखि प्रीतमको,
काते खरसानके सुधाको वरसाते ये ॥
देखकै लजाते मृग मीन अरु खंजनहुं,
उपमा न पाते रसरीत न जताते ये ।
सुख सरसाते पर प्रीति न लखाते वेश,
तेरे दृगप्यारी रहैं छविमदमाते ये ॥ १७२ ॥

दोहा ।

मनमोहन मन मिल अरी, सो उरमें छवि देत ॥
अब किहि कारण गोइबो, प्रगट दिखाईदेत १७३ ॥

पुनः-सवैया ।

मुख देखकै चंद्ररहै रमता समता को करै
लखि रूपनता । भ्रम होत चकोरनको जबता
अब ताकि कितेक करैं ममता ॥ उरमें लसै हार
गसे मुकता असकंद भनै दियो कौने सता ।
विनदेखे भट्ट वह कुंजलता ब्रजमें बसिबो हँसी
खेलनता ॥ १७४ ॥

दोहा ।

अधर रदनकी छाप यह, उर पै विन गुणमाल ।
सौहैं करि तोसे कहौं, गोहे नबनै वाल ॥ १७५ ॥

कुलटालक्षण-दोहा ।

लाज रहित बहु चाह पति, रतिते तृप्ति न ताइ ।
कुलटा तासों कहतहैं, कविवर बुद्ध बनाइ ॥ १७६ ॥

यथा उदाहरण-कवित्त ।

रूप गुणसागर प्रकाश नवयौवनपै,

(५८)

रसमोदक ।

धरत न धीर परचो मै न मन फंद है ।
होत न प्रभात कर मंजन सँवारै गात,
केशछुटकाय चलै गजगति मंद है ॥
भनत स्कंद चहै पथिक सनेह गहै,
नेक हू न लाज रहै निपट सुछंद है ।
दिवस व्यतीत जबै होत अरविंदनैनी,
अधिक अनंद जौलों उदित न चंद है १७७॥

दोहा ।

निशि अँधियारी रैनमें, परै हियेमें चैन ।
पथिकदेखि सखियानसों, कहति रसीले बैन १७८॥
छाजत छबिकी छटासी, छज्जा छलिया छैल ।
झकत झरोखाही रहै, खिरकी द्वारे गैल ॥१७९॥

पुनर्यथा—कवित्त ।

चाहभरी चंचल विलोकन चहुँघा चारु,
चोखे पट अंग शुचि सौरभरंगी रहै ।
भूषण अनूप अति उरज उत्तंग तंग,

कंचुकी कुसुंभ रंग सुरत जगी रहै ॥
 भनत स्कंद कुंज विपिन विहार वेश,
 मोदमय पुरुष प्रवीणन पगी रहै ।
 परम पुनीत रति रीति हित हेर प्रेम,
 परस प्रदोष मंजु मारग लगी रहै ॥ १८० ॥

दोहा ।

सुनि विहार ब्रजलोग सजि, चले चतुरचितचाह।
 हँस विलोकि नूतन पुरुष, चाहत नेह निवाह ॥

पुनर्यथा—सवैया ।

रहै पर प्रीति अनेक उमंग, अनंग उदै रति
 चाहत ऐन । चलै पट भूषण ओप दिखाइ,
 रिझाय सबै कहि माधुर बैन ॥ चलै असकंद
 निकुंजनमें सुन गोपसमूह करै चितचैन । तकै
 तिरछौंहे कटाक्षनसों, हरषै बिहँसै यों चलावत
 सैन ॥ १८२ ॥

(६०)

रसमोदक ।

दोहा ।

रमन चाह परपुरुषसों, कर हित प्रगट अनेक
भानु छिपे लहि पथिकजन, मिलत नकरत विवेक

पुनर्यथा—सवैया ।

सु चलै नवकुंज कलान प्रवीन, प्रमोद भर
बहुभाँतिहितै । हँस हेरन चातुरी चोप चढ़ी
दृगफेरन चंचलबाजनिताँ ॥ असकंद भनै मृदु-
माधुरवेन, सुनाइ कहै छवि छैल जितै ॥ हरषै
मनमाँह गुवालनके, निरखै चहुँ ओरन चाह तितै ॥

दोहा ।

खुले केश अंचल बिचल, छुटे कंचुकी छोर ।
बिहँसि बतात सखीनसों, रसिकनकी चितचोर ॥

मुदिता लक्षण—दोहा ।

मनभाई सुनि बात लखि, दिये प्रमोदित होइ ।
मुदिता तासों कहतहैं, कविकोविद रस मोइ ॥

यथा उदाहरण-सवैया ।

सजे नवअंग अनंग उमंग, बढ़ी मन चोप
विचार विशेष । हिये मति ठान सु मीत पुनीत,
धरे मन धीरज ताहिनिमेष ॥ भनै असकंद छकी
छविसों, छतियान छुये लगि प्रीति अलेष । प्रमोद
भरी सखिसों विहसै, गुणआगर बाल निशा-
कर देष ॥ १८७ ॥

दोहा ।

पथिक सार पियखत दियो, वैसिक भयो सुनाह ।
गुरुजन दुखजाहिर करत, हीतल उमंग उछाह ॥ १८८

पुनर्यथा-कवित्त ।

बैठी सजि सुंदरि अलीन मोद मंदिरमें,
सहज श्रृंगार दिव्य दीपत लसी परै ।
मंद मंद हँसन सनेह मनमोहनको,
काहु वै कहै न लाज गुणन गसी परै ॥

(६२)

रसमोदक ।

भनत स्कंद जोर यौवन झकोर वेश,
गौन सुनि प्रीतम विदेश विहसी परै ।
हेर हेर हरष हुलास अंग भूषणलौं,
कौतुक कलानकुच कंचुकी कसी परै ॥ १८९॥

दोहा ।

सुमुख सखिन सुन शशिमुखी, कुंज गवन नंदलाल ।
हिय हुलसी हरषी हिये, सुंदर रूप रसाल ॥ १९०॥

कवित्त ।

पथिक लियायो पियसारमें दिखायो खत,
बूझैं मिलि सकल सुनाइयत बात है ।
वैसिक भयो है पति भै शक न रंच कहूं,
दिनप्रति अमित प्रमोद सरसात है ॥
भनै असकंद और गुरुजन विचारकरै,
कहत न वैन सुने मन उमदात है ।
ऊपर सभीते दुख चौगुनो दिखातपर,
हीतल उमंग सुख सौगुनौ दिखात है ॥ १९१॥

उल्लास १.

(६३)

दोहा ।

रमन वैन सुन सदनमें, वसन परोसिन नाह ।
भो अनरसरस रीझ मन वशरस खीझ उछाह १९२

पुनर्यथा-दोहा ।

सघन कुंज पुहपावली, भ्रमरावली अनंत ।
पढ़त कीर विरदावली, लखत प्रसन्न वसंत ॥१९३॥

पुनर्यथा-कवित्त ।

कुंदन सरस दीप्त दीपन प्रदीप्तवान,
तद्वत् मयंकमुखी विमल सुहायो है ।
जगमग जडित जवाहिरके आभरण,
अंग अंग शोभित मनोज सुखजायो है ॥
भनै असकंद सुने विरह अचानकहूं,
नाहकहू जाइ मन करत परायो है ।
ऐसे प्रिय वचन सुकाहू सखि आय कहे,
होत सुत ननद प्रमोद अति छायो है ॥१९४॥

(६४)

रसमोदक ।

दोहा ।

सुनत विरह सरसान अति, गवन करनकर वान
ननद ललन होतन मुने, आनँद हिय न समान १९५

पुनर्यथा—दोहा ।

कानन देख्यो ध्यानमें, पिपा मिले तिय आन
श्यामघटा घन देखकै, हरषन हिये समान ॥ १९६ ॥

पुनर्यथा—सवैया ।

रही चाह चहुं दिशि प्रीतिभरी, नवनीत मनो
रथकी अधिकारी । तैसही वीन सुनी हरषी
निरखी छवि मूरत कुंजविहारी ॥ त्यों असकं
भनै लखि कुंज, मनोहर केलिकला उर धारी
वैसही आइ झुकी मनकी, चहुँओरते घोर घट
घनकारी ॥ १९७ ॥

दोहा ।

नई लगन नाई लगन, नाउन दई दिखाइ
गावनलागीं सब सखी, सावन पहुँचो आइ १९८

उल्लास १.

(६५)

पुनर्यथा-दोहा ।

सुन हरषीं हिय हुलस तनु, गवन रवन कलिकुंज ।
प्रफुलित सुमन सनेह जहँ, श्याम सघन द्रुम पुंज ॥

अथ अनसैनालक्षण-दोहा ।

विहरत जहँ दंपति सुरति, सो थल मिथ्यो दिखाइ।
प्रथम सु अनसैना कहत, होत बहुत दुखताहि २००

उदाहरण-सवैया ।

कियोहै सुराज नयो ऋतुराज, रवाज समीर
करी सो दिखात । कहाँ भटकौ गहि मौन रहौ,
भ्रम भूले फिरौ का तुम्हें दरशात ॥ भनै असकंद
सुपंकजको, नहीं लेश अबै ये पुरैनके पात । न
कुंजमें एकहू फूल सुगुंज वृथा अलि क्यों करै तू
उतपात ॥ २०१ ॥

दोहा ।

आगू लै हिमने दियो, राज भयो ऋतुराज ।

(६६)

रसमोदक ।

फूल नएकौ कुंजमें, तू गुंजत बेकाज ॥ २०२ ॥

पुनर्यथा-सवैया ।

बार हजारक लौं बरज्यों सुन वीनिये फूल
नयो यह बाग है । तापै कछू यह टेक घरी घरी
रीतरहे उठ आवत जाग है । त्याँ असकंद भनै
अतिही, हियमें यह बाढ़यो भल्यो अनुराग है ॥
पापिन तू नहिं मानत नेक, सुभौरन लेन न देत
पराग है ॥ २०३ ॥

दोहा ।

हौं तोसों कहिजातहौं, वीनन सुमन सु बाग ।
क्यों पापिन तू अलिनको, लेन न देत पराग ॥

द्वितीय लक्षण-दोहा ।

चाहै जो संकेतको, होनहारकी चाह ।
सखी बतावै द्वितिय कहि, अनुसैनादुखवाहि २०५

द्वितीय अनुसैनाको उदाहरण- कवित्त ।

सुगम सरोवर मनोहर विचित्रतामें,
करत कलोल वामें अधिक सु मीन है ।
प्रफुलित कंजनपै गुंजत मधुप पुंज,
रसवश तामें रहै अधिक अधीन है ॥
भनत असकंद होव मुदित मयंक मुखी,
केकी पीक भूर एक बातही नवीन है ।
कुंजनसे कुंज अति सरस दिखात जैसे,
मारतंड मंडलकी पृथिवी नवीन है ॥२०६॥
बरवै ।

काननकी सुध कानन सखी सुनाइ ।
अति प्रसन्नभो आनन, हिय समुदाइ ॥ २०७ ॥
दोहा ।

पुंज पुंज अलिं कुंजमें, गुंजत फिरत समूह ।
पिक चकोर चातक सरस, तज दुख कर सुखयूह ॥

(६८)

रसमोदक ।

कवित्त ।

सघन सुहाइ कुंज सुमन अनूप फूले,
लखि मकरंद भौर भाँवर भरतवे ।
तज दुख सुघन दरारे देत दौर दौर,
गरज छटाके हेत मानो लरतवे ॥
भनै असकंद ऐसो कौतुक मयूर पिक,
कोकिला समूह बोलैं धीरना धरतवे ।
झुकि झुकि परत धरापै तरु झूम झूम,
शीतल समीर झोंके हीतल करतये ॥ २०९ ॥

दोहा ।

सघन कुंज सह सुमन लखि, चंचरीकके पुंज ।
फिरत एकरस हेत वे, मधुर मचाये गुंज ॥ २१० ॥

पुनर्यथा-दोहा ।

लैआई मालिन सुघर, प्रफुलित सुमन गुलाब ।
खिले मालतीहूँ समाझि, चढ़ी चौगुनी आव २११ ॥

पुनर्यथा-बरवै ।

हौंसिन गई परोसिन देखन बाग ।

लखि रसाल वन फूल्यो मनसिज लाग ॥ २१२ ॥

पुनर्यथा-कवित्त ।

मंजुल विमल बाल सरस विशाल लता,

पावत न ताहि अमरावतीके बाग हैं ।

दाडिमं दरक कीर चातक कपोत आय,

उड़न विसार वसे कर अनुराग हैं ॥

भनै असकंद तहाँ सुगम तड़ाग एक,

मीन रहै खंजन मृग आवत सु भाग हैं ।

कमलन फूले अलि गाहक पराग भये,

रागवर गावत बढ़ावत विराग हैं ॥ २१३ ॥

दोहा ।

हिये चैनकर शशिमुखी, निरख मनोहर बाग ।

गुंजत फिरत समूह अलि, वरषावत अनुराग २१४

(७०)

रसमोदक ।

बरवै ।

देखहु चलि नवकुंजै विपिन सुवाग ।
चहुँदिशि झरत मही पै कुसुम पराग ॥ २१५ ॥

तृतीय अनुसैना लक्षण--दोहा ।

केलिसदनते आगमन, पिय लखि जिहि दुख होइ ।
हौंनगई पछिताइ मन, तृति अनुसैना सोइ ॥ २१६ ॥

कवित्त ।

नवब्रजनारि कोऊ निजगृह द्वार ठाढी,
आये घनश्याम लखे घनसे सुधाके हैं ।
भनत अस्कंद भई अधिक अधीन लखे,
हिय वनमाल भये लाल चख वाके हैं ॥
लेत न उसाँस कंचुकीके कस टूटपरे,
अति अभिलाष भरे शुभउन ताके हैं ।
अरुण सुहाये कुच तापे कछु श्याम मनौ,
पंकज कलीनपै मलिद मद छाके हैं ॥

उल्लास १.

(७१)

दोहा ।

सुभग माल उर इयामके, गोरज अलक विशाल ।
देखतहीं ह्व विरहवश, कह्यो न कछु ब्रजबाल २१८

पुनर्यथा-कवित्त ।

सुंदर सुवान सुखदान मोद मंदिरमें,
बैठी बेस सहज शृंगार रति सानीसी ।
मुदित मनोरम मनोज मनमोहनके,
चाह रही चोपहिय चारु मनमानीसी ॥
भनै असकंद आय औचक अचानक हीं,
बाँसुरी सुनाइ सुने चौंक सकुचानीसी ।
फीको परचो चन्द्रमुख धीरज न हीको रह्यो,
विमुद विलोकि भई बेहद विकानीसी २१९॥

दोहा ।

आवत वनवानिकबने, शोभित सुमन शृंगार ।
लखि विलखीउर कर कलित, ललित लहलहीडार ॥

(७२)

रसमोदक ।

पुनर्यथा-सवैया ।

भूषन अंग उमंगनसों सजि, मोद मनोरथ
प्रीति ठनीमैं । चाह भरी चित चंचल वाट विलो-
कत वेस रही सजनीमैं । ताहि समै असकंद भनै
धनश्याम विलोकनि कुअवनीमैं । ह्वैरही ठाढ़ी
ठगीसी थकी थिर है विरहावश कामअनीमैं२२१

दोहा ।

कौन बजाई बाँसुरी, सुधावैन मृदुतान ।
लगी हिये अलि आन यह, जनु मनोजके बान२२२

गणिका लक्षण-दोहा ।

निशिदिन धन मनमें बसै, रमै सु लैकर सोइ ।
सोई गणिका नायिका, रसग्रंथनमें होइ ॥२२३॥

गणिकाका उदाहरण-कवित्त ।

बैठी रसरीतमें मनोहर मनोज भरी,
वोज भरी सोहै अंग अंवर वनक के ।

विशद विलास मृदुहास रसवास छुये,
छरकत छैलके तनूरुह तनक के ॥
भनै असकंद केलि कलन प्रवीन महा,
मोहिलेत मंजु मन केतिक धनक के ॥
करत कुतूहलसे माँगै हँसि हेर हेर,
जटित जड़ाऊ करकंकन कनक के ॥२२४॥

दोहा ।

गरज बतावत सहजहीं, अलगरजी मन चाह ।
प्रीति रीति हिय कपट युत, झूठो नेह निवाहर २२५॥

पुनः—कवित्त ।

चाहभरी चंचल विलोकन विशाल नैन,
सैनन धनीन कहै वचन हितै हितै ।
सकल श्रृंगार साज अमल अगार द्वार,
वीणन प्रवीन गावै वासर बितै बितै ॥
भनै असकंद सुख सौरभ सुभाग भरो,
राग भरो नेह धन बाढ़त नितै नितै ।

७४)

रसमोदक ।

चातुरीसों लचक लजाइ ललचाइ मंजु,
मृदु मुसक्याय चित चोरत चितै चितै ॥ २२६ ॥

दोहा ।

मधुर मधुर कहि वचन मृदु, रसिकनको मन लेत ।
धनी पुरुषसों चाह कर, विहँसि ठिठौहीं देत २२७ ॥

पुनः—सवैया ।

रंग तरंग उमंगसों बाल, सु द्वारपै ठाढ़ी नयो
हित चाइकै । जाइ अचानकहीं निकरे, लखिकै
उरमाल लियो है रिझाइकै ॥ त्यों असकंद भनै
अतिहीं, चित चौगुनी चाह बढी हित पाइकै ।
कुंदको हार मुकुंद दियो हैंसि, लीन्हों मनोज
भरी अलस्याइकै ॥ २२८ ॥

दोहा ।

इयाम तुम्हारी बाँसुरी, जौने लई चुराइ ।
हम कहौ कछु देनतौ, तुरतहि देयँ बताइ ॥ २२९ ॥

पुनः-कवित्त ।

छैल ब्रजचंद्र चले छलन छबीली काज,
कछुक गवाँयो भयो लखिही कलोलको ।
कंजकर पकर सु अंक भर लीन्ह्यो ताहि,
अति मधुमातो चह्यो चुंबन अमोलको ॥
भनै स्कंद अधर दशन दबाइ बाल,
बोली अरे छोड़ मोहिं लीन्ह्योहैं न मोलको ।
निपट सयाने सो अयाने सुनो होत कहा,
करकर लीन्ह्यो दियो करन कपोलको ॥२३०॥

दाहा ।

अधर दशन बिच दाबिकै, बोली हँसि इमि बोल ।
कर करने तेरो लियो, लियो सु करन कपोल ॥२३१॥

पनः-कवित्त ।

नितप्रति सोधेसे नहाइ तनु मंजनकै,
साजत श्रृंगार प्रेम हियमें धरे रहै ।

(७६)

रसमोदक ।

बार बार आवै निज द्वारपै अकेली लखि,
पथिक बोलाय कर लै मन भरे रहै ॥
भनै असकंद ऐसी रीतिकी प्रतीति नाहिं,
अधिक सयान मान प्रगट गरे रहै ।
दामिन दशन विंश अधर समान ठान,
भुकुटी कमान बान नैनन करे रहै ॥ २३२ ॥

दोहा ।

अधिक सयान हिये बसै, लसै अनोखीवान ।
आननको शशि जानिकै, बैठत द्वारे आन ॥ २३३ ॥

बरवै ।

घन न जोर जो बरसैं तरसैं मोर ।
तुम न लेहु मन करसों करसों जोर ॥ २३४ ॥

कवित्त ।

मेरे प्राणप्यारे तुम जीवन आधार और,
कौनहै आधार जासों वैन भाषि कहिये ।

सौहै तुम सौहै जो हजारकलौं ठानी सोतौ,
 एकहुं दरआनी नहीं कौन भाँति चाहिये ।
 भनै असकंद येती प्रगट दिखानी प्रीति,
 रीति मनमानी सो वियोग कैसे सहिये ॥
 बरज न कोऊ सकै अरज हमारी यह,
 गरज तुम्हारी जहाँ चाहौ तहाँ रहिये २३५॥
 दोहा ।

कर कंकन दुरदेन कहि, लयाये ना बनवाइ ।
 कौन रीति हित मानिये, अंतर कपट दिखाइ ॥

अन्य सुरति दुःखिता लक्षण—दोहा ।

और नारि तनु चिह्न लखि, निज नायिकके जौन ।
 बात पैज कहि तेह गहि, अन्य सुरत दुखितौन ॥
 विरी हाथदै सखीके, फिरी बिहँसि मुखगोइ ।
 लाल रीझियतु जाहिपे, क्यों न सुहागिल होइ ॥

उदाहरण—कवित्त ।

शुभ नवमाल पिय गृहमें लिआये आज,

(७८)

रसमोदक ।

सहजसुभायकर बोली हौं न चाहिनै ।
बसत परोसमें हमारे तुम तासों कहों,
वह उरमाल शोभा तुव उरमाहिनै ॥
भनै असकंद हितू हरिकी हमेश प्यारी,
विधिकी सवाँरी प्रीति मुकर निवाहिनै ।
मैं तो तुवदोष रोष छाडिकै न काहू कहूं,
तुव करतूतको सराहन सराहिनै ॥ २३९ ॥

दोहा ।

टरजा मेरी नज़र सों, घरपै नेह निवाह ।
नईसौत तैहूं भई, गही अनोखी राह ॥ २४० ॥

पुनर्यथा-सवैया ।

हौं हितसों नित आदरसों, मन मान करी
अपने समताई । सुंदर भूषण अंबर अंगद, ये
निज प्रेमसों प्रीति बढ़ाई ॥ त्यों असकंद भनै
सखियों, परतीतकी आछीं प्रतीत लखाई ।

आइ न क्यों चल वेग भट्ट, किन सौतिन एती
अवार लगाई ॥ २४१ ॥

दोहा ।

तनु विलोकि अलि मद भरी, प्यारी चकितचितौन।
बलिहारी तुव छवि लखे, अवरसवाली कौन २४२
तनु विलोकि अलि मद भरी, बोलत वचन सम्हार।
करी सुरति पिय संगमिल, तोसी तुहीं गँवार ॥

पुनर्यथा-सवैया ।

मैं लखिकै तुव चाह बढ़ी, न मिलै तो हमें
का निहारती हौ । नई रीति कहूँ यह सीखी
भली, बिन दोष लगे मन डारती हौ ॥ असकंद
भनै जो न जाती तऊ, उठ आय श्रृंगार सँवा-
रती हौ । गुणएक न मानती येरी भट्ट तुम येतो
विचार विचारती हौ ॥ २४४ ॥

दोहा ।

सुवर सौत शालतनती, तू अब भई नवीन ।

(८०)

रसमोदक ।

गई कौन हित का कियो, चपल चतुर मतिहीन ॥

पुनर्यथा-कवित्त ।

करत शृंगार चारु मनमें विचार कियो,
तुरत बुलाई निज मतकी सलाहिनै ।
आइकह्योएकते सयानी तुव कौनिउविधि,
बांसुरी लिआव वीर नेक हमैं चाहिनै ॥
भनै असकंद आइ मिलकै लिआइ देखि,
मदन सताइदेत मदसों डराहिनै ।
काहेको गईती कौन काम करि आई सौति,
तूही नईएकभई और कोऊ नाहिनै ॥ २४६ ॥

दोहा ।

पियकी नीति अनीति यह, कौन लगावत खोर ।
मदन विवश आंधू परे, येरी जोवन जोर २४७ ॥

पुनः कवित्त ।

आवत नित यातेकहि आवत नरोंकी जात,
याते विनगुणकी हियमाल लसिबो करै ।

ताते पट चारों ओर ओढ़त सँभारवेश,
कंचुकी उरोजनपै अति कसिबो करै ॥
भनै असकंद मौज काम मदमाती मोहिं,
सौतिन सुहाती तुहिकौन हँसिबो करै ।
रहि बरसाने क्षपाकरके छिपाने आइ,
मजब गुजारनको ब्रज बसिबो करै ॥२४८॥

दोहा ।

को तोको या नगरमें, जानत नहीं गवाँर ।
पिय मन मोह्यो सौत तुव, छिपै न हियको हार ॥

पुनःकवित्त ।

चतुर सयानी भली चोप उर आनी हानि,
करति विरानी रीति कुमति सहीरी मैं ।
सजत श्रृंगार चली आवत अकेली द्वार,
निलज निहार लाज अधिक गहीरी मैं ॥
भनै असकंद अब नेकहू न आवै बनि,
मदन छकीले नैन देखत कहीरी मैं ।

(८२)

रसमोदक ।

हठ करि नेह कियो छैल छलियासों तुव,
बरज न मानी नेक बरज रहीरी मैं ॥ २५० ॥

दोहा ।

इत आवत उत जात नित, बरज रही सौवार ।
निलज लाज आवे नहीं, परपति रमत गँवार ॥

पुनर्यथा-कवित्त ।

आवै भोर साँझ हू न साँझ आवै कौनो विधि,
भावै मत जौन तौ नरोकिये कहाँ लौंरी ।
खोर खोर धावै मन गाहक बनावै रूप,
चाहक अनेक देखि देखिये जहाँलौंरी ॥
प्रत प्रत सरस समान तव येरी वीर,
भनै असकंद वेग पावत तहाँ लौंरी ।
निशिभर चाँदनीमें दिनभर भामिनीमें,
रतिकर कामिनीमें पावत बहाँलौंरी ॥ २५२ ॥

दोहा ।

कौन सिखाई सीख यह, परपतिसों रत हेत ।

पास परोसिनको अरी, काहे तू दुख देत ॥२५३॥

प्रेमगर्विताका लक्षण-दोहा ।

अपने पाति अनुरागको, गर्व करै कहि बाल ।

प्रेमगर्विता कहत हैं, तासों सुकवि रसाल ॥२५४॥

उदाहरण-कवित्त ।

परम अनूप रूप गुणको कलानिधान,

लखत न जौलों तौलों रहत सरोदमैं ।

प्रफुलित कमल परागहित भौर जैसे,

फिरत मदंध खोज करत सु मोदमैं ॥

भनै असकंद कोक कलन प्रवीण प्यारो,

सहज सयान कहै वचन विनोदमैं ।

प्रगट प्रमोद मुख मिलत सुचोप चहि,

लेत मुख चूम चूम छिन छिन गोदमैं ॥ २५५ ॥

दोहा ।

ल्याई सुमन परागयुत, जे हित मान अनेक ।

ते मन भाये एक नहिं, सरस नेहकी टेक ॥२५६॥

(८४)

रसमोदक ।

पुनर्यथा--सवैया ।

निशाकर देखि चकोरलौं चाह, करै नित नेम
सों आनँद ऐन । मनोहर हेलिनमें मिलिकै, कहै
प्रीति जनाइ सुहावनेवैन ॥ भनै असकंद सुमेरी
भट्ट, रहौं लाजभरी कहिवेमें लजैन । विलोकत
बारहिंवार श्रृंगार, लगाइ हियेमें करै चित चैन २५७

दोहा ।

पियेरहत नित प्रेमरस, किये रहत अतिनेह ।
लियेरहत करमन मुदित, वह वनश्यामअछेह ॥

पुनर्यथा--दोहा ।

भावै ठौर सहेट जो, परै न तौ मन चैन ।
अधिक रसीले मद भरे, कहे सौतके वैन ॥२५९॥
पिय मेरेको वश करै, सोई चतुर सयान ।
तोसी कहे गँवारके, क्यों उर आनहुँमान २६०॥

पुनर्यथा--दोहा ।

सौतैं सजैं श्रृंगार वर, नेक न देखत राह ।

पियको चाहति मोहने, चाह सु करती आह ॥

रूपगर्विता लक्षण-दोहा ।

होइ गुमान सु जासुको, अपनो रूप निहार ।
रूपगर्विता कहतहैं, ताको सुकवि विचार २६२ ॥

रूपगर्विता उदाहरण-सवैया ।

नइ देखी तुम्हारी अली यह रीति, भली जो
कहै तो बिगारतीहौ । तुम मानियो चाहै बुरो
जेयमें, यह टेक कुटेक न टारती हौ ॥ असकंद
मनै यह रूप गुमान में, कौन सयान विचारती
हौ ॥ कहै चंदमुखीके सुयेरी भट्ट, मनमोहनै
त्यो न निहारती हौ ॥ २६३ ॥

दोहा ।

याम न झूठ कहै कछू, विमल इंदुमुख ऐन ।
मनत वचन इमि बालतुव, करत तरेरे नैन २६४ ॥

पुनर्यथा-कवित्त ।

सघन सदाइ कुंज विटप घनेरे जहाँ,

(८६)

रसमोदक ।

दिवस न देख परै लेश आफतावको ।
होत निशि रहस मचावत अलीन संग,
सुभग स्वरूप बनो रतिके जवाबको ॥
भनै असकंद तहां घेरत चकोर पुंज,
झझकि छिपावै मुख करकै सितावको ।
प्रेम सरसात बात रसकी बतात प्यारी,
हँसि हँसि जात देखि शशि महतावको २६५॥

दोहा ।

कुंज समै खेलत अली, घेरत आन चकोर ।
हँसत छिपावत बदनको, देखचंदकी ओर २६६॥

पुनः—दोहा ।

प्रफुलित कमल विलोकिकै, भौर चहै रस लीन ।
कौन शोच जो कान्हने, मोहिं कियो लवलीन ॥

कवित्त ।

बालतनु मृदुल मनोहर विशाल सोहै,
उदित प्रभासी छटा छूट छवि छाजी है ।

मणिन जटित शुभ मंदिर अनूप तामें,
अधिक अनंदभरी सुखसों विराजी है ॥
भनै असकंद छके नयन चकोरनके,
कोटि मैनकाकी गति द्युतिमतिलाजी है ।
मुकुर विलोकत मुखारविंद जाको मन,
इंदुसम होत देखि सिंधु सम राजीहै ॥२६८॥

दोहा ।

दूरत कली गुलाब सखि, आबदार कर देख ।
दूरकि जात दल लाजवश, सरस आपते लेख ॥

कवित्त ।

मंजन तड़ागपै सहेली लै नवेली चली,
बोली हँसि येरी देख कौतुक सु एक आन ।
धूँवटके खोलत प्रकाश बज्यो तनु मुख,
शिखर सुमेर तापै चंद्रसों प्रकाश मान ॥
भनै असकंद भई चकही सु त्रासमान,
फूली कुमोदनी निशापति सुभास ठान ॥

(८८)

रसमोदक ।

कंज कुम्हिलान भौर भीर भहरान आइ,
प्यारी करकंज पास निपट सुआसमान ॥२७०॥

दोहा ।

मानि चंद मुख दंद सों, पंकज रहे लजाइ ।
देख सखी ममकरन ढिग, भौर लुभाने आइ ॥

पुनः—दोहा ।

क्यों अनखैबो सीखिये, क्यों मन दैबो वीर ।
हिये चकोरन चंदविन, कौन धरावत धीर ॥

मानिनी लक्षण—दोहा ।

जो पतिते मिस कौनहुं, त्रिया रहै अनखाइ ।
सुकवि वखानत ग्रंथमें, मानवती कहि ताइ ॥

कवित्त ।

सौहेंहो कहत नैन सौहें कर सौहें सुनौ,
रूठ आज बैठी तुम कैसी सुखसारमें ।
मिल नँदनंदसों अनंदकर आठौ याम,

सीख ठान मेरी छोड़ कुमति विचारमें ॥
 भनै असकंद देखि पावस प्रबल ऐसी,
 दादुर टकोरनसों मोरन प्रकारमें ।
 मान छुटिजैहै काम अधिक सतैहै मन,
 चैनहुं न पैहै वीर धनकी धुकारमें ॥ २७४ ॥

दोहा ।

पावसऋतु यह है भली, अली न सीख सयान ।
 घन घमंड आवै जबै, रहै नहियको मान ॥ २७५ ॥

पुनः दोहा ।

तजदे निरासयान यह, पिय सों मिलकर चाह ।
 देखि चांदनी चंदकी, नीके नेह निवाह ॥ २७६ ॥

दश नायिकाके नाम--दोहा ।

प्रोषितपतिका खंडिता कलहंतरिता नाम ।
 विप्रलब्ध उक्ता कही, वासकशय्या वाम ॥
 फेर स्वाधिनपतिका कहै, अभिसारिका सुहोइ ।

(९०)

रसमोदक ।

कही प्रवसतकप्रेयसी, आगत पतिका सोइ ॥
ये दश विधसों नायिका, वरणी नाम प्रमान ।
तिनके कहत उदाहरण, लक्षण सहित बखान २७९

प्रोषितपतिका लक्षण--दोहा ।

विरह विवश व्याकुल रहै, जाको पति परदेश ।
प्रोषित पतिका नायिका, ताहि कहत कवियेश ॥
मुग्धाप्रोषिता यथा उदाहरण-सवैया ।

न खेलै सखीनके संगहुं नेक, सुखानहुं पान न
एक सुहात। कहा भयो तोहि सु येरी भट्ट, हियकी
हम सो न कहै कछु बात ॥ भनै असकंद लजात
कछू, घनश्याम गये परदेश बतात । भरे दृग
वारि सु यों दरशात, मनौ जल में परेहैं जलजात ॥

दोहा ।

खेलत खेल नएकहू, परत अकेली आइ ।
भयो कहा भाभी तुहैं, तृण तोरत शिरनाइ २८२ ॥

पुनः बरवै ।

निशिदिन बाल सखिन सग करत विनोद ।
जब सुधि आवति पिय छिन रहत अमोद २८३ ॥

मध्याप्रोषितपतिका लक्षण ।

उदाहरण—कवित्त ।

कहत न बूझै सखी सांसनपै साँसभरै,
नीर बढ़ि वरुनीलों गिरन नपावैहै ।
त्रिविध समीर सीरी झोंकन लगत आइ,
परत न चैन ताहि विरह सतावै है ॥
भनै असकंद अंग अंगन अनंग बढ़ै,
इत उत देखि बाल मन वहटावै है ।
मुख जरदाइ आइ परत दिखाइ मनौ,
शीत भानु केसरको लेपन लगावै है २८४ ॥

दोहा ।

पति विदेश जबते गयो, विरह सतावत आइ ।
याकुल होत मनोजवश, बूझत कहत लजाइ ॥

(१२)

रसमोदक ।

प्रौढ़ाप्रोषितका उदाहरण-कवित्त ।

मदमति मेरे साथ ताही मन मोहनके,
छायो परदेश लई सुधि ना अरीवहै ।
प्रबल प्रचंड घन दिशान दबाये आये,
मदन पठाये आये कोकिला नकीब है
भने असकंद भौर गुंज करैं कुंजनमें,
कूक सुन केकिनकी तरसत जीवहै ।
नेकहू न चैन परै सुन सुन याके बैन,
बोलतहै पापि यों पपीहा पीव पीवहै ॥ २८६ ॥

दोहा ।

पिय विदेश हिय मंजु अति, विरह सद्यो नहिं जाइ ।
काम जगावत टेरकै, चातक सहज सुभाइ ॥ २८७ ॥

पुनः बरवै ।

मन समझावत आवत नेक न धीर ।
जब घन आवत घुमड़त येरी वीर ॥ २८८ ॥

पुनः सवैया ।

तुम आये सँघाती अकेले भले, ललिता उठि
बोली उतावरीसी । कबै आवै घरै मनमोहनजू,
भरै भौर सु भाभरे भाँवरीसी ॥ असकंद भनै
तुम ऊधो सुनौ, बतियाँये कहौ कछू लावरीसी ।
प्रिय पीतमतौ कुबजासों पगे, ब्रजकी वनिता
भई बावरीसी ॥ २८९ ॥

दोहा ।

ऊद्धव तुम कहियो दशा, मनमोहनसों जाइ ।
तुव बैशीकी धुनबिना, ब्रजवनसों दरशाइ २९० ॥

कवित्त ।

आई ऋतु पावसकी घन घहरान लागे,
दिशन दबाइ आये जल बरसाइकै ।
पाई ना खबरहू न मोहन पठाई कछू,
छाई उर प्रीति सौति कुबिजा रिझाइकै ॥
भनै असकंद धौं भुलानी सुधि या ब्रजकी,

(९४) रसमोदक ।

दीपक पतंगहूकी लगन विहाइकै ।
कोकिला कलापी शोर करिकै अलापै पापी,
कासों कहौ वीर दुख अपनो सुनाइकै २९१॥
दोहा ।

पावसऋतु आई अली, घन लागे वहरान ।
कुबिजावश माधव रहे, रहै सु किमि कुलकान ॥
बरवै ।

अब कासों का कहिये कहिनहिं जाइ ।
कुबिजाके रसवशमें रहे लुभाइ ॥ २९३ ॥
पुनःबरवै ।

बूंदन सों मग रूंदै ये घन घोर ।
विनती पियसों करियो तुमकरजोर ॥ २९४ ॥

परकीया प्रोषितपतिका--सवैया ।

गये श्याम विदेश सँदेश न आइ, अधीन भये
कुबिजासों पगे । अब कासों कहौ यों व्यथा

अपनी हमतो करि-प्रीति प्रतीत रँगें ॥ अति आइ
सुछंद कियो ऋतुराज भनै असकंद सप्रेम पगे ।
नवकुंजमें गुंजन भौरलगे औ रसालके झौरन
मौर लगे ॥ २९५ ॥

दोहा ।

जबते गये विदेशको, पठयो नाहिं सुदेश ।
मैं अपने मन को दहौं, कहा देउँ उपदेश ॥ २९६ ॥

बरवै ।

घन बरसों दिशि विदिशन लैकर नीर ।
आवै पथिक परोसिन होइ सधीर ॥ २९७ ॥

गणिकाप्रोषित-यथा सवैया ।

जौन कहौ कर आन दिखावत मेरीही वान
जदा निवह्योहै । भूषण अंबर अंगन अंग, शृंगार
इये अरु मान सह्योहै ॥ त्यों असकंद भनै सुधि
तोत, बढै विरहागन याद लह्योहै । मो मन

(९६)

रसमोदक ।

प्रीतम प्यारो पिया सखि, सोइ विदेशमें छाइ
रह्योहै ॥ २९८ ॥

दोहा ।

जातपलकपल दिवसनिशि, जनु विधिदिनसमएन।
मो मन प्यारे श्याम विन, रंचक परत न चैन ॥

खंडिता लक्षण-दोहा ।

औरनारिके चिह्नरत, लखै जु निजपति अंग ।
सुकवि बखानत खंडिता, ताहि तेह दुख संग ३०० ॥

मुग्धाखंडिताको उदाहरण-सवैया ।

चंदमुखी सखियानके संग, उमंग सों खेलतती
सुखसानिकै । ताहि समै नँदनंद लखे गरे माल
विना गुण कीरत आनिकै ॥ त्यों असकंद भनै
तबते, गयो छूट रहस्यको मोद सयानिकै ।
और सखीनलौं शोच रही चख भौंह कमानन
बानसे तानिकै ॥ ३०१ ॥

उच्छास १.

(९७)

दोहा ।

कहा देखिकै लालको, बाल रही अनखाइ ।
खेल न खेलै आपनो, वैन कहत सकुचाइ ॥ ३०२ ॥
हिय वनमाल विशाल छबि, पर तिय चिह्ननिहारि ।
परीसेज प्रीतम सहित, बाल भरे दृग वारि ॥ ३०३ ॥

मध्या खंडिताका उदाहरण-कवित्त ।

बैठी ब्रजबाल तहां आये नैदलाल भाल,
शोभित अनूपरेख जावक विशालहै ।
टेढ़े पेंच पाग पीक लीकहू कपोलनपै,
नैन अलसाने हिये विनगुण मालहै ॥
भनै असकंद ऐसी रचना विचित्र देखि,
दर्पण दिखाय बोली वचन रसालहै ।
हमतौ खुशाल भये निरखि तुम्हारो रूप,
करत निहाल जोपै अधिक निहालहै ॥ ३०४ ॥

(९८)

रसमोदक ।

दोहा ।

तुमसे प्रीतम पाइकै, को न होइ आनंद ।
रूप बनावत नित नयो, करत अनेकनछंद ॥ ३०५ ॥

प्रौढाखंडिताका उदाहरण-सवैया ।

तुम प्रीतम प्यारे हमारे सुनौमनभावती कौन सु
ऐसी ठगी । चित दै रतिमें हिय सों मिलिकै रसके
वशमें भली प्रेम पगी ॥ असकंद भनै अति चौगुनी
चाह, हियेमें करै सब रैन जगी । तुम कौनसे ठाम
रहे रतियां, बतियां कहिकै छतियां सों लगी ॥ ३०६ ॥

दोहा ।

पगी प्रेमवश लगी तनु, रही तुम्हारे लाल ।
कौन छबीली छैल तुम, ठगी कौन करि जाल ॥ ३०७ ॥
परकीयाखंडिताका उदाहरण-सवैया ।

बनी नीकी हिये बिच माल लसी, लखिकै
कहा दोष लगाइयेजू । यह आपनो भाग है का

कहिये, तुमको तौ नयो रस चाहियेजू ॥ असकंद
भनै अब योंही बनै हमको नहीं नेक सताइयेजू ।
हितसों मन प्रेम किये अतिही, जितरैन जगे
तित जाइयेजू ॥ ३०८ ॥

दोहा ।

भली कपोलनपै लसी, पानपीककी लीक ।
विनगुण माल हिये लसै, गिरे न उरझी ठीक ३०९ ॥

पुनर्यथा--सवैया ।

नेह कियो जबते तबते दिन, औ निशि नेक
हमैं न सुहायो।छोड़ दियो सब गेहको काम, सखीन
समाजमें नाम धरायो ॥ त्यों असकंद भनै यह-
रीति, करी हियदार नयो रसपायो । हेत कियो
इतनो तौ कहा, तुमतौ अपनो मन कीन्हों
परायो ॥ ३१० ॥

पुनर्यथा--दोहा ।

हमसों नेह घनो रहै, इतहीको नँदलाल ।

(१००)

रसमोदक ।

सरसप्रेम हियमें सुप्रत, राहविलोकत बाल॥३११॥

सवैया ।

कहिये कहा चूक नदान भये, जे नदान
सयान गुमान ठये । घर घेर करै सुन मौन रहौ,
रजनी जग लाल करें दृगये ॥ असकंद भनै छबि
छाजै भली, तुम आये अबै उरमाललये । मनदै
हम जाँचे न साँचे भये, तुम साँचे भये रँगराँचे
नये ॥ ३०२ ॥

दोहा ।

हम मनदै जाँच्यो तुम्हैं, तुम रँगराँचे और ।
पी पर होत न आपने, झूठी मनकी दौर ॥ ३१३ ॥

गणिका खंडिताकाउदाहरण-कवित्त ।

धोखेजिन काहूके न रहियो विहारी तुम,
भारी भ्रम जाल यो कहांते लैसँवारोहै ।
प्यारी यह सबते न्यारो यह बातनसों,
कौन नीको प्रेम जौन तुम उर धारोहै ॥

उल्लास १.

(१०१)

भनै असकंद रूप सरस सम्हारो वेश,
अति चटकारो तोहिं लगत न भारोहै ।
मानौ यह रीत कह्यो देखिये प्रतीत सुनौ,
नित उठि कल्पवृक्ष मंदिर हमारोहै ॥ ३१४ ॥

दोहा ।

भलो सम्हारो नेहको, बातनसों कर काम ।
कहा तुम्हारो नामहै, कल्पवृक्ष मम धाम ॥ ३१५ ॥

पुनर्यथा-सवैया ।

का कहिये छवि नीकी बनी, छुट छूटी
छटा मुख चंदप्रभातें । सौगुनो रंग चुयोईपरै,
प्रिय मालती फूलनके गजरातें ॥ त्यों असकंद
भनै हित सों कुछ देन कह्यो, न दियो इतरातें ।
भूलनकीजो कहूं कबहूँ, अब होचुकी श्याम सने
हकी बातें ॥ ३१६ ॥

दोहा ।

आये कित मनुहार करि, दै निज तुम मनहार ।

(१०२)

रसमोदक ।

छाये छवि रवि उदित लौं, नागर श्याम मुरार ॥

कलहंतरितालक्षण-दोहा ।

कलह करै मानै नहीं, हिये गुमान बढ़ाइ ।

फिर पाछे पछिताइ मन, कलहंतरिता गाइ ॥

मुग्धा कलहंतरिताकाउदा०-सवैया ।

तबतौ लखिनाइ गुमान कियो औ सयान
कियो कि बतायो नहीं । गुण एक न जेतेकरे सबरे,
मन कौन लईके मनायो नहीं ॥ असकंद भनै यह
कीन्ह्यो कहा, क्षणएकहू ताहि लुभायो नहीं ।
अब शोचती काहौ सुयेरी भट्ट, हमसों हँसिबो-
लती काहे नहीं ॥ ३१९ ॥

दोहा ।

कहा देखिकै श्यामको, मिली न तू भरि अंक ।

अब शोचे पाछे कहा, येरी वदन मयंक ३२० ॥

मध्याकलहंतरिता-सवैया ।

कहौ का करिये अब येरी भट्ट, अपनी कर-

तूतसे ऐसी घिरी।न भई कछु बात न स्वारथकी,
न रही कछु मैं मति ऐसी फिरी ॥ असकंद भनै
पिय आये घरै, पर पाँइन लौटगये सुघरी ॥ अब
कैसे मिलै वह प्रेमभरी, रहैं तो जसरी औरहैं
रसरी ॥ ३२१ ॥

दोहा ।

येरी मति बौरी भई, करी कहा अनरीति ।
कलह करायोजौन विधि, वहिविधि अब कर प्रीति ॥

प्रौढाकलहंतरिताका उदाहरण—

कवित्त ।

आये नँदनंद प्राणप्यारी ढिग प्रेम किये,
सब विधि मनाइगये बोलीहौं नचाइकै ।
ताही समै आये वन घुमड प्रचंड रही,
केकिनकी कूक सुनै मन पछिताइकै ॥
भनत अस्कंद अंग अंगन अनंग बाढ्यो,
देखत सखी सों कह्यो अति बबराइकै ।

(१०४)

रसमोदक ।

जानतु हैं रीत बात मेरिये हहालौ अब,
वेगहीं लिआउ प्राणपतिको मनाइकै ॥ ३२३ ॥

दोहा ।

पाँयन परत न रीझती, पीतम प्रीतिसराह ।
मान घटावत मान कह, काम बढ़ावत चाह ॥
पिया मनायो पाँय परि, मानी न कर सयान ।
सखी आपनी चूकलौं, आप परचो पछितान ॥

परकीया कलहंतरिता—सवैया ।

तजी कुलकान सु रीति सबै, यहप्रीति करी
सो हिये इमि ठान । परै न विछोह कहूं कबहूं, सो
परचो मति आपनी सो अब आन ॥ भनै असकंद
फिरै वनश्याम, घरै चलि आये कियो मैं अयान ।
मनायो न नेक लगी पछितान, कहाँ लै धरौ
ये ठिठाई गुमान ॥ ३२६ ॥

दाहा ।

धूक् उमंग जो प्रीतिकरि, रीति निबाही नाहिं ।

करत बनी एकौ नहीं, सो अब किमि सियराहिं ॥

दोहा ।

मनमनोजकी मौजमें, खोर लगावत कौन ।

करी कछू बनि ना परी, क्यों रहिये गहिमौन ॥

वरषन नीर लग्यो भट्ट, घन लागे घहरान ।

काम विकट पहरा लग्यो, हियते छुट्यो सयान ॥

गणिका कलहंतरिता-सवैया ।

कहा कहिये बनि नेक परी न, धनी घर आये ।

कियो मैं गुमान । चलेगये एकहू बात करी न,

फिरी मति ऐसी लगी पछितान ॥ भनै असकंद

सुयेरी भट्ट, तुमहूँनहिं रोंकि कियो सनमान ।

धरापर धूम करी धुरवान, घने घनकारे लगे

घहरान ॥ ३३० ॥

दोहा ।

कहा कुमति ठानी हिये, कियो धनीसों मान ।

फीको कर विन आरसी, कासों करौं सयान ३३१ ॥

(१०६)

रसमोदक ।

विप्रलब्धालक्षण-दोहा ।

केलिसदन पिय विन मिले, विरहविकल त्रिय होइ ।
विप्रलब्ध तासों कहैं, जे कवि पंडित लोइ ३३२॥
मुग्धाविप्रलब्धाको उदाहरण-सवैया ।

बाल सखीनके संग गई, नव कुंजन खेलन
खेल रहस्यको । देखत इयामविना वहधाम, रह्यो
मन नेक न नेहको चस्यको । त्यों असकंद भनै
कहै औ सुनै, दौर इतै उतै बोल अवश्यको ॥ यों
कह्यो बैठि निकुंजको वा दिना, काँटो करीलको
मोपद कस्यको ॥ ३३३ ॥

दोहा ।

कौन न आयो कुंजमें, सूनी परत लखाइ ।
धोखेसे इमि कहि उठी, रही सुमन सकुचाइ ३३४॥
मध्याविप्रलब्धाका उदाहरण-कवित्त ।

कंचन वरण साज भूषण प्रमोद भरी,

मंदगति सुचलि गयंदगति वारी है ।
 चंद्रवत आनन सुछंद मनमौजहीते,
 संगमें सहेली लिये अधिक पियारी है ॥
 भनै असकंद कुंज मंजुल विमल बीच,
 चाहकर कहत मनोज मतवारीहै ।
 हरी हरी ललित लताननिमें नाह कहूं,
 नजर करै तू कैसी नजर तिहारीहै ॥ ३३५ ॥

दोहा ।

नवयौवन बाला लखो, नवयौवनकर चाह ।
 कहूं हरी द्रुमलतनमें, अरी देखियतु नाह ॥ ३३६ ॥
 कुंजनमें गुंजन लखे, चञ्चरीकके जाल ।
 बिन हरि विरह विवश भई, कियो काम उरशाल ॥

सवैया ।

साजि श्रृंगार चली नवला, मुकतानकी माल
 हिये सह गुंजन । देखत आननकी छटा छूट,
 सुघेरलई है चकोरके पुंजन ॥ त्यों असकंद बढ्यो

(१०८)

रसमोदक ।

हिय काम, सुने मृदु भौर समूहके गुंजन । मंजु-
लतासि रही कुम्हलाइ, मिले वनश्याम करीलके
कुंजन ॥ ३३८ ॥

दोहा ।

निरखि कुंज ब्रजबालवह, गुंजत भ्रमर भुलाइ ।
मिले न श्याम विरहविवश, रही सुमन पछिताइ ॥

सवैया ।

ऐसो भयो न कहूं कबहूं, तुम जो लखो आपनि
आँखिन भूलहै । फूल रह्योहै गुलाबके बीच, सु
पंकजको मृदु मंजुल फूलहै ॥ त्यों असकंद भनै
यह कौतुक, आठहूयाम हिये विचझूलहै । गुंजरहे
अलि पुंजके पुंज, सु कुंज अली यह भूल न
भूलिहै ॥ ३४० ॥

दोहा ।

अरी सुहाई कुंज यह, अब न भूलिहै भूल ।
फूलत लख्यो गुलाब विच, पुंडरीकको फूल ॥

विप्रलब्धा प्रौढाका उदाहरण-कवित्त ।

चोप चसकीली भली चाल डुमकीली भ ठी,
 अति छमकीले पगपरत विशालहैं ।
 कैसी कटिकिंकिणिकी धुनि अतिप्यारी होत,
 तरनतरचोना कान अधिक रसालहैं ॥
 भनै असकंद भई भेट ना सहेटहू में,
 बालकुम्हिलानी जैसे फूलनकी मालहैं ।
 आँसू गिरे कुचपै दुईशपै चढ़ाये मनो,
 दृगदल पंकजसे मोतिनके जालहैं ॥ ३४२ ॥

दोहा ।

थल सूनो लखि छाइ दुख, बहि आँसू कुच आइ ।
 जलज जाल दृग कंजजनु, दये गिरीश चढ़ाइ ३४३

पुनः-कवित्त ।

लहलही ललित निकुंज द्रुमवेलिनसों,
 छाइ छवि मुदित मनोहर महा मजेज ।

(११०) रसमोदक ।

तैसी शुभ शीतल समीर धीर सौरभसों,
शोभित समोद शीत भानको उजास तेज॥
भनै असकंद गई विहसत वेग तहां,
कामवश सखिन सहेट तज लाजलेज ।
ह्वैकर रिसौहै तिरछौहै कर तीषे नैन,
मंद भइ विवश विलोकि सुख सूनो सेज ३४४
दोहा ।

फूले अनफूले पुहुप, परे अवनि किहि हेत ।
निपट पीव अनरीतियह, विरह काम दुखदेत ३४५
परकीया विप्रलब्धा-सवैया ।

रूपवती करकै ज्यों शृंगार खड़ीभई गेहके
द्वारपै आइकै । ताही समै असकंद भनै ब्रजना-
रिन संग लियोहै लिवाइकै ॥ प्रीति बसी हियमें
घनश्यामकी, आतुरी सों चली प्रेम बढ़ाइकै
जाइकै देखत कुंजनमें न मिले, पछिताइ रही
सुरझाइकै ॥ ३४६ ॥

उल्लास १. (१११)

दोहा ।

खेलै खेल सखीन सँग, मन नहिं लागत नेक ।
विरह बढ़यो अतिप्रेमवश, भई न मनकी टेक ३४७

गणिका विप्रलब्धा-सवैया ।

प्रेमपगी बतियां कहिकै, रतियां चितमें अति
चोप चढ़ायो । सौंह दिवाइ हहा करिकै हमैं कुंज-
नकी मग दौरि पढ़ायो ॥ त्यों असकंद भनै
मिलिबो ठहराइ भलो यह नाच नचायो । आयो
न आप रझो कित भूल सु दूसरे दू न मनोरथ
प्रायो ॥ ३४८ ॥

दोहा ।

अपुनमिल्योमीतनमिल्यो, नकरमिल्योकछुआज ।
वृथा झूठ बोलत ठगी, करआई सुखसाज ॥ ३४९ ॥

उक्तालक्षण-दोहा ।

चिंता हिय आयौ नहीं, किहि कारण पिय आज ।

(११२)

रसमोदक ।

केलिसदन शोचत मनै, उक्ता कहि कविराज ३५०

मुग्धाउत्कंठा उदाहरण--कवित्त ।

रजनी व्यतीत युग यामहुं न आये पीव,
प्रकटन लागी यों प्रभात द्युति नीकीहै ।

कैयों कोऊ बालने लियोहै मन मोहि रहे,
रसवशहैकै करे ताके मनहींकीहै ॥

भनै असकंद द्वार झाँकत सुछाँह देखि,
कहत सहेली सों न बात मतिहीकीहै ।

विरह व्यथाकी कथा गोवत सयानी पर,
कछु कुम्हिलानी देखि चंद्रप्रभा फीकीहै ३५१

दोहा ।

रजनी चारहु यामलौं, पिया न आये गेह ।

मन पछितात सखीनसों, प्रगट न करै सनेह ३५२

झुकत प्रेमवश रुकत नहिं, तकत तिरीछे द्वार ।

किहि कारण दग जलजतव, उझकत पलक निवार ३५३

मध्याउक्ताका उदाहरण—कवित्त ।

पथिक निवास कीन श्रमको विनाशकीन,
 सुजन शिवास कीन कुंजन गलीनभो ।
 पक्षिन सु वृक्षलीन कुलटा सुगच्छकीन,
 दीपतन स्वच्छकीन प्रगट अलीनभो ॥
 भनै असकंद वेश झिल्ली झनकार कीन,
 चीन्हसमै नितको सु चक्रवाक दीनभो ।
 अस्ताचलमध्य विवरविको सुलीन देखि,
 कमल कलीनभो सु भ्रमर मलीनभो॥३५४॥

दोहा ।

दिंवस व्यतीत सु याम युग, भयो विवरविमंद ।
 परवशह्वै हरि हेसखी, रहे और नहि छंद॥३५५॥

पुनःसवैया ।

कबहुं परयंकपै पौदिरहै, कबहुं उठिखोलि
 किंवारे रहै । कबहुं इतते उत भौन फिरै, कबहुं
 खड़ी आइ दुवारे रहै ॥ असकंद भनै हियमौज

(११४)

रसमोदक ।

बढ़ै, तब आपनो गात सम्हारे रहै । मनमोहन प्रेम
पगी कबहुं, खिरकी लगी वाट निहारे रहै ॥ ३५६ ॥

दोहा ।

इंदु परत फीक्यो लख्यो, बाला मंदिर माहिं ।
घरी घरी इत उत चितै, तकत आपनी छाहिं ३५७

प्रौढ़ाउक्ता उदाहरण—कवित्त ।

कौन कहौं नेकहूँ न आवै बनि कासों कहौं,
तो सिवाइ ऐसी हितू और न निहारिये ॥
भनै असकंद तूतो चतुर सयानी देख,
चंदभयो मंद दुख कौनविधि टारिये ।
काम बढ़यो अधिक न चैन परै एकौक्षण,
नींदहू न आवै जोपै मुरत विसारिये ॥
रजनी व्यतीत होत सौतिन प्रतीत करि,
प्रीतम न आये वीर शकुन विचारिये ॥

दोहा ।

शकुन विचारि कहौं सखी, प्रीतमकी रसरीत ।

बढ़ीअधिक कै छुटी कछु,सौतिनकी परतीत३५९
 शरदरैन सुखदैन यह, विरहजननकी आश ।
 ज्यों नभसरके कंजमहँ, मधु फँसि रह्यो निराश ॥

परकीयाउक्ति—कवित्त ।

ढूँढ़फिरी कुंजनकी खोर खोर चारों ओर,
 नेकहू न पायो खोज सबरस लीन्हेंको ।
 बैठगई श्रमित सुनैन भरि अंबुजसे,
 पायो फल कामकी मवास मन दीन्हेंको ॥
 भनै असकंद गईरजनी व्यतीत तापै,
 हिये पछितात बही प्रीतिरीति चीन्हेंको ।
 मनकी उमंग मै न जानै कित भूलिरह्यो,
 दोष कहा दीजिये सुमन वशकीन्हेंको॥३६१॥

दोहा ।

इम आनी उर प्रीति अति, इयाम न मानी नेक ।
 नैन गई यहि शोचवश,सौतिन करी कुटेक॥३६२॥
 शरवर अलिवर मंजुकर, वरतर धर पट वार ।

(११६)

रसमोदक ।

मुरि अरि हर परखत निडर, भरभर साँस विहार॥

गणिकाउत्कंठिताका उदाहरण-

सवैया ।

कौनके फंद परचो प्रियप्रीतम, बीतगई निशि
एक घरीसी । मोमन हारगयो निरमोहितै, गोहितै
जोरकै यों कहैरीसी ॥ त्यों असकंद मनोजकी
डोरन नेह जँजीर बना जकरीसी । कुंजकी
खोरनि खोरनमें सुभ्रमै, ब्रजवाल भई चक-
रीसी ॥ ३६४ ॥

दोहा ।

मो मन हारगयो रह्यो, किह मोहीवश जाइ ।
बार बार सखियानसों, कहै बाल अनखाइ ॥ ३६५ ॥

वासकशय्या लक्षण-दोहा ।

निश्चय पिय आवन समुझि, जो त्रिय करत शृंगार ।
सेज रचै हुलसत हिये, वासकशय्या नार ॥ ३६६ ॥

मुग्धावासकशय्याको उदाहरण- कवित्त ।

आवन विलोकि चारु समय मिलाय बाल,
अलि कचकारे लखि मुकुर सुधारे हैं ।
जेहर पगन श्रुति भूषण सम्हार कटि,
किंकिणि विशाल करे नैन कजरारे हैं ॥
पिय मन फाँदिवेको नथको फँदासों रोंपि,
भनै असकंद मुख अमित विचारेहैं ।
मोतिनसों माँग ज्यों सम्हारत सहेली निज,
मानौ तम फारि उये आवत सितारेहैं ॥३६७॥

दोहा ।

तलज अच्छ करकंजसों, गूँधत माँग सँवार ।
नौ उअत तम फारिकै, तारेबाँधि कतार ॥३६८॥

पुनः-सवैया ।

साजि श्रृंगार सबै तनुमें, मनमें सुखमानिकै

(११८)

रसमोदक ।

आनँद दीजो । सागर रूप निहारि गुविंदको,
प्रेमप्रवाह सुधारस पीजो ॥ तानि कमानसी भौंह-
नको भनि, त्यों असकंद यही गुण कीजो ।
बैनन नैनन सैनन ऐन, सुकाम बढ़ाइ वशी करि
लीजो ॥ ३६९ ॥

दोहा ।

सेज साज आनँद करौ, मनसिज हिये बढ़ाइ ।
इमि समुझाइ सखी चतुर, आवन पियहि सुनाइ ॥

मध्यावासकशय्याका उदाहरण—
कवित्त ।

सजत श्रृंगार पिय आवन विलोकि बाल,
ढीठ दिये मोहनके पियरे पटानपै ।
तैसे श्रुति भूषण प्रभा कचमें दीप्तवान,
जैसे विज्जुछटा छूट घनन घटानपै ॥
भनै असकंद मंजु अधरन विंबवार,
अहिके कुमारवारे लटकी बटानपै ।

उल्लास १.

(११९)

भालमध्य बेंदावान पन्नालाल तापै मनौ,
पंचशुक बैठे नवसुंदर अटानपै ॥ ३७१ ॥

बरवै ।

पूजे श्रृंगार नवेली पियहित हेत ।

बेहसत सहज सखिनसों सरस निकेत ॥ ३७२ ॥

पुनःकवित्त ।

ठाढ़ी अटापै नँदनंदनके हेत प्यारी,

चंदसों बदन चारु शोभा अति ताकीहै ।

सोहै सुवेश ललित हीरनके हार गरे,

ताके बीच बीच एक लर मुकताकीहै ॥

भनै असकंदमणिजटित तरयोना कान,

भानसे प्रकाशमान उपमा न वाकीहै ।

दृगन चलाकी लाज काम मद छाकी देखि,

चंचलता ताकी मंदगति चपलाकीहै ॥ ३७३ ॥

दोहा ।

।रस नवेली समुझ मन, पिय आवत ममहेत ।

(१२०)

रसमोदक ।

करि श्रृंगार साजत भई, नीकी विधि संकेत ३७४

प्रौढ़ावासकशय्याका उ०-कवित्त ।

रचि रचि करत श्रृंगार अलबेली नारि,
मुखकी प्रभाते गयो मंडल प्रभासों भर ।
मोतिनकी माल उर शोभित विशाल जाके,
लालशा हियेमें पिय मिलन कन्हाइ पर ॥
भनै असंकंद अति मनमें हुलास करै,
अंबरतरातरसों बैठी परयंकपर ।
भालमध्य बेदादेत चौंकत चकोर जबै,
चंद भयो मंद औ दिखानलाग्यो प्रभाकर ॥

दोहा ।

मिलन मनोहर पीयहित, सजे बसन अँग अँग ।
मुदमदंध झूमन लग्यो, ताको सुमन मतंग ३७६ ॥

पुनःकवित्त ।

कंचनलतासी मैं निकासी औ प्रभासी भासी,

मुखछवि खासी दीप्त दीपत मयंकमें ।
 बोलत सुधासी अंग भूषण विलासी साज,
 मंदिर मवासी लसी सहित निशंकमें ॥
 भनै असकंद सुख साहस मनोज भरी,
 आनपरी आनंदसों प्यारी परयंकमें ।
 एक कर पाटीतर सरक परचो सो मनौ,
 अचरजविशेष भयो पंकजन पंकमें ॥३७७॥

दोहा ।

आज परी परयंकपै, प्यारी रूपरसाल ।
 इयप्रमोदरतिवनी अति, मिलनचाह नंदलाल ॥

परकीया वातकशय्या-कवित्त ।

तनु सुकुमार मुखछवि अनुहार कियो,
 मेरुके शिखरमें सुवास मनइंदुको ।
 जमिकर मृदुल मुहाइ अरुणाइ वेश,
 केश घुघुरारे वारे वन अरविंदको ॥
 भनै असकंद गुंथी वेणीकी नजीर नाहिं,

(१२२)

रसमोदक ।

बटन न पाइ ताते गतिका फनिंदको ।
ठाढीयों अटापै घटाहेत लसै दामिन ज्यों,
चाहकर देखै त्यों उछाहसों गुविंदको ॥ ३७९ ॥

दोहा ।

दामिन घन चाहत जितो, तितो हिये आनंद ।
सजि श्रृंगार डरपत लखत, सुमग गोकुलानंद ॥

गणिकावासकशय्याका उदा-

हरण-सवैया ।

सजी जेहर जेब नये विधिकी, पग एक मनो-
रथ नेम धरचो । लसती पहुँची करमें मनकी,
शुभ भाँतिन हारहिये पहिरचो ॥ असकंद भनै
डर तेहनिवाह, मनोजके काज श्रृंगार करचो ।
जब बेंदा लिलाटमें बाल धरचो, रवि ज्यों शङ्खिके
वशआनपरचो ॥ ३८१ ॥

दोहा ।

अँग अँग सजे श्रृंगार सब, श्रुतिभूषण द्युतिहीन ।

उल्लास १.

(१२३)

बुंवनलों लखिआइ पिय, देइ मैगाइ नवीन ३८२
कवित्त ।

आवन विलोकि श्याम साजे तौ श्रृंगार सबै,
आरसी विहीन कियो करहित लेनके ।
अंबर अतर तर सौरभ प्रबंधनके,
अमित अनूप भूर रतिरस देनेके ॥
भनै असकंद किये कंचुकी हरीमें कुच,
उदित प्रकाश मनहरन सुमैनके ।
चंदमुख देखि दबे समिट सुकंज मनौ,
मंजु मंजु जाय तरे पल्लव पुरैनके ॥ ३८३ ॥

दोहा ।

मेलन मनोरथलेन घन, सजे सुमन रचि सेज ।
ठी तनु सौरभ सरस, मंदिर मुदित मजेज ३८४

स्वाधीनपतिकालक्षण—दोहा ।

तहिके नायक वशरहै, तन मन धन कर सोइ ।
वि कोविद सब कहतहैं, स्वाधिनपतिका सोइ ॥

(१२४)

रसमोदक ।

मुग्धास्वाधीनपतिका-कवित्त ।

पावसऋतु आई यह अधिक सुहाई बीर,
वैनमृदु बोलत पपीहा सुन हाँक हाँक ।
पंक भयो मगमें निशंक धुन दादुरकी,
बादर बिरादरसों आये नभ ठाँक ठाँक ॥
भनै असकंद निज औसर विचार छोटे,
बुंदवरवान तान इंद्र धनु बाँक बाँक ।
ऐसे में विहारी खड़ो तेरे हेत प्यारी अब,
लखि तू झरोखन है झुकि झुकि झाँक झाँक॥
दोहा ।

भीजत ठाढ़ो नीरमें, बनवारी तुवहेत ।
कीन्हों वश रसरूपते, दरश न काहे देत॥३८७॥

पुनर्यथा-सवैया ।

अवै मानो कही नहिं छेंडौ हमें फिर कैसे
सुतौ जिय धीर धरै । बतियाँ जो कहौ मनमौज
भरी, विनहीके लगे चित कैसे भरै । असकंद भनै

हमसों न करौ तुम ऐसी हँसी इतनो न डरै । कहै
वाँह की छाँह न पैहौ चहौ, पछितैहौ अबै भजि-
जैहौ घरै ॥ ३८८ ॥

दोहा ।

पाँइन आइ परै पिया, नेक न करत प्रतीत ।
तुम्हैं कौनने सीख यह, दर्ई अनोखी रीत ३८९ ॥

मध्या स्वाधीनपतिका उदाहरण—

सवैया ।

वश कीन्हों अनंग भरी सकुचान, दबी मुस-
क्यानको ताकेरहै । छविसिंधु कपोलन गाढ़परै
तिहवार पियासे सुधाके रहै ॥ असकंद भनै दृग
वारिजहौ दृग जोर मलिंदसे वाके रहै । मुखचंद्र-
प्रभा लखि थाकेरहै ब्रजचंद चकोरसे छाके रहै ॥

दोहा ।

तुव निजगृह प्रविसत भटू, बाहर नंदकिशोर ।
हिमकरघनविचछिपत लखि, जिमि पछितात चकोर ॥

(१२६) रसमोदक ।

प्रौढ़ा स्वाधीनपतिकाका उदाहरण— कवित्त ।

कीन्हीं रति नागर नवेली नटनागरसों,
एकनमें एकरूप अमित सहायोहै ।
बैठे परयंकपै प्रमोद भरे दोऊ आइ,
टूट्यो हियहार देखि कौतुक मचायोहै ॥
भनै असकंद लागि वेगही सुधारनसो,
कारण विचार सखी वचन सुनायोहै ।
तुम जो सुधारो प्रिय प्रीतमकी पागटेढ़ी,
नीकी विधि श्याम तौलों सरस बनायोहै३९२
दोहा ।

सजे झुँगार बनाइ सब, अंग अंग तुम चाह ।
जावक कौन दिवाइहौ, येहो प्रीतम नाह॥३९३॥

पुनः—कवित्त ।

नागर नवेली अलवेलीमें निकासी भासा,

मुखद्युतिसे खासी उपमान मान टारेहै ।
 चपल कहि टाक्षनसों मोहनीसी डारि भारी,
 मृदु मुसकानलौं अधीन कर डारेहै ॥
 भनै असकंद ब्रजराज आश जक्त करै,
 सोई मन आश हिय रहत विचारेहै ।
 प्रीति चित धारे रहै रूपको निहारे रहै,
 वशमें विहारे रहै निशिदिन वारेहै ॥ ३९४ ॥

दोहा ।

जो अलि चाहै दिवस निशि, वोही चाहै लाल ।
 देखि कंज लाल जन दबै, नैनमैनके जाल ॥ ३९५ ॥

परकीयास्वाधीनपतिका का
 उदाहरण—सवैया ।

जगजाहिर प्रीति सनेह बुरी, जो लगै हियमें
 फेर कैसे टरेनि शिवासर चैन परै न कछू, विनदेखे
 नयो किमि धीर धरै । असकंद भनै ब्रजकी

(१२८)

रसमोदक ।

बनिता घरघेर करै मन मेरो डरै। हम नेकहु मानै
न जाव घरै, बृथा कौन तुम्हारी प्रतीति करै॥३९६॥

दोहा ।

इयाम प्रीतिकी रीति यह, कठिन जगत बतरात।
नगर चवाई मन डरै, तुम्हें न कछु दिखात ३९७

गणिकास्वाधीनपतिकाकाउदाहरण—
सवैया ।

निशि वासर संग बनोही रहै जित चाहिये दौर
पठाइयेजू । विनमेरे कहे कछु काम करै न,
सुक्योंकर दोष लगाइयेजू ॥ असकंद भनै सुख
एक बड़ो जो चहै मन वेगही पाइयेजू । हम मान
न वासों करै सजनी, हमें सीख न ऐसी सिखाइयेजू ॥

दाहा ।

रहै संग जो चाहिये, वेग देतहै आन ।
कहुसखि ऐसे मीतसों, क्योंकर कीजै मान ३९९ ॥

अभिसारिकालक्षण-दोहा ।

करि शृंगार विलसन चलै, नायक पहुँ चितचाह ।
कै बुलवावै आपठिग, अभिसारिका सराह ॥४००॥

मुग्धाभिसारिकाका उदाहरण-कवित्त ।

देखैं आज कुंजन में आवो सखी फूले फूल,
या कहि लिवाइ गई आपनेही साखसों ।
घेरीगई कुंजनमें विहँग अनेकनसों,
फिरत मुख भेट भई मोहन कजाखसों ॥
भनै असकंद लखै कौतुक अनूप जबै,
देखों मुख प्यारी तेरो बोली यों मजाखसों ।
इंद्र धनु भ्रुकुटीसों दृगसों मृगी लजाइ,
नव्वेजुगवार जबै ऐंचै पंचशाखसों ॥४०१॥

दोहा ।

कुंजन गई लिवाइकै, आइगयो चितचोर ।
शोलत मुख अमवश भये, देख दुचंद चकोर ॥

(१३०)

रसमोदक ।

पुनर्यथा-कवित्त ।

शोभित अनूप कुंज सागर समेत जहाँ,
लाल गुणआगर नित आवत मंजहै ।
आभा वहाँकी छवि वरणी बनाय कैसे,
विरह नशाय नेक रहत वरंजहै ॥
भनै असकंद ऐसो उदित प्रबंध तहाँ,
कोक पिक चातक मयूरगण खंजहै ।
परश समीर काम सरसत अंग अंग,
गरजत भौर रस वरषत कंजहै ॥ ४०३ ॥

दोहा ।

रहे श्यामघन थकित हैं, नीर अवतने पर डार ।
अलि गरजत कहि साथलै, वरषत कंज अपार ॥

मध्याभिसारिकाका उदाहरण— कवित्त ।

अति अनुरागी बाल श्यामके सनेह पागी,
लखि निशि प्यारी देखि हीयके भुलाने दंद ।

जाति चली आतुरी सों रूपरत चातुरी सों,
मति करखातिरी सों मनमें हुलासवृंद ॥
भनै असकंद युग तरन तरचोना वेश,
गिरत मही में एक जान्यो यों गयोहै छंद ।
कचकोसराहु ठान अतिभयमान मनौ,
रविमें छिपानो जात पूनोको अरध चंद ॥

दोहा ।

हैं चकोर चौचध मची, खिले फूल शशिरात ।
हैं मग मृगनैनीनके, मनहिय जात लजात ४०६॥

प्रौढ़ा अभिसारिकाका उदाहरण—
कवित्त ।

अंबर अतर तामें अंबर कराये तर,
अति रस मौजभरी यों चली सजीरमें ।
विंव लजे कोमल सुधाधर अधर देख,
चौंकत चकोर मुख चंदकी नजीरमें ॥
भनै असकंद करकंजके लखे ते भौर,

(१३२)

रसमोदक ।

दौर दौर आवैं कहूँ नेकहूँ न हीरमें ।
कुहै कुहै करत कलापी करि राते नैन,
प्यारी मनमोहनके जुलफ जँजीरमें ४०७ ॥

दोहा ।

अंबर कर तर अतरसों, चली सुपियहितहेत ।
रोकी विहँग अनेक यहि, पहुँची तदपि निकेत ॥

परकीयाअभिसारिकाका उदाहरण—
कवित्त ।

नवल सनेह सनी रजनी विलोकि घनी,
गैल लई वृन्दावन कुंजलतकानकी ।
भनै असकंद धिरी मोरन चकोरनमें,
नेकहू न वाको रही खबर सयानकी ॥
दौरत मंदंध मतवारेसे मलिंद आये,
पंकज समान लखे छवि करपानकी ।
प्यारी मुख चंदचारु देखिवेते मंद भई,
दीप चंदमंडलमें षोडश कलानकी ॥ ४०९ ॥

उल्लास १.

(१३३)

दोहा ।

रवि देखे ज्यों दीप द्युति, दीपहि माहिं दिखाइ ।
त्यों मुखदेखे चंद द्युति, छिपी चंद महँ जाइ ४१०

गणिका अभिसारिकाका उदाहरण—
कवित्त ।

कंचन सों वरण मृदुबाला मदनकैसी,
ओढ़िकै दुशाला निज मंदिरते कियोगच्छ ।
जात चली मगमें गयंदगति मंद मंद,
देखे मुखचंदकी छिपानी द्युति परतच्छ ॥
भनै असकंद मनहरन मुनीनहूके,
अंबुज अमलदल लोचन सुहाये अच्छ ।
मोरपक्ष वारे संग जाइ मिली रैनि प्यारी,
बातनकी दच्छ औ, सनेहिनकी कल्पवृच्छ ॥

दोहा ।

जाइ मिली नंदनंदसों, प्यारी हितहि लगाइ ।

(१३४)

रसमोदक ।

हिये हजारनके हरै, ताहि सुलई रिझाइ ॥ ४१२ ॥

पुनः—सवैया ।

रूप अनूप सवाँरि शृंगार, चली मुख पान
जमाइ धड़ीनई । जाइकै नेक उरोज छिपाइकै,
चोप चढ़ाइ कटाक्ष अड़ीलई ॥ काचहौ त्यों
असकंद भनै, पियने कह्यो रैन अबै दोषड़ी गई ।
चौकिकै चारहुँओर विलोकिकै घासकी राशिके
पास खड़ीभई ॥ ४१३ ॥

दोहा ।

अति सप्रेम पियढिगः गई, पिय हित लखिमति ठान ।
हीरनको कर हार गहि, खड़ीभईमतिगान ॥ ४१४ ॥

चंद्राभिसारिकाका उदाहरण—

सवैया ।

करकै विचार लागी करन शृंगार रूप, रति-
अनुहार प्यारी अतिरस मौजमें । हीरन जड़ित

उल्लास १. (१३५)

वरभूषण सवॉरि अंग, ओढ़ि श्वेत सारी कसि,
कंचुकी उरोजमें ॥ भनै असकंद तैसी कूक
कोकिलाकी सुनि, धीरना धिरानी भयो मनवश
मनोजमें । ह्वैकै अनंद नंदनंदनसों मिलन चली
चंद्रकी विशाल देखि कौमुदी मनोरमें ॥ ४१५ ॥

दोहा ।

इंदुकौमुदी मंदह्वै, रही चंदमुख पेश ।
चकित चकोर भये हिये, मगदुचंद अवरेश ४१६ ॥

कवित्त ।

मंजनकै खंजनसे नैननमें अंजनदे,
मुनिमनरंजन मनोज मतवारी है ।
अंग अंग हीरनके भूषण सवॉरिवेश,
अलक सुधारि वेणी बनक सँवारी है ॥
भनै असकंद हिये अधिक प्रमोद भरी,
आली लै निशंक संग भौंर भीर भारी है ।

(१३६)

रसमोदक ।

ओढ़ि नीलसारी तैसी रैनि अँधियारी चली,
जाति बनवारीपै सुझ्याम घटावारी है ४१७॥

दोहा ।

निशि अँधियारी रैनिमें, प्यारी मदन अधीन ।
जात चली आली सहित, वारीरँगमें लीन ॥ ४१८ ॥

दिवाभिसारिका-कवित्त ।

हेतनँदनंदनके अधिक अनंदभरी,
जात चली कुंजनमें हंसिन लखे लजात ।
वदन अनूप रही छविकी छटासी छूट,
भूषण प्रकाश लसै शोभित प्रसन्न गात ॥
भनै असकंद होत नूपुर मधुरधुनि,
जेहर जटित मणि कौतुक सु यौं दिखात ।
अरुण विशाल पग जहँ जहँ धर्त प्यारी,
हाथ तीन चारकलौं चूनरसा होतजात ॥

दोहा ।

मणिनजटित जेहर लसै, भलो मिलयो सतसंग ।

धरत अरुण पग जहाँ जहँ, होत चूनरी रंग ॥

पुनः—कवित्त ।

प्यारी रसरंगमें विनोद भरी आनंद सों,
जात चली मानो मत्त गयंद लजातीहै ।
चकित चकोर भौर अवली सुचारों ओर,
भनै असकंद मुख मोरि रुकिजातीहै ॥
करन तरचोननकी अमल कपोलनपै,
द्युतिवरपांति परे अधिक सिरातीहै ।
वरण छिपाइ मनौ दिनकर किरण आइ,
मंजुल विमलकंज परस विलातीहै ॥ ४२१ ॥

दोहा ।

करन तरचोननकी झलक, परत कपोल जाहिं ।
मनो तरनकी किरण मृदु, पंकज परस सिराहिं ॥

प्रवस्तक प्रेयसी लक्षण—दोहा ।

सुनै गवन पतिकोकिलखि, परदेशहिको जाइ ।
कहत प्रवस्तक प्रेयसी, होइ विरहदुख ताइ ॥ ४२३ ॥

(१३८)

रसमोदक ।

मुग्धा प्रवस्तकको उदाहरण- कवित्त ।

जबते सुनीहै तुव चलन विदेश बात,
खानपान हँसन बतानहुं बिसरिगो ।
हरिगो प्रमोद सखियान संग खेलै जौन,
भरिगो दृगन बारि वरुणी ठहरिगो ॥
भनै असकंद लाज विवश कहै न वैन,
कामवश वाको मन तेरही वगारिको ।
कान्ह चलिदेखौ वह फूलकैसी मालवीच,
गवन तिहारो कामशरसों निकरिगो ॥४२४॥

दोहा ।

अरी परी पीरी कहा, पिय न जात सुन बात ।
बीरी मुख साहस भरी, देरी देख लजात ॥ ४२५॥

मध्याप्रवस्तक प्रेयसीका उदाहरण- सवैया ।

कान्ह चलो चहै द्वारकाको सुनि राधिकाके

उल्लास १.

(१३९)

उर पीरसी बाढ़ी । भूलगई सबै अंग श्रृंगार, तरंग
अनंग उठी अतिगाढ़ी ॥ मालिन लाइ गुलाबकी
माल भनै असकंद सम्हारकै काढ़ी । मेलिदई पियके
हियमें चख जोरत मोरत है रही ठाढ़ी ॥ ४२६ ॥

दोहा ।

है जबते देख्यो कह्यो, अधिक बढ़ायो हेत ।
नैनन नैन मिलाइकै, झोरमोरको देत ॥ ४२७ ॥

प्रौढ़ाप्रवस्तकप्रेयसी-कवित्त ।

वकवर पुंजदेखौ उड़त अकाशहूँलौं,
विटप पहाड़पै मयूर कूक दरसै ।
पापीयो पपीहा पिय आगम सुनायो आइ,
बोल कोकिलाहूके सुधासमान सरसै ॥
भनै असकंद ऐसी पावस प्रबल देखि,
निकसै न कोऊ कहूँ आपनेहु घरसै ।
अबतौ पयान परदेशको न कीजै कंथ,
मेघमतवारे ये झलापै झला वरसै ॥ ४२८ ॥

(१४०)

रसमोदक ।

दोहा ।

बोलत मोर पपीहरा, वैन सुअति मदजोर ।
वरसतहैं घनघोर ये, चलत समीर झकोर ४२९॥

परकीया प्रवस्तकप्रेयसीका

उहाहरण-कवित्त ।

अंक भरि पौढ़े परयंकपर दोऊ आइ,
शंक कर बाल हिये अति सकुचातिहै ।
बंक कर सैन औ निशंक क्षणएकहूना,
रसवश हैकै कछु कछु अलसातिहै ॥
भनै असकंद देख रजनी व्यतीत पीत,
पट पियराइ देखि मन पछितातिहै ।
ज्यों ज्यों रविमंडल प्रकाशमान होत त्यों त्यों,
प्यारी मुखचंदपै ललाई होतजातिहै ॥

दोहा ।

बोलउठी तिय पीवसों, भरिदृग वारिज नीर ।
तजि विदेशको गवन अब, पीरहरण बेपीर ४३१॥

परकीयाप्रवस्तकप्रेयसी-कवित्त ।

आई ऋतु पावसकी अधिक सुहाई चले,
पवनझकोरै कूक कोकिला सुनावैहै ।
मधुर मयूरनेके वचन सुहाये सुनि,
हिय हुलसात जिय प्रेम सरसावैहै ॥
नेहको लगाइकै विदेशको न कीजै गौन,
भनै असकंद दूंददादुर मचावैहै ।
झूम लागी मुदित धरापै धुरवान धूम,
उमड़ घुमड़ घन घुमड़त आवैहै ॥ ४३२ ॥

दोहा ।

तुव पिय जात विदेशको, क्यों नहिंरोकति बाल ।
पावसऋतु आवत भट्ट, मदन करैगो शाल ॥ ४३३ ॥

पुनःसवैया ।

प्रोषित एक पियाहित लागि कै धावन वेग
विदेश पठायो । फूलकली धरी पत्रिकामें, रसरूप

(१४२)

रसमोदक ।

वसंतको ताहि जतायो ॥ त्यों असकंद भनै ब्रजमें,
वनितानके मोद हिये अति आयो । हैसि परो-
सिनकी सबलै, सुपरोसिन एक वृथा दुख पायो ॥

टीका-दोहा ।

भेजै जाहि विदेशको, तासों नेह नवीन ।
ताके विरहविछोड़ते, भई परोसिन दीन ॥ ४३५ ॥

गणिका प्रवस्तक प्रेयसी उदाहरण-
सवैया ।

कहा कहिकै समुझैये तुम्हें रसरीतिको जानत
मानतै हैं । मिलै करमें करतौ कहै यों परदेशको
गौन करै अरे तैन ॥ भनै असकंद सुएक घड़ी
कहूँ तोविन मोहिं परै नहिं चैन । रही मनकी
मनमें सुकहै, न मिलाइ रही त्रिय नैनसों नैन ॥

दोहा ।

प्रीतम जात विदेशको, कब ऐहौ सुखदैन ।
मनकी मनही में रही, कहि कर सौहे नैन ४३७ ॥

आगत पतिकाका लक्षण—दोहा ।

पति आवै परदेशते, खुशी होइ अँग अँग ।
आगतपतिका नायिका, ताहि कहै रसरंग४३८॥

मध्या आगतपतिका का उदाहरण— कवित्त ।

आवन सुनि आली वृषभानुकी दुलारी ढिग,
आइ कह्यो आये सुन प्रीतम तिहारेहैं ।
तौलों जुरिआई ब्रजगाँवकी लुगाई और,
वेऊ चल ताही छिन आनिकै विहारेहैं ॥
भनै असकंद श्यामा सखिन समाज बीच,
जाके मन अमित मनोरथ सिहारेहैं ।
कछु कछु लाजभरी चाह करै देखै मुख,
जैसे निशि होत भौर पंकज निहारेहैं॥४३९॥

दोहा ।

नवलवधू पिय आगमन, चरचा सुन सुन कान ।

(१४४)

रसमोदक ।

हिय हरषत परखत नमन, परखत सुमन कमान ॥

बरवै ।

सावनमें मनभावन आवनकीन ।

गावन लगीं सुहेलिनि लखौ प्रवीन ॥ ४४१ ॥

मुग्धा आगतपंतिकाका उदाहरण—
सवैया ।

रहे खेलत संग सखीनके आइ कहूं यह बात
सुनाइ दई । चलिआये विदेशते वैन सुने निज-
मंदिर वेगही दौरिगई ॥ असकंद भनै कछु चातु-
रीसों, पटकीकारि ओट प्रमोदमई । पियको मुख
देखत बाल नई भय लाज भरी सकुचात भई ॥

दोहा ।

पति आयो परदेशते, चली भौनविच आइ ।
पटहि ओट देखत मुखहि, धरकन हिये समाइ ॥

प्रौढ़ा आगतपतिकाका उदाहरण— कवित्त ।

धावन पठायो पिय आवन सुनायो आइ,
निज कर लेख दियो कहि सुख चाइकै ।
लखिकै मृदुलमंजु कंजते नवीन पान,
ताते गहिलीन्ही अतिप्रेम सरसाइकै ॥
भनै असकंद शुभ शकुन पुनीत मानि,
मंदिर में लायो चौक मोतिन पुराइकै ।
प्रफुलित गात भये उन्नत उरोज दुवो,
पत्रीको पढ़त अलि मृदु मुसक्याइकै ॥ ४४४ ॥

दोहा ।

पिय आवनकी खबर शुभ, बाँची चतुर सयान ।
बाहर मोद सुचौगुनो, हिये सौगुनो आन ॥ ४४५ ॥

परकीया आगतपतिकाका उदाहरण— कवित्त ।

आये घनश्याम द्वारकाते ब्रजगोकुलमें,

(१४६)

रसमोदक ।

छायो वृषभानु भौन आनँद महारी है ।
इत उत गोपीगण दौरेफिरें खोर खोर,
मोतिनसों एक एक भरि भरि थारी है ॥
भनै असकंद तहाँ एक ब्रजबाल लिये,
कंचनकलश भई सबते अगारी है ।
पगपै बढ़तजात दूनी द्युति आननकी,
राधाते अधिक ताके उर सुख भारी है ॥ ४४६ ॥

दोहा ।

आयो पीव विदेशते, कोउ आपने गेह ।
कहूँ कौनहूँ बालके, बढ्यो चौगुनो नेह ॥ ४४७ ॥

बरवै ।

मनभावनको आवन सुनि शिरनाइ ।
रही शोचवश सजनी सखिन छिपाइ ॥ ४४८ ॥

गणिका आगतपतिकाका उदाहरण—

सवैया ।

सौंह करे कहौं हे सुनियो सुधि होत कहूँ कबहूँ

उल्लास १.

(१४७)

सुख पाये । कंज समान नये नये पान, सुपीत
भये किहि नीत सुहाये ॥ त्यों असकंद भनै
बतियाँ, कहौ चीज प्रवीण कहा इत लाये । जौन
दिनाते गये परदेश, सुकौनसी ठौर कहाँ ह्वै
आये ॥ ४४९ ॥

दोहा ।

आयो मित्र विदेशते, आनँद उर न समाय ।
मोतिनमाल उतारिकै, मिली न सुख कहिजाय ॥
त्रिविध कहीं ये नायिका, जे कवि चतुर प्रवीन ।
प्रथम उत्तमा, मध्यमा; अरु अधमा गुणदीन ४५१ ॥
नाह करै अनहित तऊ, आप करै हित नार ।
ताहि उत्तमा कहत हैं, जे कवि बुधि आगार ॥ ४५२ ॥

उत्तमालक्षण उदाहरण—कवित्त ।

रजनी व्यतीत होत आये घनश्याम जहाँ,
परत्रिय संग सोई नवलकिशोरी है ।
आनँदकरि लीन्हों अति प्रेमकी तरंगनसों,

(१४८)

रसमोदक ।

कामकी उमंग बढ़ी देखि छवि भोरी है ॥
भनै असकंद दियो अंबर अतर तर,
बोली पिय पोंछौ तौ कपोलरेख रोरी है ।
पौढ़ि परयंक श्रम खोवो क्षण एक कल,
नैन अलसाने रही रैन अब थोरी है ॥ ४५३ ॥

दोहा ।

बसेवाम अनुरागवश, खोवनदे श्रम जोर ।
हाहासखी न जाइयो, इयाम बड़ेही भोर ॥ ४५४ ॥

मध्यमा लक्षण-दोहा ।

पिय हितकर हित जो करै, अनहित करै गुमान ।
ताहि मध्यमा कहत हैं, जे कवि बुद्धिनिधान ४५५ ॥

मध्यमाका उदाहरण-कवित्त ।

आये रसरंगमें विनोद करे घनश्याम,
हरष विलोकि बाल तिरछी चितैरही ।
सौंह करि बातनसों लीन्हों है मनाइ कान्ह,
कामद्युतिवेशमान मतिको वितैरही ॥

भनै असकंद जोरि सौहैं दृगवारिबुंद,
तेवे प्रमुदित घन वरष रितैरही ।
भौहैं चढ़ी उतरनिचौही भई प्रेमभरी,
लालन वकोही जुरि हितमें हितैरही ॥४५६॥

दोहा ।

प्राणपियाके मोहके, सुनि सुनि वचन अमोल ।
रूप दरश आधीन भे, दृग अलगरजी लोल ॥
नायकके हितहुं करे, करै गुमान जुवाम ।
ताको अधमा कहतहैं, जे कवि रस अभिराम ॥

अधमाका उदाहरण—कवित्त ।

तेरी सौह मोसों यों कहायो जो सुहायो लगै,
दीजो कहि येरी प्रीति करिकै नशाहनै ।
तुव मुखचंदको चकोर मन मेरो रहै,
समुझ इतेक और नेकहुं सलाहनै ॥
भनै असकंद कहै मुदित रिसों है बैन,
तोको का परीहै मोहिं अपनी निवाहनै ।

(१५०) रसमोदक ।

सौतविन पाँइन परेहू जो मिलैगी आइ,
एक वेर येरी फिर दूजी वेर नाहिनै ॥ ४५९ ॥

दोहा ।

पिय आये हित अति करचो, गरे लगाय लगाय ।
तदपि कहे रूखे वचन, नैनन मनसकुचाइ ॥

अथनायकलक्षण—दोहा ।

मोहिजाइ त्रैलोक लखि, जासु रूप आगार ।
कवित गीतरस लीन जो, नायक कह्यो विचार ॥

नायकका उदाहरण—कवित्त ।

सोहै शीशक्रीट वारों मारतंड मंडलको,
वारों पट पीत विज्जु मुक्ता रदनपै ।
कुंडल कपोलनपै समरनिशान वारों,
अधरन बिब वारों पल्लव पदनपै ॥
भनै असकंद अंग अंगपै मदन वारों,
मेचक सुधन वारों रूपके सदनपै ।

उल्लास १.

(१५१)

अलक मलिंद वारों हग अरविंद वारों,
इंदु वारों कोटिन गुविंदके वदनपै ॥ ४६२ ॥

दोहा ।

रूपसिंधु घनश्यामको, वनितनकी मनमीन ।
केलि करत निशिदिन रहें, त्यों असकंद प्रवीन ॥

पतिनायकका लक्षण—दोहा ।

विधिसों व्याह्यो पति समुझि, उपपति परत्रियचाह ।
त्रैसिकहित गणिकानसों, नायक त्रैकविनाह ४६४

पतिनायकको उदाहरण—कवित्त ।

जादिनते व्याह भयो राधिका नवेली सँग,
तादिनते गेहद्वार देहरी लखीनहीं ।
भीतरहीं भौनके सनेहवश आठौ याम,
करत प्रमोद देख वदन मयंकहीं ॥
भनै असकंद धरै मुरली अधर नाहिं,
पगजहँ धरत प्यारी मनसों धरै तहीं ।

(१५२) रसमोदक ।

जैसे अरविंदको मलिंद मतवारो रहै,
तैसही गुविंद चाह करत निशंकहीं ॥ ४६५ ॥

दोहा ।

जादिनते गौनो भयो, तादिन ते नँदलाल ।
भूलगये लखि रूप तुव, ग्वालवाल वनमाल ॥
सोपति कहिये चारविध, अनुकूलहि सुवखान ।
दक्षिण धृष्ट सुझठ कह्यो, चारभांति यहिवान ॥

अनुकूलपतिलक्षण-दोहा ।

सुवश आपनी तीयके, जोपिय रहत हमेश ।
ताहि कहत अनुकूलहैं, कवि असकंदनरेश ॥ ४६८ ॥

अनुकूल पतिकाको उदाहरण-कवित्त ।

हँसि अनुकूल शुभ शोभित सुहोदकूल,
ह्वैमन मोहित मृदुवातन सुदूनो दूनो ।
कंजकर कलित सनाल पद्मदेखे दुवो,
हार उरमोतिनको प्रसित सुदूनो दूनो ॥
भनै असकंद ब्रजचंद सुखमोद भरे,

उल्लास १.

(१५३)

नितप्रति ध्यानधरे रहत सुदूनो दूनो ।
मुखसों कलानिधिसों स्रवत सुधारससों,
सुमिस चकोर नेह करत सुदूनो दूनो॥४६९॥

दोहा ।

दूनो दूनो करत नित, नेह नवीनो नाह ।
वदन सुधाधर लखिरहै, है चकोर चितजाह४७०॥

दक्षिणलक्षण-दोहा ।

बहुत तियन सों होइ जो, एक रीति सम प्रीत ।
तासों दक्षिण कहतहैं, जे कवि सुमति पुनीत ॥

दक्षिणकाउदाहरण-कवित्त ।

खेलनको होरी जुरि आई ब्रजगोरी सबै,
भोरी छविदेख डारचो अतनुसुफंदहै ।
देखत कुसुमरंग अतर गुलाब घोरि,
करि सरबोर दियो आनंदक कंदहै, ॥
भनै असकंद नैन सैन सबही पै करि,
झोरिन गुलाल फेंकि करि छल छंदहै ।

(१५४)

रसमोदक ।

गोपिनके वृंद वीच सोहै ब्रजचंद जैसे,
सुमन कुमोदिनीमें समुदित चंदहै ॥ ४७२ ॥

दोहा ।

चंदमुखी हुलसी हिये, भई प्रेमसरबोर ।
एकनजरहै लखि रहे, श्रीब्रजचंद चकोर ॥ ४७३ ॥

पुनर्यथा--कवित्त ।

राँची रसरंग भगी रासकेलि मंडलमें,
प्रतिप्रति आनंदसों होतफिरै वारियाँ ।
वेऊ अति मदन मदंध मतवारेघने,
इत उत देखत चलावत नजारियाँ ।
भनै असकंद वैसी प्रेमकी तरंगनिमें,
टूटे फूलहार देखि तज फुलवारियाँ ।
बीनौ कहि सुमन सुहाये मनभाये सबै,
हरष हलादई कदमकी डगारियाँ ॥ ४७४ ॥

दोहा ।

उतर सुमन लैकर गुधे, एकडोर नंदलाल ।

उल्लास १.

(१५५)

।हिरावे ब्रजवधुनको, बनक बनाई माल॥४७५॥

घृष्टलक्षण-दोहा ।

।क नमानै दोष करि, शंका लाज करै न ।

।ष्ट आपने काममें, धीरजनेक धरै न ॥ ४७६ ॥

सवैया ।

मानै न नेक कहूँ विध सौ मैं, हजारक बेर
हीहों मनेकर । तापर येती कुटेक न लाज, धरै
।यमें तू रहै तिय सोंपर ॥ त्याँ असकंद भनै
तजाव, जहाँ तुम नीको सनेह रहे कर, ऐसो
।शंक दयो झझकार इते कहूँ बातपै अंक
।यो भर ॥ ४७७ ॥

दोहा ।

मेआयो परतीयसों, घर आयो किहि राह ।

।न काम इमि बैन सुन, अंक भरयो करचाह ४७८

शठलक्षण-दोहा ।

।पने कारजके लिये, कहै रसीले बैन ।

(१५६)

रसमोदक ।

निपट कपट युत शठ सही, वर्णत कवि बुध ऐन ॥

सवैया ।

इंदु लसै मुखकंज कपोल पै, वैनन फूल झरै
मृदुवानसों । मान करै असकंद भनै, तुम कापर
तानती भौंह कमानसों ॥ मैं कब येतो कियो
अपराध सुबूझले तू सखा औ सखियानसों । हाहा
हमारी विनै सुनि देखि, सुनेक मनोज भरी अँखि-
यानसों ॥ ४८० ॥

दोहा ।

कब कीन्हों अपराध मैं, बोलत बोल रिसाइ ।
पार हियेके होतहै, मदन बाणसम आइ ॥ ४८१ ॥

उपपतिलक्षण-दोहा ।

परनारीको रूप लखि, बश्य होइ अँग अँग ।
उपपति तासों कहतहैं, कविजन सहित उमंग ४८२

उपपतिका उदाहरण-कवित्त ।

मेरे फाँदिवेके मणिफंदाही बनायराखे,

उल्लास १.

(१५७)

हिय डुलसावै सदा नेहकी निशाकरै ।
प्रेमकी पगीहै रसरंगकी रँगीहै जाइ,
श्रवन लगीहै रतिरणकी सलाकरै ॥
भनै असकंद यंत्र मंत्रकी पढ़ीहै किधौं,
अधरसुधारसके कारण झुकाकरै ।
ज्यों ज्यों प्राणप्यारी मृदु हँसति बताति त्यों त्या,
डोलती अमोल ये कपोलनपै साकरै ॥ ४८३ ॥

दोहा ।

हैं कपोल पै डोलती, हँसत साँकरे वेश ।
अधरसुधारसको झुकै, काम दियो उपदेश ४८४

वैसिकलक्षण—दोहा ।

जो चाहै अतिप्रेम सों, वारषधून विलास ।
ताको वैसिक कहतहैं, कविमत सरस डुलास ॥

वैसिकका उदाहरण—सवैया ।

भूषण अंग विशाल बने, बहुरंग घने अति

(१५८)

रसमोदक ।

चातुरी बानसों । रागहिंडोल अलाप रही, सुन
मोहन मोहिगये बहि तानसों ॥ त्यों असकंद
भनै लखि यौवन, तीक्ष्ण नैन लगे ललचानसों ।
वारदियो मन औधन धाम, धनीवन वारबधूनकी
आनसों ॥ ४८६ ॥

दोहा ।

तेरे देखत अंग अँग, मन अनंग बढ़िजात ।
बारविलासिन धन्य तुव, चपल चातुरी बात ॥

दोहा ।

तीन प्रकार विचार कर, नायक और उचार ।
मानी वचन चतुर कहै, क्रिया चतुर निरधार ॥

मानीलक्षण-दोहा ।

तिय सयानि लखि मान जो, नायक करै गुमान ।
मानी नायक कहतहैं, कवि जे बुद्धि निधान ॥

मानीउदाहरण-सवैया ।

कहे मानिये मान कहाँलौं रहै, यह छोड़ि

उल्लास १.

(१५९)

कुटेक कही गहीहै । तुम औरनकी परतीत करी,
उन कौनसी बात नहीं सहीहै । असकंद भनै सुखसों
लहिये, रजनी अबतौ घरी द्वैरहीहै । तुव आनन
स्वच्छ कलानिधि सों, लखिवेको चकोरसी
हैरहीहै ॥ ४९० ॥

दोहा ।

मान कहाँलौं मानिये, सुनिये श्यामकिशोर ।
करै न दूजो मानको, रहै तिहारी ओर ॥ ४९१ ॥

पुनः कवित्त ।

नैन मतवारे मृगनैनवारे वारे सुनि,
अंजन लगाये होत खंजन निनाताके ।
वंशीधर वेग कर पगको धरापै धर,
अधर धरा धरि यो सुधर सुधा जाके ॥
भनै असकंद चोप चौगुणी चकोरनके,
सौगुणी कलानिधिसों मुखकी प्रभाताके ।
चल तज छंद होइ अधिक प्रमोद तोहिं,
कोटिन कटत बाधा नाम लिये राधाके ॥ ४९२ ॥

(१६०)

रसमोदक ।

दोहा ।

सुख समूह शोभा अमित, नैन मनोभवफंद ।
तज चलिये छलछंदको, चंद उदित ब्रजचंद ॥

कवित्त ।

चल ब्रजचंद प्यारे प्यारीने बुलाये तोहिं,
मोहि मन लीजै पै न कीजै मान हीको है ।
जीको सुख अमित विचार अबनीको भलो,
फीको परचो इंदु भयो याम रजनीको है॥
भनै असकंद चाह चौगुनी विलोके बढै,
अधर सुवास जाके रहत अमीको है ।
सौत मदगंजन मुनीन मनरंजन,
सुनैननको अंजन विशाल कामिनीको है॥४९४

दोहा ।

तोहिं मनावत हीगई. याम यामिनी बीत ।
मान तहाँलौ कीजिये, करै न दूजो नीत॥४९५॥

पुनर्यथा--कवित्त ।

मंदिर सुधाको प्रेम जीव वसुधाको भूप,
कुंदकलिकाको रूप तमकी प्रभाकोहै ।
हरत व्यथाको भाषि सकत कथाको जाके,
गुणनगथाको शेष कहि कहि थाकोहै ॥
भनै असकंद कोकनदकी समाको स्वच्छ,
सरस कताको ताकी विधि कविताकोहै ।
पूरण कलाको ऋद्धि सिद्धि संपदाको धाम,
कीरतिसुताको चंद्रमासों मुखताकोहै ४९६॥

वचनचतुरलक्षण—दोहा ।

वचननकी रचनानसों, जो तियवश करिलेइ ।
वचन चतुर नायक कहै, ताको कवि मत सेइ ॥

वचन चतुर नायकका उदाहरण—
कवित्त ।

बोलत मयूर मतवारे पुंज पुंज जहाँ,

(१६२)

रसमोदक ।

सघन अँधेरी लखि आनँद सदरमें ।
झूमिझूमि रही लता कदम डगारनमें,
घूम घूम रही भूमि चूमकर लरमें ॥
भनै असकंद देखि चौंचद लगत तहाँ,
मेरे साथ जात सोतो नेकहू न भरमें ।
करमें विचित्र काम रेसमकी डोरिनसों,
डारयोहै हिंडोरा कोक चातकवगरमें ॥४९८॥

दोहा ।

हों प्यासो हों देरको, तूचंचल पनिहार ।
द्वै गागर भरदे हमें, धरदे घरके द्वार ॥ ४९९ ॥

क्रियाचतुरनायकलक्षण—दोहा ।

जहाँ कौनहू क्रिया मिस, देखत वशके नाह ।
चतुराई करि तिय मिलै, क्रिया चतुर कहिताह ॥

क्रियाचतुरउदाहरण—सवैया ।

एक समै वनिता सब आइ चलीं शिवपूज-
नहेतु लिवाइकै । पाइकै अवसर पुरो भलो तहाँ,

उल्लास १.

(१६३)

आइगये हरि होरी मचाइकै ॥ धाय गह्यो करसों
करजाय, भनै असकंद सुभागी छुड़ाइकै । आनन
पै कच आनिपरे मनौ श्यामघटामें छिप्यो
शशि जाइकै ॥ ५०१ ॥

दोहा ।

रोरीकर धाये हरी, गोपीगण विच बाल ।
मृदुल अमोल कपोलपै, मल्यो गुलाल गुपाल ॥

पुनः—सवैया ।

ब्रजबालको सुंदर रूप अमोल, विलोकतही
विनमोल बिक्यो । छलसों नँदलाल अबीर लये
मुसक्याइ गह्यो नहि नेक रुक्यो ॥ गलबाहीं लई
मुखमींजिबेको असकंद भनै ज्यों प्रवीन झुक्यो ।
रजोरी छुड़ाइभगी सो मनौ शशिमंदिर भीतर
नाय लुक्यो ॥ ५०३ ॥

दोहा ।

अबीर नँदनंदनै, कर गहि लीन्ह्यों धाय ।

(१६४)

रसमोदक ।

चह्यो लगावन वदन पर, राधा भगीं छुड़ाइ ५०४

प्रोषितपतिकाका का लक्षण ।

पुनर्यथा-कवित्त ।

मंडल रहस रच्यो श्यामा श्याम मोद मान,
गोपीगण बीच मानो मदन सुरतहै ।
बाढ़त सरस रस सबहीके अंगनमें,
प्रेमके तरंगनमें आनँद जुरतहै ॥
भनै असकंद खेलमहि चन चोर रच्यो,
मूंद दृग एक छिप भागत तुरतहै ।
छूवत परस्पर हेरहेर कुंजनमें,
चोर करै राधिकाको सबमिल दुरतहै ॥५०५॥

दोहा ।

बार बार राधा बनै, चोर करै घनश्याम ।
हमैं छुवननहिं पाइहौ, तुम अति चंचल वाम ५०६
प्रोषितपतिकाका लक्षण नायक-दोहा ।
जोविदेशमें विरहवश, नायक होय अधीन ।

उद्घास १.

(१६५)

नायकप्रोषित सोइकह, जे पंडित परवीन॥५०७॥

उदाहरण-कवित्त ।

कारे कारे घन घहरान लागे मंडलमें,
होनलागी, मोरनकी कूकैं ये चहुँवा ओर ।
झिल्ली झनकार लागे दादुर पुकार लागे,
धुरवा धुकार लागे करन मचाये शोर ॥
भनै असकंद ऐसे समय लताननमें,
डारिकै हिंडोरा अरु गोपीगण लेतोजोर ।
झूलतो प्रमोद भरो जो पै मानिलेतो कहो,
जातो ना विदेश तौ न विरह बढ़ातो जोर॥५०८

दोहा

मेरेई मन भावती, इकटक निकट निशंक ।
हृगचकोर कब देखिहौं, राधावदन मयंक॥५०९॥

अनभिज्ञनायकलक्षण-दोहा ।

चाहै जो न त्रियानकी, प्रेमकरी रसरीत ।

(१६६)

रसमोदक ।

ताहि कहत अनभिज्ञहैं, राखै मनकी जीत॥५१०॥

अनभिज्ञकाउदाहरण-कवित्त ।

इत उत आय देत वीरिहू खवाय वेश,

मृदु मुसक्याय बातैं रसकी करचोकरै ।

मन मुसक्याय नैन सैनन चलाय श्याम,

भनै असकंद छाती छुवत गह्योकरै ॥

हाव भाव जेते ब्रजबाल करै देखि देखि,

हिय ललचाय चाय निकट रह्यो करै ।

राधिका नवेली कौन जाको पति ऐसो मिल्यो,

रतिको न बूझै और आनंद चह्यो करै॥५११॥

दोहा ।

जतनकियो बहुविधि भट्ट, सरस मिलनके काज ।

तऊ न बूझै बात वह, कैसो है ब्रजराज ॥५१२॥

दरशन निरूप्यते-दोहा ।

श्रवण चित्र अरु स्वप्न कहि, प्रगट प्रत्यक्ष विचार ।

आलंबन शृंगारते, दरशन चार प्रकार ॥५१३॥

श्रवणदरशनलक्षण-दोहा ।

कानन सुन मन होतहै, जाको भान समान ।
ताहि श्रवण दरशन कहत, आलंघित रसखान ॥

स्वप्नदरशनकाउदाहरण-कवित्त ।

तनु घनश्याम कान कुंडल दिपत भानु,
मुख शशि चारु काम फवनि फवै रह्यो ॥
भायो मनमोर मोर चंदहूचकोर ऐसो,
रतसमहैकै उर आनंद मदै रह्यो ।
भन असकंद ब्रजराजको सलोनो रूप,
सरस अनूप जाल छबनि बदै रह्यो ।
तेरे मृदुवैन मेरे श्रवण सुधासे परे,
वरवश आप दौरि दृगनि हितै रह्यो ॥५१५॥

दोहा ।

मृदुल मनोहरतनु सुघन, श्रवण परत तव वैन ।
मदन कदन मन कर दियो, दृग छाई छवि ऐन ॥

(१६८)

रसमोदक ।

चित्रदरशनलक्षण-दोहा ।

जो चित्रहि लखि सुख करत, विरह करत वा लाज ।
चित्रदरश ताको कहत, जे प्रवीण कविराज ५१७॥

चित्रदरशनका उदाहरण-सवैया ।

बैठिरही दृगसों दृग जोरि, मनोज भरी हिय
आनंद ताके । वैन कहै न सखीनसों एक, परी
यह टेक सनेहकी वाके ॥ त्यों असकंद भनै
लखिये वो भई वश तेरेइ रूप मजाके । चित्रमें
आनन इंदु विलोकि, चकोरसी ह्वैरही रूप सुधाके
दोहा ।

चित्र विलोकत राधिका, बाढी मैनमरोर ।
देखिरही इकटक वही, मुखसम चंदचकोर ॥ ५१८ ॥

स्वप्नदर्शनलक्षण-दोहा ।

सोवत बिच लखि नाहको, होत हिये आनंद ।
स्वप्नदरश ताको कहैं, कविजे सुखके कंद ॥ ५१९ ॥

स्वप्नदरशनकाउदाहरण—कवित्त ।

आज वह सघनलतान वन कुंजनमें,
निपट अकेली सपनेहूमें गईहोंरी ।
प्रफुलित सुमन विलोकि अति नीके भले,
मालती जुहीके तिन्हें टोरन नईहोंरी ॥
भन असकंद तहां आय वनमाली आली,
कर गहि लीन्हों अंक भरनदईहोंरी ।
झझकत चौंकपरी धरक न ही समाय,
कहत न बात बनै चकित भईहोंरी ॥ ५२० ॥

दोहा ।

सपनेकी सुन बात यह, गई कुंज बिच आज ।
आय गह्यो कर श्यामने, खुली आँख दुख लाज ॥

प्रत्यक्षदरशन लक्षण—दोहा ।

जो निश्चय मनुहारकै, मोहिजात लखि रूप ।
सो प्रत्यक्ष दरशन कहत, जे कवि रसिक अनूप ॥

(१७०)

रसमोदक ।

प्रत्यक्षदरशनका उदाहरण-कवित्त ।

मंजनकरि ठाढ़ी अटापर सुखाऊँ केश,
वीणको बजाय इहि खोरहो निकरिगो ।
धुनि सुनि नजर निगोड़ी परी वापै दौरि,
जुलफफँदामें जाय मेरो मन लरिगो ॥
भन असकंद जौलौं रूपको इटाऊँ तौलौं,
रूप वह प्यारो मेरे नैनन सुभरिगो ।
कल विनदेखे परै नेकहूँ न येरी भट्ट,
हेरिबो हमारो सो हमारे गरे परिगो ॥ ५२३ ॥

दोहा ।

मंद मंद मुसक्यानि वह, लखि भागे सबदंद ।
विसरत नाहिंन एक क्षण, अरी गोकुला चंद ॥ ५२४ ॥

इति श्रीशिवसुत षोडशनाम प्रताप अनुभारतीज्ञ श्रीमन्म-

हाराजकुमार श्रीमत्कुँवर स्कंदगिरिविरचिते रसमो-

दकाभिधे काव्ये श्रीमहाराज राधाकृष्ण विहारे

कविजन हृदयानंददायिने आलंबन विभाव

प्रकरणं नाम प्रथमोल्लासः ॥ १ ॥

अथ द्वितीयोल्लासः २.

अथ उद्दीपनविभाव लक्षण-दोहा ।

चंद चाँदनी वन सघन, उपवन बाग विहार ।
चंदन अतर समीर अरु, षट्क्रतु सरस निहार ५२५
इनहींते जो होत है, उद्दीपित रसभाव ।
ताको कविजन कहत हैं, उद्दीपन सुविभाव ५२६ ॥
सखा सखी जेती सबै, रसके और शृंगार ।
वरणत उद्दीपनहिमें, पण्डित सुमति विचार ५२७

उद्दीपनका उदाहरण-कवित्त ।

वृन्दावन सघन लतान वन कुंजनमें,
मालती जुही सो रही चहुँदिशि फूल है ।
तैसी चंद चाँदनी चकोरनकी चुहल वैसी,
देखिइयाम गायतान वंशी सुर मूल है ॥
भनै असकंद परी श्रवण नवेलिनके,

(१७२)

रसमोदक ।

सुधि बुधि भूलि उठी मनसिज हूल है ।
विरह सताई दौरि दौरि उठि धाई सबै,
नेकहु सम्हारयो नहीं वदन दुकूल है॥५२८॥

दोहा ।

वंशीधुनि सुनि मदनवश, दौरिं सब ब्रजबाल ।
देखि चंदकी चाँदनी, आनंद भरी बहाल ॥५२९॥
प्रथम कहे जे भेद सब, नायकके बहुरीति ।
तिनके चारों सखा अब, वर्णतहौं करि प्रीति५३०॥
सचिव सखा कहि चारविधि, पीठमर्द १ पहिचान ।
विट२ चेटक ३ सुविदूषकहु ४, वरणे कवि बुधवान॥

पीठमर्द लक्षण-दोहा ।

मानवतीके मानको, मोचै कहि मृदुवैन ।
कवि गुण ताको कहत हैं, पीठमर्द सो ऐन ॥५३२॥

पीठमर्दका उदाहरण-कवित्त ।

सघन घुमड़ि घन घोर करिजोर आये,
शोरको मचाये पठवाये दै दै बोलजरून ।

ताते में निकट तिहारे दौरि आयो वीर,
अधिक प्रमोद भरयो मनमें विचारे प्रश्न ॥
भनै असकंद चल वृन्दावनकुंजन में,
देखो घनश्याम होई पूरण हियेकी त्रस्र ।
अबतौ इतेक फेर चरित अनेक करौं,
सारेमित्रगाँवद्वंद लागत सुपक्षकृस्न ॥५३३॥

दोहा ।

सुनत वचन मृदु सखाके, हरष नहिये समानि ।
छोड़ि मान आली चली, गजगति सहित गुमानि॥

चेटक लक्षण—दोहा ।

वचन चतुरई करि सखा, दुहुँन मिलावै आइ ।
छंद फंद करकै बहुत, चेटक कहिये ताइ॥५३५॥

चेटकका उदाहरण—सवैया ।

साँवरेको सजिकै उतहीं, इत दौरिके आयो
गुवालिनी पर । देखतही कह्यो बैठी कहा, यक

(१७४)

रसमोदक ।

कौतुक होत विशालतर्हीपर । त्यों असकंद भनै
वहिकुंजमें, झूलत टूटपरी मुकतालर।हौंलखिआयो
मयूरन पुंजमें प्रेम भरे घनश्याम महीपर॥५३६॥

दोहा ।

सखा चतुर घनश्यामको, सखी स्वरूप बनाइ ।
सुमन विनन मिस कुंजमें, राधे दई मिलाइ ५३७॥

विट लक्षण—दोहा ।

मिलिबो सकल कलान कर, रचै चातुरी तौन ।
ताहि कइत विट सखाहैं, जे पंडित बुधभौन ॥

विट उदाहरण—सवैया ।

माधवकी मति काम विलोकिकै, बालसखा यों
विचार कियो मन । दादुर शोर मयूरन बोल,
सुचातक टेरसी टेर दई तन । मानवती ठिग जाय
कह्यो, असकंद भनै लखि पावसके घन।धूमरे धूमरे
ये धुरवा धरा, चूमरहे उमड़े झूमड़े घन ॥ ५३९ ॥

उल्लास २.

(१७५)

दोहा ।

सखा कूक कोयल लगी, मदन हूकसी आइ ।
मिली राधिका श्यामको, ज्यों चपला घनपाइ ॥

विदूषक लक्षण-दोहा ।

जोरै प्रथम समाजको, रचै स्वाँग बहुआन ।
सकल हँसावै जुगतसों, वहै विदूषक ठान५४१ ॥

विदूषकका उदाहरण-कवित्त ।

त्रिविध समीर सीरी बहत झकोरनसों,
फैली चारु चाँदनी सुचंदके प्रकाशसों ।
वृन्दावन कुंजनमें सखिन समेत श्याम,
दीन्ह्योहै मिलाइ राधे सरस हुलास सों ॥
भनै असकंद फेरि करिकै उपाय जाय,
स्वाँग बनिआयो करै बात हकलातसों ।
भौंहन चढ़ाय नैन मुख मटकाय दीन्ह्यो,
सबन हँसाय नाचि कूदत विलाससों ॥५४२॥

(१७६)

रसमोदक ।

दोहा ।

उठन कहूँ बैठत कहूँ, फिरत हलावत पोंद ।
रचत स्वाँग बहु भांतिक, विहसावत कर मोद ५४३

अथ सखीलक्षण-दोहा ।

राखै नायक नायिका, जिनसे कछु न दुराव ।
सखी चतुर तासों कहैं, चार भांति कविराव ५४४
चारोंके गुण येकहैं, मंडन शिक्षाठान ।
उपालंभ परिहास कहि, भाषत बुद्धिनिधान ॥

मंडन लक्षण-दोहा ।

अंग अंग भूषण सजै, त्रियके सखी बनाइ ।
मंडन कहिये ताहिको, विधिसों सरस जताइ ॥

मंडनका उदाहरण-सवैया ।

मंजुपद जावक लगाइ पहिराइवेश, जेहर
सुज्योति जगी किंकिणि सुलंकपै । कंचुकी उरो-
जनपै हीरनके हार हिये, साजे बहुभांति मंद

उल्लास २.

(१७७)

नखत दमंकपै॥ भनै असकंद श्रुतिभूषण विशाल
तैसे, रतिसी बनाइ बैठाइ परयंकपै । मोतिन
विहँधे केश तारन समेत मनौ, रजनां सवाँरि
बाँधी पूरण मयंकपै ॥ ५४७ ॥

दोहा ।

अंग अंग भूषण सजे, अरु शृंगार सबलेख ।
भूलगई बीरी अली, अधर ललाई देख ॥ ५४८ ॥

शिक्षालक्षण—दोहा ।

देत सीख जो नायकहि, नानाविध समुझाइ ।
शिक्षासखी बखानहीं, कवि पंडित सुख पाइ ५४९

शिक्षासखीका उदाहरण—कवित्त ।

रूप गुण आगरी न चीन्हैं रसरीति कछू,
चतुर सयानी कहूँ काम मत लीजै ना ।

बार बार आवै वह बगर मँझार बात,
मोहिं कहि आवै सुन सीख हठ कीजै ना ॥

भनै असकंद यह रीति जग जाहिरहै,

(१७८)

रसमोदक ।

लहट लगावै फेरि नेकहूँ पतीजै ना ।
बानि कुलकानिकी बचायो चहै जोपै बीर,
साँवरे सलौने हाथ भूल मन दीजै ना॥५५०॥

दोहा ।

तू अलवेली ब्रजवधू, सीखो नहीं सयान ।
नेह न कीजो श्याम सँग, जो चाहौ कुलकान ॥

पुनः--कवित्त ।

रूप रस सागर अनूप लसै तेरो यह,
पावत न मैनिकाकी द्युति छवि छूटीको ।
जोपै लखि नागरनट मन अटकावै कहूँ,
जोरत सुकौन फेर कुलकानि टूटीको ॥
भनै असकंद तैसे ब्रजके चवाई लोग,
सांच बरजोरी करै निपट सुझूटीको ।
यमुना तट विकट सुनीर भरिवेको कहि,
बार बार रोकै चंद्रकेशी या वधूटीको॥५५२॥

उल्लास २.

(१७९)

दोहा ।

तू न जाइये भूलिकहुँ, कालिन्दीके तीर ।
अटकावै मनको कहूँ, नागरनट बलबीर॥५५३॥

कवित्त ।

करि बरजोरी नित जातहै कलिंदी तीर,
आवै उत कान्ह बजा वंशी बसबो करै ।
राग तान गायकर निपट रिझायकर,
नेरे आय बातैं करि करि हँसिबो करै ॥
भनै असकंद करै कौनहुँ कलारी ऐसी,
मुकुट विशाल छवि हिय लसिबो करै ।
हाथहु नरहै मन देखे वह रूप जाल,
साँवरो सलोनो लाल ब्रज बसिबोकरै॥५५४॥

दोहा ।

तू यमुनातट जाति नित, हटक न मानति नेक ।
कान्ह सुतित बसबोकरै, अरी छोंड़ यह टेक

(१८०)

रसमोदक ।

उपालंभ सखीलक्षण-दोहा ।

यापियपै त्रियके ढिगै, यापियपै त्रिय कोइ ।
देइ उरहनो आनकै, उपालंभ कहि सोइ॥५५६॥

उपालंभका उदाहरण-कवित्त ।

सायो नहीं पान दूध दधिकी कहै को बान,
वृन्दावनहूँ न कहूँ बाँसुरी बजाई है ।
मकराकृत कुंडल उतार धरे कानन सों,
मुकुट सवाँरो नहीं लकुट सुहाई है ॥
भनै असकंद श्याम बैठे ठीक वाही ठौर,
आइ जहाँ देखि करै अति निठुराई है ।
चाहिये न तोहिं ऐसी कठिन कठोरताई,
विधिकी बनाई नेह लगन लगाई है ॥५५७॥

दोहा ।

नेन मिलाइ फँसाइ मन, केते नाच नचाइ ।
निठुराई कोउ करतहै, तुमसी लगन लगाइ ५५८

परिहास लक्षण-दोहा ।

करे नायिकासों हँसी, रतिकी देश लजाइ ।
ताहि कहत परिहासहैं, रसग्रंथनमें गाइ ॥५५९॥

परिहासका उदाहरण-सवैया ।

यह रातकी बात जतावो कछू, किहिभाँ-
तिसों कैसे प्रमोद ठये । उन गोल कपोलनके
मृदुचुम्बन कैसे लये अरु कैसे दये ॥ असकंद
भनै रसके वशमें कुचके मसके दृग ज्यों उतये ।
बलि साँची कहौ इतनी हमसों, विपरीतरतीसों
वे जीतलये ॥५६०॥

दोहा ।

सुनत वचन परिहासके, अली रही शिरनाइ ।
सखी कह्यो मुसक्याइकै, करिहै कहा लजाइ ॥

दूतीनिरूपणं-दोहा ।

प्रथम कही उत्तम द्वितिय, मध्यम अधम तृतीय ॥

(१८२)

रसमोदक ।

निपुण दूतपनमें सु ये, दूती कहैं कवीय॥५६२॥

उत्तम दूती लक्षण-दोहा ।

वचन निकारत अमी सम, मोहिलेत मन जौन ।
कवि जन वर्णत प्रीति सों, उत्तम दूतीतौन॥५६३॥

उत्तमदूतीका उदाहरण-कवित्त ।

खोल मुख चंद ताके द्युतिको प्रबंध वधै,
माती मन मदसों तुव शोभा करनहै ।
सुभग सुहाये बने तरन तरचोना वेश,
केश घुघुरारे रूप रतिकी हरनहै ॥
भनै असकंद आन कान कहा येरी वीर,
मानि मतियेरी तू ननदी सुषरनहै ।
देखि नंदनंद ऐसो औसर कितैरी वीर,
चतुर चितैरी चारु चंपक वरनहै ॥ ५६४ ॥

दोहा ।

सीख सुनौ ब्रजचंद लखि, त्रिविध सुगंध समीर ।
सुखद मोहिनी रूपकी, तू अति गुणन गँभीर ॥

पुनः कवित्त ।

कंचन वरण बलि नूतनी विशालसोहै,
 बैठी निज मंदिरमें आनंदकी कंदहै ।
 सोरह श्रृंगार सजे बारहू अभूषणको,
 लखि मनमोहि परै अतनु सुफंदहै ॥
 भनै असकंद कोटि द्युति रति वारे होत,
 दशन विलोकि चंचलाकी गम मंदहै ।
 चलि ब्रजचंद प्यारे कर तू अनंदजैसो,
 लसत मुखारविंद उदित न चंदहै ॥ ५६६ ॥

दोहा ।

कोटिन रति द्युति वारिये, लखहु सुचलि ब्रजचंद ।
 मुदित वालि मुख देखिये, ऐसो उदित न चंद ॥

पुनर्यथा-कवित्त ।

मंदिर सुधाको प्रेम जीव वसुधाको भूप,
 कुंदकलिकाको रूप तमकी प्रभाको है ।

(१८४)

रसमोदक ।

हरत व्यथाको भाषि सकत कथाको कौन,
गुणन गथाको शेष कहि कहि थाको है ॥
भनै असकंद कोकनदकी समाको स्वच्छ,
अमल अनूपताको विध कविताको है ।
पूरण कलाको ऋद्धि सिद्धि संपदाको मूल,
कीरति सुताको चंद्रमासों मुखताको है ५६८।

मध्यम दूती लक्षण-दोहा ।

कहै वचन मीठे कछू, सीठे देश मिलाय
मध्यम दूती जानिये, भाषै जुगुति बनाय ॥५६९॥

मध्यम दूतीका उदाहरण-कवित्त ।

पंकजके वरनसोहै मीन मृग खंजनसे,
अंजन कलित अति छविके छटासे ये ।
भरत अनंग मन हरत मुनीनहूँके,
करन कलोल लोल नटके बटासे ये ॥
भनै असकंद चारु हेरत मयूषे परै,
फेरत सुचारो ओर चौमुखपटासे ये ।

उल्लास २.

(१८५)

हैंतौ कजरारे दृग कज्जल न देहु प्यारी,
लरत बटोहिनसों करत कटासे ये ॥ ५७० ॥

दोहा ।

तूतो करत शृंगार इत, उत न सौति मिलजाय ।
तेरी भौंह कमानकी, फिर कमनैती जाय ॥ ५७१ ॥

पुनः—कवित्त ।

कान्ह चलि सुतट कलिंदीकेलि कुंजनमें,
सुखको विचार साजि बैठी परयंकपै ।
मणिके जटित अंग भूषण विशाल सोहै,
हीरनके हार मंद नखत दमंकपै ॥
भने असकंद एक कौतुक अनूप बनै,
भाषत न देखौ मिलि मुदित सुअंकपै ।
वदन पियारीके अमोल तिल सोहै वेश,
बैव्योहै निशंक मानौ मधुप मयंकपै ॥ ५७२ ॥

दोहा ।

सोहै वदन मयंकपै, बिंदु श्याम रँग वेश ।

(१८६)

रसमोदक ।

अमी हेतु मानौ भवैर, बैज्यो लै उपदेश ॥५७३॥

अधमा दूती लक्षण-दोहा ।

कहै वचन अनखाइकै, चाहै वात बनैन ।
लक्षण दूती अधमके, वरणत कवि बुध ऐन ॥

अधमादूती उदाहरण-कवित्त ।

जौन मनमोहनसों सुख चाहौ आठौयाम,
तौन मनमोहनसों कैसी अनखाती हौ ।
जानती न भूल कछु ऐसी रिस ठानतीहौ,
मानती न मेरी सीख फेर पछितातीहौ ।
भनै असकंद यह मनमें विचारि देखो,
तरफ निहारो सुनौ सौतिन सिराती हौ ।
चल उठ देख प्यारी शीतलमुपौन चलै,
मौन गहि बैठी तुम कौन रंगरातीहौ ॥५७५॥

दोहा ।

मिल मोहनसों वेग चलि, बैठी कहा रिसाय ।
उत सुनकै सौतें सजै, फिर न बनै पछिताय ॥५७६॥

विरहनिवेदनलक्षण—दोहा ।

विधभाँति दूतीनके, कहे काज कविराज ।
वेरह निवेदन एक फिर, संघटन सुखसाज ॥ ५७७ ॥

विरहनिवेदनका उदाहरण—सवैया ।

कानपरी जबते धुनि आन, भरे रहैं वारिज
नैन आंसुरी । चित्रलिखीसी भई वह मूरति,
अंगदह्यो विरहानल तासुरी ॥ ताहिभनै असकंद
प्रेमसों, जाय निकार सनेहकी फाँसुरी । साँसपै
आंस भरै ब्रजबाल, सुनी जबते विसवासिन
आंसुरी ॥ ५७८ ॥

दोहा ।

वानपान भूषण वसन, नेक न भावै वाहि ।
लफै सेज परी विकल, जौ लौं मिलै न ताहि ५७९ ॥

संघटन लक्षण—दोहा ।

इय मिलाइ दुहँनको, करि चतुराई जौन ।

(१८८) रसमोदक ।

संघटन दूती कहैं, ताको कवि मतिभौन॥५८०॥

संघटनका उदाहरण—कवित्त ।

फैलिरहीं फूलिरहीं झूलिरहीं झूमिरहीं,
लूमि रहीं चूमि लता ललित लुनाई पर ।
भनै असकंद वारै बाग अमरावतीके,
वारै महताब खिलि सरस जुन्हाई पर ॥
ऐसो कहि नवलकिशोरीको लियाइ तहां,
वारिये का वाकीसो अनूप चतुराई पर ।
इत उत सुमन दिखाइ पहिराइ जाइ,
दीन्हों है मिलाइ जाय कुँवरकन्हाई पर ॥

दोहा ।

पिक चकोर चातक घने, बोलिरहे सुख पाय ।
तहाँ लैगई राधिकै, दीन्हों श्याम मिलाय ॥५८२॥
अपने कारजको करै, दूतपनो जो आप ।
स्वयं दूतिका जानिये, चतुराई कर थाप ॥५८३॥

स्वयंदूतिकाका उदाहरण— कवित्त ।

खबरि उड़ानी दिनद्वैकते नगरबीच,
बाँधे फिरै डगर ठगौरिनके सोहिया ।
रौनि अँधियारी दिन जात सांझहोनिवारी,
कुमति विचारी कौन सूझति न तोहिया ॥
भनै असकंद थोरी थोरी गोरी गोरी भोरी,
तेरी लखि प्यारी छवि तरसत मोहिया ।
भ्रमत कहां धौं फिरै याते आज मेरे ठाम,
ह्याँही बसमानवात सरसवटोहिया ॥५८४॥

दोहा ।

जौलों तू उत जायगो, तौलों की सुन बात ।
रैनपरे मगमें कहूं, दिनकर अब छिपजात ॥५८५॥

पुनर्यथा—कवित्त ।

सरस निवास करि अतिही विलास करि,

(१९०) रसमोदक ।

क्षीण होतजाती प्रभा रविके किरनकी ।
मारग विकट भूलि पथिक लुट्योहैं एक,
खबरि उड़ानी कहौं सौंहें विरनकी ॥
भनै असकंद कहि अहित न मानै यह,
भरुम तन कौन भई तृष्णा हिरनकी ।
उँचीहैं उँचाई ताते परत लखाई सुनौ,
दूर दूरताई सुपताई मंदिरनकी ॥ ५८६ ॥

दोहा ।

घन घुमंड वरषन चहत, अधिक अँधेरी रैन ॥
रहौ हमारे गेहमें, पथिक पाइहौ चैन ॥ ५८७ ॥

अथ षट्ऋतु निरूप्यते ।



हेमन्तऋतु वर्णन—कवित्त ।

याम युग ग्रीष्मलौ दिवस व्यतीत होत,
चार हिम दिन रैन दीह दरसतहै ।

उल्लास २.

(१९१)

सहज बयारि सीरी चलति झकोरन सों,
अंग अंग छुइ तनु कंप सरसतहै ॥
भनै असकंद ऐसी सरस हिमंतऋतु,
भुज भरि प्यारी पिय अंक परसतहै ।
वाट घाट औघट दिशान दिशि चारों ओर,
सम घनसारके तुषार बरसतहै ॥ ५८८ ॥

दोहा ।

सरस दिगंत हिमंतऋतु, बरसत बरफ फुहार ।
दंपति जे जन रसिक ते, प्रमुदित करत विहार ॥

पुनःकवित्त ।

मोद मदमाती लखि प्रबल हिमंत शीत,
सजि रतिमंदिर अमोल रुचि प्यारीसों ।
चौगिर्द चिराग झाड़ हीरनके जगमगात,
दीपमालिकासी करी ओप चित्रसारी सों ॥
भनै असकंद डारिझरफ दुवारनपै,
गिलम गलीचे बिछे ओप अनियारीसों ।

(१९२)

रसमोदक ।

अंबर अतर तर सुघर तमोल खाय,
पौढ़ी परयंक जाय सरस विहारीसों ॥ ५९० ॥

दोहा ।

नवब्रजवधू हिमंतऋतु, शीत पाय सुखचैन ।
अंक भरे परयंक पर, पियते क्षणक छुटेन ॥

शिशिरऋतु वर्णन-कवित्त ।

देख ऋतु शिशिर अवाई यह मेरी वीर,
झरखनहूँते शीत भीतर भरचो परै ।
ओढे ऊन अंबर तरातर सुगंधनसों,
फरश गलीचनपै प्रगट अरचो परै ॥
भनै असकंद पिये अमल अनेक जेवे,
नजर बचाय आप पाँइन खसोपरै ।
सरस समंद सीरी चलत बयार ज्योंही,
चहुँदिशिवरफ फुहारन झरचो परै ॥ ५९२ ॥

दोहा ।

शिशिरशीत आये भट्ट, वरफ परै चहुँओर

उल्लास २.

(१९३)

दंपति जे बे रस छके, तिनते चलत न जोर ५९३
पुनर्यथा-सवैया ।

मंदिर सुंदर सेज मजेजमें बैठे, दुहूं रसलों रस भीने।
चारहुं ओर चिकें कर द्वारपै, दीप घने तम लेस-
कहीने। सौरभ पुंज भनै असकंद सुशीतको भीत
निरादर कीने। प्याले प्रमोदके लीन्हें दुहूँ कर,
पागे महामद नेह नवीने ॥ ५९४ ॥

दोहा ।

शिशिरशीत व्यापक जगत, भावै अंबर तूल ।
दंपति सुखको देतहै, रसिकनकी मनमूल ५९५॥

वसंतऋतुवर्णन-कवित्त ।

कुंजनव बागनमें विपिन विभागन में,
सजल तड़ागनमें नदी नद झरमें ।
खोर खोर ग्रामनमें मौर मौर आमनमें,
मंद मृदु गावनमें तंतकार करमें ॥

(१९४) रसमोदक ।

भनै असकंद जुही दावदी चमेलिनमें,
अवली मदंध दौर भौर भर भरमें ।
कंत सुखभाषिन प्रमोद वनवानिकलों,
आज दरशंतयों वसंत घर घरमें ॥ ५९६ ॥

दोहा ।

फूलिहीं फुलवारियाँ, मधुकर अवली गुंज
पुंज पुंज वनितानके, खेल वसंत निकुंज ॥ ५९७ ॥

पुनः—कवित्त ।

रूपगुण आगरी अनूपरस सागरी है,
गुणन उजागरी प्रमोद झलक्योपरै ।
मदन उछाह इयाम नेह चितचाह भरी,
वैन मृदुहास प्रेम नेम ललक्योपरै ॥
भनै असकंद देत उपमा लजात मन,
कीरतिकिशोरी संग रंग हलक्योपरै ।
पुंज ब्रजवालनिके खेलत इकंत नव,
चोलिनते चपल वसंत छलक्योपरै ॥ ५९८ ॥

उल्लास २.

(१९५)

दोहा ।

आई प्रगट वसंतऋतु, मधुकर भये मदंध ।
झौरन मौर रसालभे, मधुर माधवी गंध ॥ ५९९ ॥

ग्रीष्मऋतुवर्णन-कवित्त ।

खासे खसबोइन खजाने खसखाने खूब,
खोले दर द्वार दीह ह्तरफ दरीचें ये ।
चोखे चारुचंद्र कलियाय चौक चंदन सों,
शीतल पटीन शीत सौरभन सींचे ये ॥
भनै असकंद बुंद परत फुहारनसों,
सलिल गुलाब अली सुखसों उलींचे ये ।
ताहूपै प्रचंड ऋतु ग्रीष्म अखंड भूमि,
तापित करत मारतंडकी मरीचें ये ॥ ६०० ॥

दोहा ।

प्रगट तेज रविविच अधिक, पवन चलै झकझोर।
ग्रीष्मऋतु नीकी अली, खसखाने चहुँओर ६०१ ॥

(१९६)

रसमोदक ।

पुनःकवित्त ।

शीतल समूह खसवीजनी बयारि वेश,
शीतल प्रसून सेज शीतल महल है ।
शीतल सरोजदल अमल गुलाब आव,
शीतल चहुँहा चौक शीतल चहल है ॥
भनै असकंद तहाँ सरस फुहारनकी,
फरस फवी है शीत शीतल सहल है ।
शीतल सुगंध शुभ शीतल महीतलपै,
तीखन तिहुँपै ऋतु ग्रीष्म कहल है ॥ ६०२ ॥

दोहा ।

अली भूमि तापित यदपि, ग्रीष्मऋतु करदीन ।
तदपि कुंजगलियानकी, शोभा शिशिर प्रवीन ॥

वर्षाऋतुवर्णन-कवित्त ।

चाह भरे चंचल चहुँहा झपि झूमि झूमि,
झंझा झोक छैक्षिति अनेक छबि छायेरी ।
तैसी दीह दामिन दमंकति दिशान देश,

उल्लास २.

(१९७)

झपकि झलान धूम धुरवा मचायेरी ॥
भनै असकंद तैसी लहर लजाननपै,
छहर छटान बुंद बुंदन सुहायेरी ।
पालक पुनीत प्रजा पावस सँयोग पाय,
पुंज पुंज वारिध विलंद उठधायेरी ॥ ६०४ ॥

दोहा ।

घन घमंड चहुँ ओरते, फिरत मचाये दोर ।
पावसऋतु लखिकर उठे, पिक मयूरहू शोर ॥

पुनःसवैया ।

आठहू याम न देखिपरैरवि, यों घन घेर
रहे नभ मूलैं । पौन चलै झकझोरनसों, सुधि
कामकी एकहू काम न भूलैं ॥ त्यों असकंद
भनै मुरवानके, वैन सुने सुख होत अतूलैं ।
सावनमें मनभावन संग में प्यारी हिंडोलना
मौजसे झूलैं ॥ ६०६ ॥

(१९८)

रसमोदक ।

बरवै ।

सावन सरित सुहावन आवन कीन ।

वन उपवन हरियाने अधिक नवीन ॥ ६०७ ॥

पुनः सवैया ।

भादों घने घने घूमिरहे, चपला चमकै चहुँ-
ओर सुहाई । फूले प्रसून सबै वनके, अवनी पै हरी
हरी सेज बिछाई ॥ त्यों असकंद भनै ब्रजगोपिन,
साँवरेसों रसरीति बढ़ाई । झूलैं सबै मिलि कुंज
कदंबपै, डारि हिंडोलना धूम मचाई ॥ ६०८ ॥

बरवै ।

जितदेखौ तित वरषत घन चहराय ।

पावसऋतुको आवन लेत लुभाइ ॥ ६०९ ॥

शरदऋतुवर्णन-कवित्त ।

अमल अकाश ओष अंबर अनूपवृन्द,
उजल अमंद चारु चाँदनी प्रकासहै ।
सौरभ समीर त्योंही मंजुल प्रसून पाय,

उल्लास २.

(१९९)

गुंजत मलिंद पुंज बेसर सरासहै ॥
भनै असकंद उर प्रमुद विलोकैं ऋतु,
सरस सुहायो शीतभानको उजासहै ।
दंपति अनेक सुख संपति समूह लिये,
गोपिन समेत कुंज कुंजन विलासहै ॥६१०॥

दोहा ।

अमल अकाश शरदनिशा, हिमकर विमलविकास।
वृन्दावन वंशी बजत, हेतु सरस रसरास ॥६११॥

कवित्त ।

फैली चारु चाँदनी ये शरदसुधाकरकी,
चारों ओर कीन्हो निज चंदछवि जालको ।
फूली मंजु मालती सरोजवन तोर तोर,
गूँध गूँध गरै गरे इयामहिय मालको ॥
भनै असकंद मोद मंदिर मनोज भरी,
मिलि गलबांही करै सरस खियालको ।

(२००) रसमोदक ।

राखै रसरहस रिझाय ब्रजगोपिकान,
गुण गरबीली गुण आगर गुपालको ॥६१२॥

दोहा ।

प्रफुलित पुहुप प्रकाश शशिडोलत त्रिविध समीर।
मिलि बिहरत रमणी रमण, तरन तनूजा तीर ॥

इति श्रीशिवसुत षोडश नाम प्रतापअनुभारतीज्ञः

श्रीमन्महाराजकुमार श्रीमत्कुँवर स्कंदगिरि विरचिते

रसमोदकाभिधेकाव्ये श्रीमहाराजाधिराज राधाकृ-

ष्णविहारे कविजन हृदयप्रमोददायिने

उद्दीपन विभाव प्रकरणं नाम

द्वितीयोल्लासः ॥ २ ॥

तृतीयोल्लासः ३.

अनुभाव-दोहा ।

अनुभवजिनते होतहै, चितमें रतिको भाव ।
कहे तेइ अनुभावहैं, रस शृङ्गार बनाव ॥६१४॥
नैन वैन मृदुहास अरु, अंग विकाश विनोद ।

साकभाव सुहाव धृत, इनहींते रतमोद ॥ ६१५ ॥

अनुभावका उदाहरण—कवित्त ।

जाति चली आली निजमारगमें मंदिरको,
देखतही श्याम अरी कौन कहि टोंक्योहै।
समुद उमंग भरे आइकर पास लागे,
करन ठिठोली दियो कर गहि झोंक्यो है ॥
भनै असकंद छै छुड़ाइ सकुचानी वेश,
सरस लजाय दृग जोर अवलोक्यो है।
बोलीविहसौहैं चितचोरचोहै निशाकरिकै,
हाँकरिकै ना करिकै वरवस रोंक्योहै ॥ ६१६ ॥

दोहा ।

नेह नशानैननि करै, वैननि करै सुटेक ।
हरषत चलत मुलेत मन, ठहर जाति क्षण एक ॥

अथ भाव नाम—छप्पय ।

प्रथम कहत अस्तम्भ द्वितिय शुभ स्वेद कहावत ।

(२०२)

रसमोदक ।

तृतीय कहत रोमाँच चौथ सुरभंगन गावत ।
पंचम कहियतु कम्प षष्ठ वैवर्ण बखानत ।
सप्तम आँसू कहिय प्रलय अष्टम कहि गानत ॥
इमि भनत नृपति असकंदगिरि, जृम्भा नवम
बखानिकर ॥ लखि अंतर्गत अनुभावके, आठह
सातुक भाव पर ॥ ६१८ ॥

स्तंभ लक्षण-दोहा ।

थकै अंग जब लाजते, भय अरु हर्ष समेत ।
ताहि कहै अस्तंभ हैं, पंडित बुद्ध निकेत ॥ ६१९ ॥

स्तंभका उदाहरण-सवैया ।

चल फागके औसरलौं घनश्याम, गये वृष
भानकि भौन गली । पकरे गये यूथ सहेलिनमें
वहूँ राधिका मूठ गुलाल घली ॥ असकंद भनै
फिरतौ भई धूम, घला घलीमें गई थाकि थली ।
बलि वैसही ठाढ़ी कहैं सिगरी, अबतौ भये श्याम
ललाते लली ॥ ६२० ॥

उल्लास ३.

(२०३)

दोहा ।

रंग रंगपै चढ़िगयो, प्रेमतरंगी रंग ।
नैननैनसों मिलि थके, इयाम राधिका संग ॥ ६२१ ॥

पुनः—सवैया ।

साज श्रृंगार नई ब्रजनार, खड़ी निजमंदिर
द्वार सयानसो । आय अचानकही निकरे, हियमें
वनमाल परी अति आनसों ॥ ताहि घड़ी सों
भनै असकंद, मिली न अली सँगकी सखियान
सों ॥ इयामको रूप विशाल थकी लखि, प्यारि
मनोज भरी अँखियानसों ॥ ६२२ ॥

दाहा ।

लखे रूप रँग साँवरो, परत न मग पग एक ।
धरै न धीरज हरष कछु, लाज तजै नहिं टेक ॥

स्वेद लक्षण—दोहा ।

मोद सुश्रम दुर लाजते, कोप आदिते होय ।

(२०४)

रसमोदक ।

अंग अंग प्रगटै सलिल, स्वेद कहावत सोय ६२४

स्वेदका उदाहरण—कवित्त ।

मोद मदमाती अनुराग भरी मोहनपै,
हँसत हँसत गई खेलनको होरीहै ।
धूम मची तहाँ रंग केसर अबीरहूकी,
उड़िगो गुलाल भूर झौरिनकी झोरीहै ।
भनै असकंद देख ग्वालनकी भीर भार,
लौटत अड़त वृषभानुकी किशोरीहै ।
कढन न पाई श्रमबुंद परे आननपै,
लाजभरी तैसी कछुरोष भरी थोरीहै ।

दोहा ।

इंदुवदन पर परत जे, श्रमके बुंद विशाल ।
रफ गुलालते होत ते, गजमुकताहल लाल ॥

रोमांच लक्षण—दोहा ।

हिय हुलासके डर कछू, जाड़ेहुके त्रास ।
उठै रोम अँगअंगमें, सो रोमांच विलास ॥६२७॥

रोमांचका उदाहरण-सवैया ।

बैठी सखीनके सङ्गमें बाल, प्रमोद भरी विहसै
सुलजातन । होनलगी चरचा पियके जब, आव-
नकी रसरीतिके बातन ॥ त्यों असकंद भनै
सुनिकै तनके तन रोम उठे सकुचातन । त्यों
हरी कंचकीमें छतियाँ मनो, काटे उठे जल
जातके पातन ॥ ६२८ ॥

दोहा ।

श्रावण सुन छतियाँ तनी, कछू कंचुकी तान ।
उठे रोम तनुके घने, हिये न सकुच समान ॥ ६२९ ॥

सुरभंग लक्षण-दोहा ।

सुखमद उर विसियाटते, वैन औरही रूप ।
कहत ताहि सुरभंगहैं, जे कवि सुमति अनूप ६३०

सुरभंग भावका उदाहरण-सवैया ।

आवतती निज मंदिरको, मग रोंकिकै साँवरे

(२०६)

रसमोदक ।

चोप चढ़ाई । आइ घरै कह्यो सास कहाँ रही
कौनसि ठाम विलंब लगाई ॥ त्यों असकंद भन
सुनकै, करी रोष छिपावनकी चतुराई ॥ नैन से
नैन मिलाइरही, सुगरो भरि एकदू बात
न आई ॥ ६३१ ॥

दोहा ।

ननद कह्यो जानत अरी, लखत कहा तुव वान
ताते वैन कहे दबे, आधेई अखरान ॥ ६३२ ॥

कंप लक्षण—दोहा ।

कोप प्रमोद सु भ्रमहुते, भयते प्रगट दिखाइ
गात अंग थर थर कँपै, कंप सरस कहि गाइ ॥

कंपका उदाहरण—कवित्त ।

आये नँदनंदन सहेलरी अलीकी बन,
देखतही बाल सखी अति सुख पायोहै ।
जाय ताके पास बातें रसकी बतानलागे,
छुवत उरोजनके रोष चढ़ि आयोहै ॥

भनै असकंद वेग वातन तिरीछी ताक,
करि पहिचान कछू भ्रम हिय छायोहै ।
कान्ह दिव चाहके निशंक भरि अंकलीन्ह्यो,
झुझुकि मयंकमुखी वदन कँपायोहै ॥६३४॥

दोहा ।

झझक कछू ठाढ़ी भई, प्यारी कंपित गात ।
ज्यों समीरके परशते, डोलत पीपरपात ॥६३५॥

वैवर्ण लक्षण-दोहा ।

मोहभीत अनिष्याटते, वरन वैवरनहोय ।
सोई है वैवर्ण वह, भाषत हैं कविलोय ॥ ६३६ ॥

वैवर्णका उदाहरण-कवित्त ।

गौनहाई आई एक सरस नवेली बाल,
देख मुख जाकी प्रभा चंदहूकी हटजात ।
संगकी सहेली लैकै गृहमें प्रवेश कियो,
सौतिनको मान औ गुमान सबै घटजात ॥

(२०८) रसमोदक ।

भनै असकंद तहाँ आये नँदनंद प्यारे,
देख अतिप्रेम बढ्यौ रोक्योपै न हठजात ।
हियमें लगावतही बाल सकुचानी इमि,
जैसे निशिआवतही पंकज समिट जात ६३७
दोहा ।

हियो लगायो श्याम ज्यों, बाम रही सकुचाय ।
इंदुवदन नव तासुको, पीरो परो सकाय ॥६३८॥

आँसू लक्षण-दोहा ।

मोद क्रोध डर दुखहुते, जल भरि आवै नैन ।
अश्रु कहतहैं तासुको, पंडित कवि बुध ऐन ॥

आँसूका उदाहरण-कवित्त ।

हौतौ चलिआई आज वृन्दावन कुंजनमें,
चातक चकोरनको माच्यो जहाँ शोर है ।
वश करिबेको रसबाँसुरी बजाई आइ,
भूली सुधि मोहिं उठी प्रेमकी झकोर है ॥
भनै असकंद लाज डरते न बोली कछु,

उल्लास ३.

(२०९)

अवश चुराई लयो चित्त चित्तचोर है ।
नैननमें लागी झरझरन झलान कैसी,
पैठ्यो घनश्याम हिये नंदको किशोर है ६४० ॥
दोहा ।

श्याम अग्रकुचपै गिरत, आँसू दृगते टूट ।
मनहुँ कंज अलिजानिकै, बरसत रसहि अटूट ॥

प्रलय लक्षण-दोहा ।

अंग अंग व्याकुल सबै, तन मन कीन सम्हार ।
प्रलय कहतहैं ताहिको, जे कवि बुद्धि उदार ॥

प्रलयका उदाहरण-कवित्त ।

जा छिनते देखी मनमोहनी छबीली छवि,
ताछिनते कीरति किशोरिका तरंगमें ।
डूबिगई प्रेमके पयोनिधिमें वाकी मति,
हूलत विरहरह्यो मनहू न संगमें ॥
भनत अस्कंद अंग अंग दुति छाई वही,

(२१०) रसमोदक ।

कौन चतुराई करै नेहके प्रसंगमें ।
डोलत न नेक बैन बोलत न खोलै हग,
व्याकुल परीहै खरी मदन उमंगमें ॥ ६४३ ॥

दोहा ।

मिलत दोउ व्याकुल भये, परे नेहवश आन ।
नैनबाण इनके लगे, उनके मृदु मुसक्यान ॥ ६४४ ॥

जृम्भा लक्षण-दोहा ।

जो मिलाप विछुरन विषे, आलसकै जमुहाइ ।
जृम्भा ताहि बखानहीं, रसिक कविनके राइ ६४५

जृम्भाका उदाहरण-सवैया

। प्यारी जगी रतिमें रतियाँ अँखियाँ बड़े भोर
रही अलस्याइकै । आइकै बैठी सखीन समाजमें,
लाजभरी न हिये सकुचाइकै ॥ त्यों अस्कंद भनै
बतियाँ, रसकी जबै बूझे सबै मुसक्याइकै ।
क्यों न कहौ अपनी अपनी, यों कहै अकराइ
कछू जमुहाइकै ॥ ६४६ ॥

दोहा ।

जब जब प्यारी नींदवश, आलस सों जमुहात ।
तब मानहु छवि सिंधुमें, कंज विकश मुदजात ॥

सात्विकभाववर्णन लक्षण ।

अथहाव-दोहा ।

लीलादिक जे हावहैं, ते अनुभावाहि जान ।
कहि संयोगशृंगार में, भाषत बुद्धि निधान ६४८॥
जे सुभाव नारीनके, रस शृंगारके हेत ।
प्रगट हावमें चोपकर, वरणत बुद्धिनिकेत ६४९॥

छप्पय ।

लीला प्रथमविलास द्वितिय भाषत कवि बुधवर ।
तृतिय कहत विक्षिप्त चौथ विभ्रमहवरनकर ॥
किलकिंचित कहि वान ललित गावतहैं षष्ठम ।
सप्तम मोटाजान कहत विध यों कहि अष्टम ॥
इमि भनत कुवँर अस्कंद गिरि, नवम विहत
मन आनिये । पुनि रस शृंगारके भाव विच दशम
कुट्टमित जानिये ॥ ६५० ॥

(२१२)

रसमोदक ।

लीला लक्षण-दोहा ।

प्रीतमके भूषन वसन, आकृत रचै जु बाल ।
तियके पिय अपने सजै, लीला हाव रसाल ॥

लीला उदाहरण-कवित्त ।

अति मदमाते रस रंगमें विनोद भरे,
दोहुँनपै दोहुँनकी प्रीति अति भारी है ।
बोझौ पटपीत प्यारी उनहुँ विचारो मन,
सारी जरतारीकी किनारी दार धारी है ॥
भनत असकंद ऐसो चरित विचित्र करै,
मोहिं मन होत एक एकनपै वारी है ।
कीरति कुमारी सम राजत विहारीसम,
कीरति कुमारी इमि राजत विहारी है ॥ ६५२ ॥

दोहा ।

चितचकोर छाके रहैं, दोहुँनके मुख चंद ।
माते राचे प्रेममें, श्यामा श्याम अनंद ॥ ६५३ ॥
सजत पाग विहसत वदन, मुरलीधर अधरान ।

राधा श्याम सुनावही, मधुर माधुरी तान ॥६५४॥

विलास लक्षण-दोहा ।

नानाहाव सुभाव करि, लेइ रजायसु नाह ।
सोई हावविलास यह, वरणत सुकविसराह ॥६५५॥

विलासका उदाहरण-सवैया ।

बोढ़ि दुकूल कसी कुचकंचुकी वेनी गुही शुभ
मालती फूलन । त्यों असकंद जवाहिरके सजि
भूषण अंग बने मखतूलन ॥ हंस गयंद लजाव-
तही चली, श्यामके संग हिंडोलना झूलन । टोहि
लियो हियरा हँसिकै मन मोहिलियो दृग सैनकी
हूलन ॥ ६५६ ॥

दोहा ।

देखतही दृगजोरि त्रिय, कीन्ह्यो वचन विलास ।
हौं झूलन आई इतै, श्याम तिहारे पास ॥ ६५७ ॥

पुनर्यथा-कवित्त ।

विमल प्रकाश रूप रदन विशाल सोहैं,

(२१४) रसमोदक ।

लखत कलानिधि निज आभाकमतसे ।
अमल कपोल सोहै दुति महताबकैसी,
नैन मनौ खंजन छके हैं मदमतसे ॥
भनत अस्कंद यों अनंद नंद नंदनके,
रदन अनूप बीज दाडिम समतसे ।
वारी रही कौन गुण भाषत सु आज तेरे,
देख करकंज भौर भूलत रमतसे ॥ ६५८ ॥

दोहा ।

तुव अलि मृदु मुसक्यानमें, छवि दरशतहै ऐन ।
इयाम सनेही मद भरे, अधिक रसीले नैन ॥ ६५९ ॥

विक्षिप्त लक्षण-दोहा ।

थेरेही शृंगारमें, जो अनूप दरशाइ ।
ताहि विक्षिप्त सुहाव कहि, वरणत कवि सुख पाइ ॥

विक्षिप्तका उदाहरण-कवित्त ।

चंद्रवत आनन यों कौतुक अनूप कियो,
तारागण गोलबिंब रंगसों बधायो है ।

कैधौं मन भरिवेको मित्रन चकोरनको,
 यंत्रवत प्रेम हिय हुलसि बढ़ायो है ॥
 भनै अस्कंद किधौं गुरुजन बनायो याहि,
 हां अरु नहींको गुणसागर पढ़ायो है ।
 मदन महीप आज अधर बसो है किधौं,
 लटकनछत्र वीर अटक चढ़ायो है ॥६६१॥

दोहा ।

मदन नृपति अधरन बस्यो, रति सलाह करि ऐन।
 नथ डाँडी लटकन मनो, छत्र चढ़ायो नैन ॥

विभ्रमलक्षण-दोहा ।

उलटे भूषण वसन जहँ, और कामको और ।
 हरबराइ विभ्रम कहैं, जे कविता शिरमौर ॥६६०३॥

विभ्रमका उदाहरण-कवित्त ।

काहू सखी आइ कह्यो आये इयाम याहीमग
 सुनत तरंग उठी नेहकी लहरिकै ।
 तुरत मनोज बढ़िआयो अंग अंगनमें,

(२१६)

रसमोदक ।

हियेमें रहीना मति नेक हूँद हरिकै ॥
भनत अस्कंद साजि वेदाको करण मध्य,
आपने तौ जान भली भाँति सों सिहरिकै ।
दौरि चली देखनको कंचुकी कंधापै डारि,
पग अँगुरीन बीच आरसी पहिरिकै ॥६६४॥

दोहा ।

कर पहुँची पगमें सजी, पग जेहर कर साज ।
आतुर है इहिविधि गई देखनको ब्रजराज ॥

किलकिंचित् लक्षण-दोहा ।

क्रोध हास श्रम त्रास रस, हरष गर्भ अभिलास ।
एकवारही होतहै, किलकिंचित इमि भाष ॥६६६॥

किलकिंचित्का उदाहरण-

कवित्त ।

हर्षित हँसत गई देखन सुमन वाटी,
रूप मदमाती सुनि बतियाँ सहेलीकी ।
झाँही लखि मदन उमंग बढ़ी अंगनमें,

श्रम सौ कलीहीं लागी तोड़न चमेलीकी ॥
 भनत अस्कंद चोप चढ़ नँदनंद आइ,
 कर गहि चाही रीति सरस अकेलीकी ।
 रोष करि झझक छुड़ाइ डर मान हियो,
 धरकन लाग्यो तनी छतियाँ नवेलीकी ॥६६७॥

दोहा ।

छुवत रोषकर हरष हिय, डरवश श्रम तनु छाइ ।
 देख आपनी ओर कहि, सरस दृगन मुसक्याइ ॥

ललित लक्षण-दोहा ।

चलन आभरण अंग छवि, सरस चितौन वखान ।
 ललित हाव तासों कहत, कवि पंडित बुधवान ॥

ललितका उदाहरण-कवित्त ।

जटित जवाहिर मणि किरण सुदीप्तवान,
 विधनै बनाइ रचे सुंदर सुठारकै ।
 राजत कपोलनमें छाजत छबीली छवि,
 लाजत तिमिर गति भाजत निहारकै ॥

(२१८)

रसमोदक ।

भनत अस्कंद ज्यों गयंद मतवारो चलै,
त्योही पग धर्त बाल मगमें सिहारकै ।
कारण विशाल तामें शोभित करणफूल,
नैन अरविंद रहे तरन विचारकै ॥ ६७० ॥

पुनर्यथा-कवित्त ।

जात चली वृंदावन मगमें नवेली बाल,
चकित चकोर भये अधिक करे हितै ।
छार मलै तनुमें सुभौर दौर दौर पग,
पंकज उठाइदेत महिको जितै रितै ॥
भनत अस्कंद तैसे नासिका विलोकै कीर,
कुंजकी लतान में न जानिये दुरे कितै ।
स्वच्छ सह अच्छताके मुखकी प्रभाके लखे,
चंद्रमें छिपानी जात चाँदनी चितै चितै ॥

दोहा ।

मिलन चली नँदनंदको, ह्वैकै अधिक अनंद ।
लखि आनन दुति चौगुनी, भई चाँदनी मंद ६७२

मोटाइत लक्षण—दोहा ।

प्रथम बात बिगरत कछू, पुनि मिलापकी चाह ।
होत भावती कथा सुनि, मोटाइत कहि ताह ॥

मोटाइतका उदाहरण—सवैया ।

एक समै रसहास रहंसमें, कोउ सखी सुनहै-
रही त्यारी । सो सुनि बोल मयूरनके, पिकके
घनघोर घटा लखि कारी ॥ धीरज नेक धरचो
न हिये, असकंद भनै रसरीति विचारी । भाँवरीसी
भरै देखनको छवि, श्यामकी साँवरी कुंजन प्यारी ॥

पुनर्यथा—सवैया ।

जबते सुनो छैल छबीलो वहै, तबते या दशा
सुनौ ताकी रहै । रहै ध्यान धरे निशिवासर
श्याम, सनेहकी चाह सदाकी रहै ॥ अस्कंद
भनै वही वैननमें, अरु नैननमें वही झाकी रहै ।
चितमें जियमें तनमें मनमें मृदुमूरति मोहनी
छाकी रहै ॥ ६७५ ॥

(२२०)

रसमोदक ।

दोहा ।

परचो आन ऊपर सुने, श्याम काम छबिजाल
हिय हरषत पुलकित वदन, मिलन चाह करिबाल
बिबोक लक्षण दोहा ।

करै निरादर पीवको, त्रियकर हृदय गुमान
ताहि कहत बिबोकहैं, नृप अस्कंद बखान ।

बिबोकका उदाहरण--सवैया ।

आये इतै अधरान धरे यह, बाँसकी बाँसुरीमे
कछू गावत । मोहि सुनाय रिझाइवेको चित
चोप चढ़े यह प्रेम बढ़ावत । त्यों अस्कंद भनै
रसके वश में कछू तो हिये लाज न आवत । मैं
वृषभानुकी हौं तनया, तू अहीरको पूत जो
गाय चरावत ॥ ६७८ ॥

दोहा ।

तमक बजावत बाँसुरी, रस बरसावत आन ।
जानत जात न आपनी, हमसों करत सयान ॥

विहतलक्षण-दोहा ।

लाज विवश त्रिय पीवसों, जो कछु वैन कहैन ।
पूरण अभिलाषान सों, विहत हाव कहि ऐन ॥

विहतका उदाहरण-कवित्त ।

बैठी मणिमंदिरमें नव ब्रज बाल जहां,
आये नँदलाल देखि हियमें सुहरषात ।
लाजवश येकहू न आये कहि वैन भई,
छुवत छराको छोर अतिही प्रसन्न गात ॥
भनत अस्कंद बड़ी मैनकी तरंगनमें,
परशत अंग पट घूँवट उघरजात ।
ऊपर परत डीठि तनु घनश्यामजूके,
अचरज विशेष चंचलासी चमक जात ६८१॥

दोहा ।

पिय परशत तनु मनाहि मन, हरषत कहत न वैन ।
वदन विलोकत चतुरई, करकर बाँके नैन॥६८२॥

(२२२)

रसमोदक ।

कुट्टमित लक्षण-दोहा ।

सुखमें दुख झुठ रोषको, दरशावत जो भाव ।
पियके मिल तनुमें अली, सुई कुट्टमित हाव ॥

कुट्टमितका उदाहरण-कवित्त ।

बैठी राजमंदिरमें राजत किशोरी भोरी,
बैसवर थोरी हरि आयो करि हेतहै ।
लेत गलवाहीं कढ़ै मुखते सुनाहीं नाहीं,
पट करि वोट चाह चुंबन न देतहै ॥
भनत अस्कंद दोऊ करसों दुरावै कुच,
आनँद बढ़ावै नेह रसके समेतहै ।
कछु झझकारत सुनैन भरि कंज ऐसे,
छलबल लालवाल वशकरि लेतहै ॥ ६८४ ॥

दोहा ।

मुख फेरत हेरत हरै, गरे लगावत लाल ।
मिलत नेह दूनो करत, नाहीं करत रसाल ॥ ६८५ ॥

उल्लास ३.

(२२३)

हेला लक्षण-दोहा ।

पियसों करै विलास जो, बाल ठिठाई संग ।
हेला हाव सुग्यारहौ, नेही मदन तरंग ॥ ६८६ ॥

हेलाका उदाहरण-सवैया ।

पीतपटी लकुटी लई छीन, सु रासमें श्यामहि
नारि बनावती । अंजन आँजि उठाइकै चूनरी,
नैन नचाइ करै मनभावती ॥ त्यों अस्कंद भनै
मुसक्याइ, रिझाइकै गेहकी राह बतावती । भेद
न पावत शेष मदेश गुवालिन ताहिये नाच
नचावती ॥ ६८७ ॥

दोहा ।

नवलकिशोरी लालको, केते नाच नचाइ ।
दौर दौर छोडत गहत, हँसत हँसावत जाइ ६८८॥

बोधक लक्षण-दोहा ।

पिय त्रिय बोधित भाव कछु, करत क्रिया जहँठान ।

(२२४) रसमोदक ।

सो बोधक लक्षण कहे, द्वादश हाव बखान ६८९।

बोधकका उदाहरण-सवैया ।


दुओगये झूलिबेको नवकुंज हिंडोलनापैच
एकही संग। घटावत पैग बढ़ावत में मिलिजात दुहे
नके अंगसों अंग ॥ भनै अरु कंद बढ़ै हियमें, रति
प्रेमपयोनिध कैसी तरंग । त्रियामुखते वनमाल
गहो, पिय चुवन लेत झरै रसरंग ॥ ६९० ॥

दोहा ।

लगत पवन पटउडतकुच, खुलत गहत लखिलाल ।
पकरलेत वनमाल तब, टोरनको ब्रजबाल ६९१ ॥

हीत श्रीशिवसुत षोडशनाम प्रताप अनुभारतीशः श्रीमन्महा-
राजकुमार श्रीमत्कुँवर स्कंदगिरि विरचिते रसमोदकाभिधे
काव्ये श्रीराधाकृष्णविहारे कविजनरसिक हृदयानं-
ददायने अनुभावप्रकरणं तृतीयोल्लासः ॥ ३ ॥

चतुर्थोल्लासः ४.



अथ संचारी भाव-दोहा ।

थायीभावनमें रहत, रसथिर घूटत आव ।
नौऊ रसमें संचरत, सो संचारी भाव ॥ ६९२ ॥

दोहा ।

याते प्रथमहि कहतहौं, संचारिनके भेद ।
इनके पाछू वरणिहौं, थायी भाव निवेद ॥ ६९३ ॥

संचारिनके नाम-छंद ।

निरवेद कहत गालनि शंका औ असूया जानिये।
मदश्रमहुधृतआलस्यऔर विषाद यों मति मानिये
चिंता सु मोह सुस्वप्न और विबोध स्मृतिकोकहै ।
पुनि कहि अमर्ष सुगर्व उतसुक तासु अविहित्तहि
कहै ॥ कहि दीनता अरु हरष वीडा उग्रता निद्रा
सुनो । अरु व्याधि मरण न अपसमारहि गाइ

(२२६) रसमोदक ।

आवे गहि गुनो॥ पुनि त्रास अरु उनमाद जड़ता
चपलता वेतर्कहै । ये नामसंचारनिके तेंतीसहु
इहिविधि कहै ॥ ६९४ ॥

निर्वेदन लक्षण-दोहा ।

विपति ईरषा ज्ञान हिय, खेद पाइ जो होत ।
निजनिंदा फिर उनहिते, निर्वेदा सु उदोत ॥ ६९५ ॥
निर्वेदहिते भाव ये, प्रगट होइ निजगात ।
अश्रु ये वरण दीनता, अति उसाँसकी बात ॥

निर्वेदका उदाहरण-सवैया ।

छोड़ि सबै हरिकी चरचा यह नेहकी राह
निबाहरहीमैं । सो अब एकहु आई न काम वृथा
मतिमंद भईरी सही मैं ॥ त्यों अस्कंद भनै
मनके वश, गेहकी लाज न एक गही मैं । पीरी
परी नहीं सीरी परी कोऊ, सीरी परी जो हिये
न चही मैं ॥ ६९७ ॥

उल्लास ४.

(२२७)

दोहा ।

पगी प्रेमवश में रही, छोड़ सबै गृहकाज ।
भजे न गोकुलचंदको, अब आई हिय लाज ॥

ग्लानि लक्षण-दोहा ।

भूख प्यास रति श्रमहुते, विहबल अंग सुभाव ॥
होत कंप सुरभंगहू, ये ग्लानिके भाव ॥६९९॥

ग्लानिका उदाहरण-कवित्त ।

रति विपरीत रची मोहन विहारी संग,
वारी मतवारी रतकारीही ललकहै ।
भनत स्कंद केलि कलित कलान ठान,
बैठी रतमान आन कंपत पलकहै ॥
टूटे हिय द्वार बार विथुरे विराजतहैं,
शिथिल सुगात भये आँचल पुलकहै ।
दरश रसीले परे नेहमें रँगिले ऐन,
नैनन झलक पंचशरकी छलकहै ॥ ७०० ॥

(२२८)

रसमोदक ।

दोहा ।

थकित भई रतिरंगमें, प्यारी कंपित गात
आँगनमें बैठी कढ़ै, मुखते लहरत वात ॥ ७०१ ॥

शंकालक्षण-दोहा ।

दुवन क्रूरता मानिकै, अपनीही अनरीत
ताहीते शोचत हिये, सोशंकाकी प्रीत ॥ ७०२ ॥

शंकाका उदाहरण-सवैया ।

टोरिगयो ॥ हियको हरवा, अरु मोरिगयो
नथकी ॥ नथगूंझहै । खोरगयो नवसेज बनी, अँ
विथोरिगयो यह माँग अबूझहै ॥ त्यों असकं
भनै यों दशा, लखि का कहौगी कोऊ कारण बूझ
है। छोर छराके छुटे अँगिया फटी टूटी तन
ननदीको न सूझहै ॥ ७०३ ॥

दोहा ।

नींदभरी अँखियाँ लखै, तैसे अरुण कपोल
कौन बूझिहै ज्वाब यह, कहा देउगी बोल ॥ ७०४ ॥

उच्छास ४. (२२९)

असूयालक्षण-दोहा ।

जो सुख लहने औरको, हियमें येही ठान ।
दुःख दुष्टता क्रोध कर, येही असूयाजान ॥ ७०५ ॥

सवैया ।

परी है धुन कानन बाँसुरीकी, विरहानल
झूकनसों भरी है । भरी है विषसे या विसासिनरी
अधरान धरी तिहको हरी है ॥ हरी है वश याके
फिरै वनमें, अस्कंद भनै यह का करी है । करी
है जिन प्रीति सु वोछिनकी, तिन प्रीतम सों
हमैं का परीहै ॥ ७०६ ॥

दोहा ।

कोरेनकी येही दशा, अलिलौ देखे कूर ।
रस चाहै जानै हिये, काठ सजीवन मूर ॥ ७०७ ॥

मद लक्षण-दोहा ।

कै मिहदी के पानके, धन यौवन के रूप ।
भाव लहै मदको तहां, सो मद कहत अनूप ॥

(२३०)

रसमोदक ।

मद उदाहरण-कवित्त ।

दंपति सुरति रची विरह अनंद भरे,
नेहकी तरंगनके बढ़त तरारेहैं ।
झुकि झुकि झूम रहे अधर सुधारसको,
अति मदमाते करैं लाजहू किनारेहैं ॥
भनत अस्कंद ध्यान एकनको एक धरै,
इयामा उर इयाम इयाम इयामा उर धारेहैं ।
पीवत छकेहैं छवि यकटक देखि देखि,
रसकी गुलेगुलाब हुइ मतवारेहैं ॥ ७०९ ॥

पुनर्यथा-कवित्त ।

बनि बनि बैठे मतवारे रसमंदिरमें,
झूमत झुकत करैं बातन गहरको ।
छिन छिन चोप चाह चौगुनी चढ़त बाल,
मिहदी रचाये पानबीरी दई हरको ॥
भनत अस्कंद तैसी युगल किशोर वैस,
चतुर चवाइनके छोड़छाड़ डरको ।

उच्छास ४.

(२३१)

रूपमद छाके दुवो रतकी उमंग ठान,
प्यारी लखै आनन पियारो लखै करको ॥

दोहा ।

ढीठ तार कंचन अगिन, मदन सुहाग सनेह ।
जुरत जुरी छूटै न छबि, मद पीवत कर तेह ७११ ॥

श्रम लक्षण-दोहा ।

कै रत कै गतते हिये, खेद होइ श्रम जान ।
ताहीमें द्वै भाव ये, स्वेद उसासहिमान ॥ ७१२ ॥

श्रमका उदाहरण-सवैया

खेलिकै आइ थकी थिर है परयंकपै पौढ़िरही
मुखसानसे । प्रीतम आइ जगाइदियो मुख, बैन
कढ़े न कछू अलसानसे ॥ त्यों असकंद लई
भरि अंक, हँसाइ रिझाइ कछूक सयानसे । लेत
उसास मयंकमुखी बढि, स्वेदके बुंद चुवै मुक-
तानसे ॥ ७१३ ॥

(२३२)

रसमोदक ।

दोहा

स्वेद गिरत बढि वदनते, अलकन ऊपर वृंद ।
मनहुँ कंजते झरत है, मधुकर हित मकरंद ॥ ७१४ ॥

धृत लक्षण-दोहा ।

साहसते कै ज्ञानते, कै सुसंगते वित्त ।
धरै धीरता धृत कहैं, जे कविरचत कवित्त ॥ ७१५ ॥

धृतका उदाहरण-सवैया ।

धीरज राख हिये मन तू, विन धीरज काम न
एक सारै है । काहु दिना मनमोहनजू फिर, मेरहि
द्वार सुवीण बजै है । त्याँ असकंद भनै यह रीति
सुनीति बने पै कुनीति नरै है ॥ जाने दियो सुखमे
दुखहै, सु वही दुखमें सुख वेगहि दै है ॥ ७१६ ॥

पुनर्यथा-कवित्त ।

बाँधे पट पीत मोरमुकुट सवारे शीश,
डारे वनमाल आनि बाँसुरी बजावैगे ।

उल्लास ४.

(२३३)

झुकि झुकि श्याम यही सघन लताननमें,
मधुर मनोहर सुतान रस गावेंगे ॥
भनत अस्कंद कोक चातक मयूर शोर,
उपवन बाग नदी नदहू सुहावेंगे !
विधनै रच्यो है जोपै परम सनेह तोपै,
धीरज हिये तू राख वेई दिन आवेंगे॥७१७॥

दोहा ।

नेम निबाहत जगतको, रसिकनको सरदार ।
याही ते जग विदित है, नाम जगत आधार॥७१८॥

आलसलक्षण-दोहा ।

रतिरणते कै जगनते, जो उपजै अलसान ।
आलस ताहीको कहत, जे कवि सुमति सुजान ॥

आलसका उदाहरण-कवित्त ।

बृंदावन वीथिनमें रहस मचायो श्याम,
श्यामा अनुराग भरी छवि दरशत है ।
जागी प्रीतिरीतिमें छकी है छवि अंगनमें,

(२३४) रसमोदक ।

प्रेमकी तरंगन अनंग सरसत है ॥
भनत अस्कंद सुधानिधिसों वदन देखि,
कुवैर किशोरहो चकोर परशत है ।
देह भरी आलससों नेहभरी डीठि लसै,
नींदभरी आँखिनसों रस बरसत है ॥ ७२० ॥

दोहा ।

पिय परशत तनु हरषमन, अतिहि प्रफुल्लित गात ।
नींद भरी आँखियानसों, प्यारी कछु अलसात ॥

विषाद लक्षण-दोहा ।

चलै न एक उपाइ जहँ, शोच बढै हिय आन ।
सो विषाद भाषत रसिक, जे कवि बुद्धि निधान ॥

विषादका उदाहरण-सवैया ।

ब्रजराजके काज चली सजिकै, मिलिवेको
सहेटमें ज्यों घनहै । नदिया बढी पंक भई मगमे
झलाझोकन सों बरसों घनहै ॥ अस्कंद भने

उल्लास ४.

(२३५)

तरु नीचे खड़ी, हिये शोचत बात कहावन है ।
मनमोहनको मिलिबोहु गयो, ननदीके उराह-
नेको सुनहै ॥ ७२३ ॥

दोहा ।

होत न मन अभिलाष कछु, सुमति कुमति है जात ।
अरे नेह धीरज धरै, विधिसों नहीं बसात ॥ ७२४ ॥

पुनर्यथा—सवैया ।

लखौ चारहू ओर दिशा विदिशा, वगरो योव-
संत पसारो किये । पिक मोर चकोर न मानै
कह्यो, चले आवत भोर दरारे दिये ॥ अस्कंद
भनै तुम ऊधौ सुनौ, किहिभाँति सों धीरज
धारै हिये । हम तौ ब्रजकी वनवासी भई वे अनंद
भये इक दासी लिये ॥ ७२५ ॥

पुनर्यथा—कवित्त ।

नवब्रजवाल नंदलालको लेआई गहि,
यशुदा हमारे चोर माखन चुरायो इन ।

(२३६)

रसमोदक ।

भनत अस्कंद सुनि दौरि आई मंदिरते,
ताही क्षण रूपनाह ग्वालनीको धरो तिन॥
बूझत कहाँहै कौन ठामहै कितैहै गयो,
कौनको गद्देहै कहा तू तोरी बतावे किन ।
देखतही वैसही ठगीसी रही ठाढ़ी ठौर,
बोली वह चोर मेरी आंखिन समानो इन॥२६॥
दोहा ।

कठत न कौनो यतनसे, देती तुम्हें दिखाइ ।
छिप्यो श्याम पुतरीन में, वही साँवरो आइ ॥

मति लक्षण—दोहा ।

उपजै हिये विचारवर, नीति निगमते आन ।
ताही को मति कहतहैं, नृप अस्कंद बखान ॥

मतिका उदाहरण—सवैया ।

वह दीनदयालु कृपा करिहै, छिन एकको
ध्यान सुभारियोना । चितको वशमें करि चोप
चढ़ाइ, मनोरथ और सम्हारियोना ॥ स्कंद

उल्लास ४.

(२३७)

भनै अपने मनसों, इतनी मति तौ तुम टारियो
ना । करियो सब काज भले जगके, इक रामको
नाम विसारियो ना ॥ ७२९ ॥

दोहा ।

रसना रस चाख्यो बहुत, रामनाम रस चाख ।
चाख चाख विधनै करे, वेद भागवत शाख ७३० ॥

चिंता लक्षण-दोहा ।

चिंता कौनिहु भाँतिकी, अपने चितमें होत ।
ताहीको चिंता कहत, रसिक जननके गोत ॥

चिंताका उदाहरण-कवित्त ।

गोकुलकी गैल में बनायो घर ऊंचो करि,
गुरुजन लोगनको नाम कहा धरिये ।
आवै इत बाँसुरी बजावै मृदुताननसों,
कानन सों रहै बची जौलैं हिय डरिये ॥
भनत अस्कंद चोप चौगुनी चढ़ावै अंग,
मदन बढ़ावै क्यों न नेह वश परिये ।

(२३८)

रसमोदक ।

प्रीतम न आवै रैनि कितहुँ बितावै श्याम,
सखिन मिलावै सो उपाइ कौन करिये ॥ ७३२ ॥

दोहा ।

टरत न कौनौ भाँतिसों, चलत न अपनी नीत ।
मोको जानी जातहै, होत साँवरो मीत ॥ ७३३ ॥

मोह लक्षण-दोहा ।

जबै आपनी देहको, ज्ञान आपुही जाइ ।
चिंता अरु दुख विरहको, मोह कहत कविराइ ॥

मोहका उदाहरण-सवैया ।

मची फाग लली सँग खेलैं सबै, वहाँ आगयो
श्याम कहूँ वनसों । तहाँ नैननही की घलाघलीमें
नजरैं जुरी दोहुँनकी तनसों । स्कंद भनै सुधि
नेक रही न खडे रहे दोउ सँकोचनसों ।
मनमोहन मोहि प्रियासों रहे, प्रिया मोहिरही
मनमोहनसों ॥ ७३५ ॥

उल्लास ४.

(२३९)

दोहा ।

लागी लगन सनेहकी, मदन भयो विचवान ।
मोहिगये मन दुहुँनके, डीठ करी पहिंचान ७३६

स्वप्नलक्षण-दोहा ।

जो सोवत सुखनींदमें, स्वप्न विलोकत ऐन ।
सोई स्वप्न विचार कर, कवि भाषत मन चैन ॥

स्वप्नउदाहरण-सवैया ।

प्यारी परी परयंकपै सोवति, रूप झलाझ-
लकी झलकैहै । देखरही मनमोहनको, अनुसार-
तवैन मलै पलकैहै ॥ त्यों अस्कंद भनै पट
बोद्धत, बोट करै छतियां ललकैहै । चौंक परी
सखी भेंटतहीं, मुखचंदपै छूटपरीं अलकैहै ७३८

दोहा ।

जगत कहत सखियानसों, मुख सपनेकी बात ।
मेरो मन हरिने लियो, हिय खाली अलसात ७३९

(२४०)

रसमोदक ।

विबोध लक्षण-दोहा ।

जगत नींद श्रम खोइकै, जो हियमें अलसात ।
सोविबोध वर्णत सुकवि, अतिहीं प्रफुलित गात ॥

विबोधका उदाहरण-कवित्त ।

प्रातसमै प्यारी उठि बैठी परयंकही पै,
नींदभरी आँखिनसों हिय अलसाइकै ।
पीक भरी पलकैं त्यों अमल कपोलनपै,
काजरकी रेख फबी अतिमुख पाइकै ॥
झाँकत झरोखे छूटि अलक छिपायो मुख,
भनत अस्कंद लियो कर सुरझाइकै ।
संधि पाइ मानौ शशि ग्रसित कियोहै राहु,
तजिकै विरोध लीन्ह्यों कमल छुड़ाइकै ॥

दोहा ।

लपटानी पियसों अली, मनमानी जगभोर ।
ज्यों डूबत ऐंचत गहत, पावत चंद चकोर ७४२

उच्छास ४. (२४१)

स्मृतिलक्षण-दोहा ।

सुमिरण बीती वातको, करत हियेमें जौन ।
ताहीको स्मृति कहत, जे कवि रसके भौन ७४३

स्मृतिका उदाहरण-कवित्त ।

बाँसुरी बजाइबो रिझाइबो सुगाइबोई,
नेह सरसाइबो निकुंज सुखसारीके ।
रहस रसमंडलमें नाचिबो नचाइबोरी,
खेलिबो खिलाइबो अनंद अधिकारीके ॥
भनत अस्कंद मढ़ी चित्तमें हमेश रहै,
प्रीतिकी प्रतीतिवारी छवि मतवारीके ।
भूलत न एकोक्षण झूलत सदाहीरहै,
नैननमें मनमें चरित्र गिरिधारीके ॥ ७४४ ॥

दोहा ।

झुकि झुकि कदमलतान तर,वंशी धरि अधरान ।
कान्ह बजावत तान जब, कोनमिलैतजि मान ॥

(२४२)

रसमोदक ।

पुनर्यथा-सवैया ।

लाल गुलाल वलाहकते, वरसै झरी झोंक
केसर रंगकी । त्यों अस्कंद छटा छविकी, चमके
चपलासी मनोहर अंगकी ॥ लै गलबाँही अनं
कियो, वरणों का दशा वह मै न उमंगकी । भूत
नहीं हमको कबहुँ, वह फागकी खेलन साँवरे संगकी
दोहा ।

का फूलतती केतकी, का गुंजतते भौर
का झूलतते मिलि सबै, अबका कहिये और
अमर्ष लक्षण-दोहा ।

दूजे को अभिमान जब, मेटब चाहत ऐन
सो अमर्ष वरणत सुकवि, करत हिये महँ चैन
अमर्षका उदाहरण-सवैया ।

कर कंजन रंजन खंजनके मन, अंजन नै
लगावति है । मुख खोलति बोलति वैन सुधास
ो किल चंद लजावति है ॥ स्कंद भनै अलिव

उल्लास ४.

(२४३)

अवली, अलकैं छुटकाइ दिखावतिहै । मद भंजन
सौतिनके हियको, पियको तिय बोलि पठावतिहै ॥

दोहा ।

नथ पाहिरत लखि कीर तनु, मेटनको अभिमान ।
पान खाइ फल विवपै, फेंकत पीक मुजान ॥७५०॥

गर्वलक्षण-दोहा ।

जहँ बल विद्यारूपते, प्रगट गुमान दिखाइ ।
गर्व कहत ताको सुकवि, नेहहिये सरसाइ ॥७५१॥

गर्वका उदाहरण-कवित्त ।

पकरलिआऊंना गुविंदको निकुंजनते,
इन कर कंजन ते छूटिबो छुड़ाऊंना ।
चरित दिखाऊंना अनेक बहुभाँतिनके,
वैननते रसकी उमंग जो बढ़ाऊंना ॥
भनत अस्कंद नैन सैनन वशी करके,
अलकन बीच ईच मन उरझाऊंना ।

(२४४) रसमोदक ।

मेघनके मोरनके चंदके चकोरनके,
गुणना कराऊं तौ मैं ग्वालिन कहाऊंना ॥

दोहा ।

मेरेही आये इतै, चखन चकोरन कीन
प्रफुलित भई कमोदनी, पंकज भये कलीन ७५३।

उत्सुकताका लक्षण—दोहा ।

जहाँ मित्रके मिलनको, सहि नहिं सकतविलंब
उत्सुकता तासों कहत, जे कविमति अवलंब ।

उत्सुकताका उदाहरण—कवित्त ।

ज्योंही रविमंडल छिप्योहै मेरुमंडल में,
त्योंही मन अधिक अनंद भयो प्यारीको ।
मिलन चलीहै अति आतुर उमंग ठान,
भूलगये भूषण मनोज मतवारीको ॥
भनत अस्कंद मोर सुवश चकोर करै,
वदन प्रभाते मंद चंद उजियारीको ।
कुंजनविहारीकोमिलीहै अनुराग वारी ॥

उल्लास ४.

(२४५)

कौतुक कलारी चंचलासी घटा कारीको ७५५
दोहा ।

मिलन चली आतुर अली, मग पग धरत न धीर ।
जैसे कड़ी कमान ते, छूट जात है तीर ७५६ ॥

अविहित लक्षण--दोहा ।

चतुराई करि आपनी, दशा दुरावति जौन ।
भाव बतावति ताप तजि, अविहित कहिये तौन ॥

उदाहरण--सवैया ।

ज्योंहीं गई चलि कुंजनमें, लखि बोलकुहे
कुहे शोर छयेहैं । चोंच चलाई कपोलनपै, मुख
फेरत वेणी विथोर गयेहैं ॥ त्यों अरु कंद भनै दशा
और कहै दृग आवत ये उनयेहैं । भागत भाग
बची हौ भट्ट, वन लागन मोर चकोर भयेहैं ॥

दोहा ।

त्रिय पिय लखत मनोजवश, ठाढ़ी कंपित गात ।
बूझो सिसकत दाबि कुच, कहै शीत दरशात ॥

(२४६)

रसमोदक ।

पुनर्यथा-सवैया ।

ऐसी घनी घमसान मची, अधाधुंध गुलालक
धूमर छाई । हौहूं गई धँसि ज्योंहीं वहाँ बिछले
पग रंगमें नीचही आई ॥ त्यों अस्कंद भनै सरा
बोर, भई मनमें अतिही अकुलाई । का कहौं आज
दबीती तहाँ, पर मोहन वेगहीं मोहिं उठाई ७६० ।

दोहा ।

सुधि आई पियकी तिये, भरिलाई युग नैन ।
कहत सखिन सों देखियो, कहूँ दव्यो त्रसरेन ७६१ ।

दीनता लक्षण-दोहा ।

दीन परै जो विरहते, या दुखहीते कोइ ।
ताहि रसिक मन मथन कर, कहैं दीनता सोइ ।

दीनताका उदाहरण-सवैया ।

आग लगावत है तनुमें, विरहानलकी चित
चित घनेरी । चोप चढ़ाइ चकोरनको, मुखफे
करै फिर रौनि अँधेरी ॥ त्यों अस्कंद भनै कछु

उल्लास ४. (२४७)

एक, उपाय चलै न बनै सुन मेरी । जौलौं विदे-
शते आवै न कंत, हहा विधि मेटिदे चंदउजरी ॥

दोहा ।

हिमकर अमर विशेषहो, सुधारूप सरसाइ ।
पै न काहु वे मारिकै, फिर तुम दियो जिवाइ ॥

पुनर्यथा-सवैया ।

प्राणनते हियते मनते सखि, तोसों न राखत
नेक जुदाई । तापै इतेक करी विनती मैं, हहालौं
कहा पै दया नहिं आई ॥ येती कठोरता मोसों
कहा, अस्कंद भनै तुम्हें कौन सिखाई । वा
मुरली मुरलीधरकी, मिस कौनहूँ एकहूबार
न लाई ॥ ७६५ ॥

दोहा ।

तेरेई करमें रहत, मेरे चितकी बात ।
पैन करत मनकी कहूँ, बेदरदिन दरशात ७६६ ॥

(२४८)

रसमोदक ।

गरजी अरजी करत है, वरजी रहत न नेक ।
परघर रैनि विताइबो, इयामत नौ यह टेक ॥ ७६७ ॥

हर्षलक्षण-दोहा ।

होइ अधिक आनंद हिय, जहाँ कौनहुं भाँति ।
प्रफुलित गात हरष यही, वरणो कविन जमाति ॥

हर्षका उदाहरण-कवित्त ।

सरस रँगीली सरसीली नेह रीतनकी,
वंशी धुनि कान परी चोप चटकोरकी ।
मुदित भयोहै मुख उदित भयो ज्यों चंद,
अधिक अनंद भरी प्रीति उर धारेकी ॥
भनत अस्कंद हिये हरषित गात भई,
आवन विचार कर प्रीतिपटवारेकी ।
दृगन लसीहै अंग अंगन गसीहै आइ,
चित्तमें बसीहै मुसक्यान प्राणप्यारेकी ॥

दोहा ।

सजन सजन हित ही लगी, तनु श्रृंगार ब्रजबाल

मजन लजन आपुहि लगी, आये तिम नँदलाल ॥

पुनर्यथा-सवैया ।

बैठी जहाँ हिरकी खिरकी, निरखे अपनो
ब्रजबाल हियोहै । पल्लव फूल गुलाबके संग, सुमा-
लिन मौर रसाल दियोहै ॥ देखतही अस्कंद भनै,
अति आतुरसों करि हर्ष लियोहै । दूनी बढ़ी
दुति आननकी, मनौ पूरण चंद प्रकाश
कियोहै ॥ ७७१ ॥

दोहा ।

रविको छिपत कुमोदनी, ज्यों पावत सुख चैन ।
त्यों हरषित प्यारी भई, लखि अँधियारी रैन ॥

वीड़ा लक्षण-दोहा ।

लाज हिये अतिही बढ़ै, कौनहु कारण पाइ ।
वीड़ा ताहि बखानहीं, जे प्रवीण कविराइ ॥

वीड़ा उदाहरण-कवित्त ।

कुंदनते सरस अंग दरशत भूषण हैं,

(२५०)

रसमोदक ।

जटित जवाहिरके बेंदालाल भालहै ।
अलक विरूध मोती जाल सों कपोलनपै,
जरीकी किनारी श्वेतसारी वोढ़ी बालहै ॥
भनत अस्कंद नंदलालको विलोकतहीं,
लाजवश घूँघट कर वदन रसालहै ।
मानौ मारतंड मंड उतर अकाशहीते,
तारन समेत चंद गंगमें विशालहै ॥ ७७४ ॥

दोहा ।

नैन मिलाय रिझायले, कत लजाय करि चाह ।
क्षणक छबीलेको छुवन, देत नाहिनै छाँह ॥

पुनर्यथा-सवैया ।

तुमसी नहीं देखी कहूँ अबला, पै अनीति
लखे कहि आवतहै । मिलि मोहनसों रतिकी
बतियाँ, करि क्यों नहीं चोप चढ़ावतहै ॥ अस्कंद
भनै यह यौवन रंग, सदा सखि जोर जनावतहै ।
पर प्रीति प्रतीतिमें लाज कहा, जो घरी फिरि फेर
न आवतहै ॥ ७७६ ॥

दोहा ।

सुनत सहेलिनसों जबै, पिय मिलिवेकी बान ।
रहत बाल शिरनाइकै, दावि कपोलन पान ॥

उग्रता लक्षण—दोहा ।

कहत उग्रतातासुको, निरदयपन नहिं होइ ।
रसग्रंथनमें वरणिकै, कवि कोविद सब कोइ ७७८ ॥

उग्रताका उदाहरण—सवैया ।

बजी है सुनैको सुचेत रहै, यह तीक्ष्णकामके
बाण सजी है । सजी है कहा वश आपनो री,
कुलकानि तौ याही सनेह तजी है ॥ तजी है यहू
नेहसे वसकै, असकंद भनै रसरंग मजी है ।
मजी है कठोर रजी विषसों, विसवासिन वाँसुरी
फेर बजी है ॥ ७७९ ॥

दोहा ।

रे विसवासी भौर तू, इत कत आवत दौर ।
क्यों रोवतसों फिरत है, मोहिं रुवावत और ७८० ॥

(२५२)

रसमोदक ।

पुनर्यथा-कवित्त ।

आवे घनघोर जोर दिशन दबाये दौर,
धुरवा धुकार करै नीर वर झिरकै ।
चातक चकोर मोर दादुर मचाये शोर,
चंचला चमंकिरहै नेकहू ना थिरकै ॥
भनै असकंद करी विधिने कठोरताई,
पावस पठाई रहै कैसे धीर धरकै ।
बोलै अधरात जात कोकिला कसाइनसी,
तूक देत करत करेजिनकी किरकै ॥७८१॥

दोहा ।

मनमानी आनी हिये, करि विदेशमें प्रीत ।
निरदैपन हमसों कियो, अरी साँवरेमीत ॥७८२॥

निद्रालक्षण-दोहा ।

कहत सोइबो सुपनको, सोई निद्रा जान ।
जब अपात नाड़ी चलै, सो कवि करत वखान ॥७८३॥

निद्राका उदाहरण-कवित्त ।

सुमन छरीसी है परीसी परी सोवै बाल,
स्वेदकण जाल वार मुक्ताहल वृंद वृंद ।
मुकुर कपोल गोल अधर अमोल विंव,
नैन अरविंद वार अलक फणिंद नंद ॥
भनै असकंद वार डारिये निकाई कोटि,
रतिकी लुनाई औ लुनाई उपमा अमंद ।
गातकी गुराई पै ललाई वार कुंदनकी,
मुख प्रतिविंबपै सुवार वार डारै चंद॥ ७८४॥

दोहा ।

बाल परी परयंक पर, सोवत अधिक अनंद ।
कुच पकरत चुम्बन करत, हिय हरषित नंदनंद॥

पुनर्यथा-कवित्त ।

कंचनपलंग पाये जडित जवाहिरके,
तापर सुमनसेज साजि मखमलकी ।
सोवति अनंदसों निशंकित मयंकमुखी,

(२५४) रसमोदक ।

अंग अंग उड़त तरंग परमलकी ॥
भनै असकंद तनु शोभित प्रस्वेद बुंद,
जलज समेत यों प्रभा है कंजदलकी ।
चकित चकोर रहैं मोहि चितचोर रहैं,
मंद भई चाँदनी सुचंद निरमलकी ॥७८६॥
दोहा ।

अमल कपोलनकी प्रभा, कमल अरुणसमजान ।
चञ्चरीक गुंजत फिरैं, पुंज पुंज सुखमान ॥७८७॥

व्याधि लक्षण-दोहा ।

कामविरहते होत जहँ, तनु संतापित आइ ।
व्याधि कहत ताको सुकवि, रसग्रंथनमें गाइ ॥७८८॥

व्याधिका उदाहरण-कवित्त ।

सदन विसेज परी वदन भयो है मंद,
मदन बढ़ाइ ज्वाल अनिल अकूतरी ।
छिनछिन आह रहै तुव चितचाह रहै,
देखतही राह रहै चित्रकैसी पूतरी ॥

उल्लास ४.

(२५५)

भनत अस्कंद वैन चातक सुनैते बाल,
उझक परै है झाक झरफन सूतरी ।
विरह व्यथाकी कथा वरणी न जात मोपै,
लोटिलोटिजात जैसे लोटन कबूतरी ॥७८९॥

दोहा ।

दूनी दूनी बढ़ति है, छिन छिन विरह बलाइ ।
दरश नीर पाये विना, सो अब किमि सियराइ ७९०

पुनर्यथा—कवित्त ।

रहत सुप्राण ताके रावरी विलोकै वाट,
सुमन कमान आन हूक सरसत है ।
हिय हहरात लेत विरह उसासहीते,
परत प्रकाश चंद गात झुरसत है ॥
भनत अस्कंद चारु चंदन गुलाबनीर,
अतर गँभीर सीर नाहिं परशत है ।
बरसत मेह जोर झलन झलान तऊ,
वाके गेह ग्रीषमकी ज्वाल दरशत है ॥७९१॥

(२५६)

रसमोदक ।

दोहा ।

वाके विरह वियोगकी, दशा कही नहिं जाइ ।
चंद चाँदनीमें परी, खरी त्रिया विलछाइ ॥ ७९२ ॥

अपस्मारलक्षण-दोहा ।

श्वास बढै गृहदुःखते, गिरै कंप महिआन ।
फेन कढै मुखते वही, अपस्मारकी वान ॥ ७९३ ॥

अपस्मारका उदाहरण-कवित्त ।

वंशीधर वांसुरी बजावतही जाइ कढ़े,
झाँकत झरोखा रही सूधोही सुभावरी ।
ताहीतन हेर शर ऐसे नैनसैननसों,
भनत अस्कंद भई विकल सुसाँवरी ॥
झूमिगिरी घूमि नैन मुखते सुफेन बहै,
कंपित सुगात वात कहत न बावरी ।
ताक्षणते सेजपै परीहै चित्रकीसीलिखी,
जाक्षणते मूठसी लगीहै डीठरावरी ॥ ७९४ ॥

उल्लास ४. (२५७)

दोहा ।

लेत उसाँस घरी घरी, परी विकल अकुलाइ ।
मदनतीर तीखे लगे, वाव न परतलखाइ ॥ ७९५ ॥

पुनर्यथा-सवैया ।

काहु समै वृषभानुकी नंदनी द्वारपै ठाढी
हती सुखपाइकै । श्याम कढ़े तितही जुरे नैन
लगी हिय डोठ सुबाणसी आइकै ॥ त्यों अस्कंद
भनै वशमैनके, चैन परी न रही मुरझाइकै ।
कंपितगात गिरी महिमैं, हियघायलसी मनमें
अकुलाइकै ॥ ७९६ ॥

दोहा ।

कहा भयो कैसो भयो, खड़ी कहै ब्रजनार ।
प्रीतिरीति जानै नहीं, कोटिन करै विचार ॥ ७९७ ॥

आवेग लक्षण-दोहा ।

चाहत वेग जु नेहते, या डरहीते मान ।
सुकवि कहत आवेगहैं, ताको करत वखान ॥ ७९८ ॥

(२५८)

रसमोदक ।

आवेगका उदाहरण--सवैया ।

देखी शिषा सखियानकी वान, श्रृंगार बनाइ
वेकी मनमानी । बैठि अकेली सँवारत केश लगी
हिय चाहकी राह दिखानी ॥ त्यों अस्कंद भनै
इतनेमें, सुनी मनभावतेकी मृदुवानी । आरसी
बोढ़नी काकई छोड, छुटीननदीके गरे लपटानी ।

दोहा ।

सुनत इयाम मग सखि वचन, लटपटाइ उठि धाइ
अटा चढ़ी झांकतझरफ, चट कपाट खटकाइ ।

पुनर्यथा--कवित्त ।

आज इयाम निकरो अचानक ई मारगहो,
वाँसुरी बजाय गाय मधुर मलारहै ।
कीरतिकिशोरी भोरी भनत अस्कंद भई,
गोकुल के चंदको चकोर अनुहारहै ॥
इत उत देखि चलै मग पग द्वैक रही,
तन मनहीकी सुधिबुधि ना सम्हारहै ।

उल्लास ४. (२५९)

बोरीहीसी फिरत ठगोरी कर ख्याल लौना,
नंदको ढिढौना पट टोना गयो डारहै ॥ ८०१ ॥

दोहा ।

उठिधाई सुनि बाँसुरी, आई कुंजन धौर ।
पात पात ढूँढ़त फिरै, सुमनहेतु जिमि भौर ॥

त्रासलक्षण-दोहा ।

अहित कौनहुते जहाँ, भय विशेष हिय होइ ।
काहूको कितहुँ कछू, त्रास कहावत सोइ ॥ ८०२ ॥

त्रासका उदाहरण-कवित्त ।

बैठी सखियानमें सुमान हिय ठान त्योंहीं,
गरब गुमान भरी भौहन चढ़ाइकै ।
त्योंही घन घुमड़त उमड़त आये दौरि,
बरसत जोर नीर झलन झपाइकै ॥
भनत अस्कंद भई चंचला चमंक तैसी,
तड़कि तड़ाक घोर सुनिउठि धाइकै ।
तजिकै सयान भई अति भइ मान प्यारी,

(२६०) रसमोदक ।

पियको मिलीहै अंक हियसों लगाइकै ॥ ८०४ ॥

दोहा ।

चतुर चयाइनके डरन, होत दूबरी देह ।
मिलि न सकत नँदनंदको, हिय गुरुजनकी तेह ॥

पुनर्यथा-कवित्त ।

झूलत हिंडोरे नवलाइली सखीन मध्य,
प्रफुलित कुंजनमें अधिक अनंदहै ।
मोर करैं शोर घनघोर मृदु पौन जोर,
वरसत मेह यों फुहारनके वृंदहै ॥
भनत अस्कंद लाल सैनदै बुलायो आइ,
डरवश ज्वाब बाल आवत न छंदहै ।
चंद ऐसो वदन विलोकि नँदनंदनको,
ताको भयो तुरत मुखारविंद मंदहै ॥ ८०६ ॥

दोहा ।

मधुर वचन भाष्यो सखी, ये आये घनश्याम ।
सडर सुनत ताही हिये, लपटानी वह वाम ८०७

उन्माद लक्षण—दोहा ।

वचन विरथ रोदन हँसन, सुरत भूलिवो जान ।
कहत ताहि उनमादहैं, जे कविजन बुधवान ॥

उन्मादका उदाहरण—सवैया ।

पागी हिये पर पूरण प्रीति सुराधिकै लागी
रहै धुनि श्यामकी । रोवै हँसै करै आपुही मान
सुनैहरमेंहू बही रट नामकी ॥ साजत सेज भनै
अरु कंद, सुभेटै न चीन्हैं सखी निज धामकी ।
मौन रहै क्षण बोलै कछूक कछूको कछू यों
व्यथा बढी कामकी ॥ ८०९ ॥

दोहा ।

यों मंदिर वृषभानुको, इत न कुंज घनश्याम ।
लाज न आवत नेकहू, टेरत लै लै नाम ॥ ८१० ॥

जड़ता लक्षण—दोहा ।

ज्ञान आचरण नामकी, रहै सामरथ नाहि ।
सुने लखे हित औ न हित, कहिये जड़ता ताहि ॥

(२६२) रसमोदक ।

जड़ताका उदाहरण-कवित्त ।

देखनके काज ब्रजराजको नवेली वाम,
ठाढ़ी रही मगमें मृगीसी पल मारैना ।
ताही समै वंशीधर बाँसुरी बजाई आय,
मधुर मलार गाइ लाज उर धारैना ॥
भूली गौन ज्ञान सुधिगेहकी न वाहि कछू,
भनै अस्कंद और कारज विचारैना ।
यकटक टारै नाहिं सखिन निहारै नाहिं,
छूटत छराके छोर एकहू सम्हारैना ॥८१२॥

दोहा ।

छवि छाके वाके लगे, दृग अनियारे जोर
दोहुनको दोहू लखैं, जैसे चंद चकोर ॥ ८१३ ॥

चपलता लक्षण-दोहा ।

थिर ह्वै अनुरागादिते, रहै न मन इकठाम
चाहै चित आचरणको, सोइ चपलता नाम ।

चपलताका उदाहरण--कवित्त ।

लगन लगीहै हिय मगन मनोज वारी,
सरस विहारी संग चाहत अनंदको ।
भनत अस्कंद रूप रतिकी हरणवारी,
मौज मतवारी छोड़ सब दुखद्वंदको ॥
भौरनकी अवली निवारत चकोरनकी,
खोलि मुख ढाँप खोलि करि छलछंदको ।
विकल निकुंजनमें ढूँढ़त फिरत ऐसो,
भरमत भौरि जैसे कंज मकरंदको ॥ ८१५ ॥

दोहा ।

इत उत फिरत मनोजवश, झँकत झरोखन ऐन ।
परी आन पिंजर मनौ, तूती नवल नचैन ८१६॥

वितर्क लक्षण--दोहा ।

कीजै जहाँ विचार मन, उर उपजत संदेह ।
सो विकर्त कविजन कहत, रसग्रंथनके नेह ॥

वितर्कका उदाहरण--कवित्त ।

हौतौ चलिआई जल यमुना अन्हाइबेको,

(२६४) रसमोदक ।


सखिन अकेली भली सूधेही सुभाइहै ।
नजर न आवै वन सघन सिवाइ कछू,
इत चली आवै देख अति सुख पाइहै ॥
भनत अस्कंद झूठी मूठी अनूठी रूठी,
यतन अनेक कौन सुमति बचाइहै ।
अरुण कपोल गोल लोल अति मोल बोल,
नैन सैन मदन उमंगको छिपाइहै ॥ ८१८ ॥

दोहा ।

कितहु रम्यो कैसो भयो, कहाँ गयो किहि ठौर
काननलों कानन परी, नमन बाँसुरी दौर ८१९ ।

इति श्रीशिवसुत षोडशनाम प्रताप अनुभारतीज्ञः श्रीमन्महा-
राजकुमार श्रीमत्कुँवर स्कंदगिरि विरचिते रसमोदकाभिधे
काव्ये श्रीराधाकृष्णविहारे कविजनरसिक हृदयानं-
ददायने अनुभावप्रकरणं चतुर्थोल्लासः ॥ ४ ॥

पंचमोल्लासः ५.



अथ स्थायीभाव-दोहा ।

उर उपजत अनुकूल रस, ह्वै परिपूरण आइ ।
है सब भावनते शिरे, ते स्थायी भाइ ॥ ८२० ॥
रति कहिये पहिले द्वितिय, हासी तीजे शोक ।
क्रोध कह्यो उत्साह पुनि, भय गलानि अवलोक ॥
फिर अचरज अरु खेद कहि, थायी भाव प्रमान ।
नौऊरसके नौ इतै, वरणे कवि बुधवान ८२२

रतिलक्षण-दोहा ।

पूरण हियमें होत जहँ, प्रीति आपनी चाह ।
सो प्रवीण रति कहतहैं, जे पंडित कविनाह ८२३

रतिका उदाहरण-कवित्त ।

इत उत नजरि बचाइ गुरुलोगनकी,
सजत श्रृंगार अंग भूषण सिहारिकै ।

(२६६)

रसमोदक ।

बढ़त उमंग मैं सरस तरंग रूप,
दरशत प्रीति रीति रसवश डारि कै ॥
चाह करि मिलन मनोरथ हियेमें ठानि,
भनत अस्कंद सेज साजति सुधारिकै ।
साँवरी सलोनी वह मूरति मनोहरकी,
छवि छकिरहत प्रमोदित निहारिकै ॥ ८२४ ॥

दोहा ।

करन लगी उर चाह पिय, धरन लगी मन धीर
परन लगी तीखी नजर, डरन कामकी पीर ।

पुनर्यथा—सवैया ।

सखियानके संग कहूँ कबहूँ, विहसै रसक
बतियाँसो करै । मनमंदिर बैठी अकेली कहूँ
सजिअंग शृंगार प्रमोद भरै ॥ अस्कंद भनै
हियचाह बढ़ी, मिलिबेको करै मन छोड़ि डरै ।
मनमोहन मूरति मोहनीपै, अँखियानते रंग चुबो
परै ॥ ८२६ ॥

उल्लास ५.

(२६७)

दोहा ।

प्रेमलता पूरण हिये, बोई मदन जमाइ ।
इयामरूप तुव अमी विन, कहुँ न जाय कुम्हिलाइ ॥

हास लक्षण-दोहा ।

बने बनाये रूप अरु, कछु कछु भीत प्रकास ।
हँसन होत तासों प्रगट, सो कहि हासविलास ॥

हासका उदाहरण-कवित्त ।

धरिकै सखीको रूप एक समै नंदलाल,
निकरे करि ख्याल बरसानेकी खोरीहै ।
तहाँ ललताने बात राधिकै जनाई जाइ,
उन बुलवायो गई भीतरलै भोरीहै ॥
भनत अस्कंद पहिंचानकै विशाखहूने,
पदम बतायो लखै चरित बड़ोरीहै ।
हँसि इठलाइ रहै गोपिनके वृंद वृंद,
मृदु मुसक्याइ रही कीरति किशोरीहै ॥ ८२९ ॥

(२६८)

रसमोदक ।

दोहा ।

विहसि कहै कीन्ह्यो भलो, ऐसो चरित विचार ।
कौन मारिहै कंसको, तुम तो भये सुनार ॥

हासपुनर्यथा-कवित्त ।

कीरतिकिशोरी छरीदारको बनाये वेष,
श्याम ढिग आइ कह्यो भौंहनि चढ़ाइकै ।
लूटि लूटि खायो दधि कौनके कहते यहाँ,
मरम न पायो अब पायो वरियाइकै ॥
कंसने बुलायो तोहिं भनत अस्कंद लियो,
कर गहि जाइ अलि मृदु मुसक्याइकै ।
डर हिय मान कछू फिर पहिंचान प्यारी,
हँसत लगायो अंक अति सुख पाइकै ॥८३१॥

दोहा ।

मिलत लख्यो सखियानने, विहसि कही यह साँच ।
चोपदारकी रीति यह, प्रथम लेतहै लाँच ॥८३२॥

शोक लक्षण-दोहा ।

दुख प्रगटै हित हानिते, अहित लाभते आइ ।
सो स्थायीभाव में, शोक कहत कविराइ ॥८३३॥

शोक उदाहरण-कवित्त ।

येतोहैं न सोच कछू ऐसे गढ़ लंकहीको,
मेघनाद आदि जोपै निश्चर भयेहैं छार ।
करि पदप्रीति रीति सुमति विचारनते,
पायो जो विभीषणनेराजकाजहीको भार ॥
भनत अस्कंद एक रावण अतंकी विन,
कापर करौंगी सजि अंग अंगन शृंगार ।
हित हिय जानि वैन विरह मंदोदरीके,
करुणानिधान करी करुणा कछू विचार ८३४
दोहा ।

पिय आयो परदेशते, गयो परोसी यार ।
व्यभिचारिण व्याकुल भई, पतिसों कियो बिगार ॥

(२७०)

रसमोदक ।

क्रोध लक्षण-दोहा ।

शत्रुनके अपमानते, चित विकार कछु होइ ।
अद्वित हियेके हर्षको, क्रोधकहावत सोइ ८३६॥

क्रोधका उदाहरण-कवित्त ।

आये भृगुराज कान परत अवाज कह्यो,
नृपगण देखयो जमाव जिन जोरचो है ॥
भनत अस्कंद नैन अरुण कराल करि,
ठोकि भुजदंड कंध परशामरोरचो है ॥
फारिडारा तुरत विदारि डारौं अंग अंग,
भूमिपै पछारिडारौं शत्रु वह मोरचो है ।
खोलि खोलि पृथकवताव नतौ मारौं सब,
बोल जड़ जनक पिनाक जिन टोरचो है ॥

दोहा ।

क्रोध देखि भृगुराजको, भागी सकल समाज ।
ज्यौं समूह गजराजके, परचो आइ भृगुराज ॥

उत्साह लक्षण-दोहा ।

लखत महाभट प्रत सुभट, चोव बढै चितचाह।
सहरष अनहित वीरको, सो कहिये उत्साह ८३८॥

उदाहरण--कवित्त ।

एक समै बाणासुर कैद अनिरुद्धै कियो,
ताही समै कृष्ण द्वारकासे उठिधाये हैं ।
करि करि कोप वीर दौरत दुहूँ दलसे,
प्रबल प्रचंड चोप चोपन चढ़ायेहैं ॥
भनत अस्कंद अनी विचली निशाचरकी,
करुणा कर टेर दीन वचन सुनायेहैं ।
लेकर त्रिशूल नन अरुण कराल करें,
हरष हियेमें हर बैल चढ़ि धायेहैं ॥ ८३९ ॥

दोहा ।

दोऊ दल बाजे बजे, हर्ष बढे हिय वीर ।
उत कोटिन यादव चमू, इत भूतनकी भीर ८४०॥

(२७२)

रसमोदक ।

भयलक्षण-दोहा ।

अपनेही करतव्यते, हिय करिडर अकुलाइ ।
ताहीको भय कहत कवि, लक्षण लक्ष बनाइ ॥

भयका उदाहरण-कवित्त ।

विष रस मूल जान हियमें प्रमोद ठान,
आयोहै सुरेशभेष मुनिगण वानोहै ।
तारापति पीछे होके तमचुर बोल बोल्यो,
गौतम न जानो वह कपट विहानोहै ॥
परशत अंग कोप दरशत देख आये,
भनत अस्कंद देन शाप उर ठानोहै ।
इंद्र गयो सूख छंद वंद भूलगयो सबै,
चंद भयो मंद हिये अति अकुलानोहै ८४२ ।

दोहा ।

इत उत मोहन चक्र चित, डरके वश अकुलाइ
ग्वालिनके घरमें घुसे, ऐंचि ऐंचि दधि खाइ ।

गलानि-लक्षण ।

सुमिरि परश मन समुझ जहँ, चीज़ विनाही देख ।
घिन उपजै कवि कहत हैं, ताहि गलानि विशेष ॥

गलानिका उदाहरण-सवैया ।

काहू समै मदपान किये, दशशीश गयो चलि
सिंधु किनारे । न्हात विलोकि त्रिया सुरकी,
अस्कंद भनै इमि वैन उचारे ॥ जाय कहौ
अपने अपने, पतिसों चलो वेगहि संग हमारे ।
तासों उड़ी दुरगंधि महा, मुखफेर रही सबरी
मनहारे ॥ ८४५ ॥

दोहा ।

नभवाणी सुनि द्विज सबै, मनमें रहो विनाइ ।
भानु प्रताप अयानको, शाप दई रिसियाइ ॥

आश्चर्य लक्षण-दोहा ।

देखत अजब चरित्र वा, मिलत सुमिर सुनि कान ।
विस्मय होइ हिये कछू, सो आश्चर्य बखान ॥ ८४७ ॥

(२७४)

रसमोदक ।

आश्चर्यका उदाहरण-कवित्त ।

द्रुम कदलीके युग्म शोभित तड़ाग तापै,
श्रीफल फरेहैं कौन पावत प्रभाकोहै ।
तापर कपोल राजै शुक पिक मोद मान,
चंदरवि संयुत विराजत समाकोहै ॥
भनत अस्कंद कंजकलित घटाघनकी,
तारेहैं समूह तापै सकत छिपाकोहै ।
लाल चलि देखो यह कौतुक अनूप ख्याल,
परम मनोहर विचित्र रचनाकोहै ॥ ८४८ ॥

दोहा ।

कछु गजगतिके आइटन, क्षीणहोत मृगराज ।
सुनत वचन इमि सखीके, चकित भये ब्रजराज ॥

पुनर्यथा-कवित्त ।

सजिकै श्रृंगार औ सवाँर माँग मोतिनसों,
भाल लाल बेदाचारु भूषण सुधारेहै ।
धरकर आनन विचित्र चित्रसारी बीच,

उल्लास ५. (२७५)

सोवत विशाल बाल रति छबिवारेहै ॥
भनत असकंद ब्रजराज आज देखो चलि,
चकित रहोगे उपमा न मानवारेहै ।
प्रफुलित कंजपै सुचंदहै प्रमोदमान,
चंदपै सुभानु उये घनपै सुतारेहै ॥ ८५० ॥

दोहा ।

नववर कंचनलता पर, चक्रवाक युग आइ ।
बैठे करत प्रमोदको, शोभा सरस दिखाइ ॥ ८५१ ॥

निर्वेद लक्षण—दोहा ।

वेश्यारतके कामके, श्रमते मन पछिताव ।
उपजै हिय निर्वेद कहि, समरसथायी भाव ॥ ८५२ ॥

निर्वेदका उदाहरण—सवैया ।

नहीं ज्ञानहु ध्यान सुजानौ कछू, करि हेतु
भलो तप कीन्ह्यो नहीं । नहिं छोड़ि विषयरसकी
चरचा, पदपंकजमें चित दीन्ह्यो नहीं ॥ नहिं

(२७६) रसमौदक ।

गायो गुविंदके गीतनको, अस्कंद भनै प्रभु
चीन्ह्यो नहीं । मन कीन्ह्यो कहा इतना करिवै
जुपै रामको नाम सुलीन्ह्यो नहीं ॥ ८५३ ॥

दोहा ।

सरसविनोद निशिदिन करत, चित लगाइ चितहार
रामनाम मन एक क्षण, क्यों नहिं लेत गँवार ।

पुनर्यथा-कवित्त ।

छलबल और काज निरस प्रसूननमें,
चित्तको लगाइ फेर इत उत टारै ना ।
फिर पछताइ आइ कठिन कठोर हीमें,
गुंजत रहत नेक सुमति विचारै ना ॥
भनत अस्कंद तू अनंदकर प्रेम ठान,
बात सब तेरे हाथ क्यों अब सुधारैना ।
भ्रमत कहाधौं फिरै छोड़ मकरंदमूल,
भौर मन शंभु कंज पदन बिसारैना ॥ ८५५ ॥

उल्लास ६.

(२७७)

दोहा ।

पग्यो रहै निशिदिन सदा, विषरसहीको मान ।
करै एकहू क्षण न मन, शंभु उमाको ध्यान ८५६॥

इति श्री शिवसुत षोडशनाम प्रताप अनुभारतीज्ञः

श्रीमन्महाराज कुमार श्रीमत्कुँवर स्कंदगिरिविर-

चिते रसमोदकाऽभिधेकाव्ये श्रीमहाराजा-

धिराज श्रीराधाकृष्णविहारे कविजनर-

सिक हृदयानंददायिने स्थायीभावप्रक-

रणं पंचमोल्लासः ॥ ५ ॥

षष्ठमोल्लासः ६.



अथारसनिरूपणम्--दोहा ।

मिल विभाव अनुभावके, हाव भाव सब आइ ।
संचारिनके वृंदमय, रस पूरण थिर भाइ ॥
ज्यों विकार हेमंतऋतु, नीर बरफ दरशाइ ।
रसस्वरूपथिरभाव तिमि, परनित कहि कविगाइ ॥

(२७८)

रसमोदक ।

कहि संयोग वियोगरस, सो शृंगार पुनिहास ।
करुण रौद्र पुनि वीरको, चार प्रकार विलास ॥
भय विभत्स अद्भुत कहे, शांत सरस रस रूप ।
नवरसके ये नामहैं, लक्षण लक्ष अनूप ॥ ८६० ॥

शृंगारलक्षण-दोहा ।

स्थायी रत भावहै, जाको सो शृंगार ।
संचारी अनुभाव मिलि, अनुविभाव सुखसार ॥
प्रीति अपर पर जाइ जो, रति मन लगन सुजान ।
थायि भाव शृंगारको, वरणत कवि बुधवान ॥
सो शृंगाररस भाव थिर, पूरण रत जहँ होइ ।
आलंबन अरु दूसरो, उद्दीपन कहि सोइ ॥ ८६३ ॥
आलंबनके नायिका, नायक तहाँविचार ।
सखी सखा वन वाग ऋतु, उद्दीपन निरधार ॥ ८६४ ॥
मृदुमुसक्यान विनोदयुत, हाव भाव तहँ मान ।
है शृंगार अनुभावके, वरणत सुकवि सुजान ॥
उन्मादादिक भाव जे, संचारिनके लाइ ।

उल्लास ६.

(२७९)

श्याम देवता श्याम रँग, सो शृंगाररस गाइ ८६६ ॥
सोद्वै भाँति बखानहीं, मिलन शृंगार संयोग ।
अटक मिलनकी होत कछु, सो शृंगार वियोग ॥

संयोग शृंगार—सवैया ।

हरै हँसि जोरत नैननको, रसरंग भरी बतियाँ
करि चाहि । सजै इक एकके अंबर अंग, वरी
सुवरीकि सराहि सराहि ॥ भनै अस्कंद छके
मदमें, बढै मैन तरंग उमंग अथाहि । करै नित
मोद प्रमोदित होत, दुवो रितिप्रीति निबाहि
निबाहि ॥ ८६८ ॥

दोहा ।

प्रेम पयोनिधिके भये, युगल मीनसम मोद ।
सरस रूप रतिकामते, दंपति करत विनोद ॥

पुनर्यथा—कवित्त ।

सकल शृंगार साजि देखि रतिमैन लाज,
वैद बढ सीकरत प्रीतिरति रातेहैं ।

(२८०) रसमोदक ।

विहरत मोदमान कोटिन कलान ठानि,
मृदु मुसक्याइ चख चपल चलातेहैं ।
भनत अस्कंद प्रेम उठत तरंग रंग,
बढ़त अनंग रंग अंग दरशाते हैं ।
लखि लखि होतहैं निहाल एक एकनपै,
सरस नवेली लाल युग रसमाते हैं ॥ ८७० ।

दोहा ।

अति मदमाते प्रेममय, निशिदिन आठौ याम
है चकोर है चंदलौ, देखत श्यामा श्याम ।

वियोगशृंगार लक्षण-दोहा ।

जहँ बिछुरन दोहूनकी, दोहुन व्यापत आइ
विप्रलंभ शृंगारसौ, विरहदशा सम पाइ ॥ ८७२ ।

वियोगशृंगारका उदाहरण-

कवित्त ।

बैठि निज मंदिर विसूरति पियाकी वाट,
गणित गनावति मुहूरत जवाई सों ॥

उल्लास ६.

(२८१)

ज्योंज्योंहोतरातत्योंत्योंअतिअकुलातहिये,
धीरना धरात काम बढत सवाई सों ॥
भनै असकंद तैसी शरद हिमंत बीते,
शिशिरको अंत औ वसंतकी अवार्ई सों ॥
भरिभरिरहै प्यारी विरह भभूकन सों,
जरि जरि उठत कलानिधि कसाई सों ८७३॥

दोहा ।

विरहविथा कासों कहों, पिय छाये परदेश ।
अबलों घर आये नहीं, वाधक मदन कलेश ॥

सवैया ।

देखो जितै तित फूलिरहे वन बागचहूँदिशि
फूल सुहाये । तापर देतहै कोइल कूक सुहूक उठै
दिय मैन बढाये ॥ त्यों अस्कंद भनै अलि
पुंजके पुंज सु गुंज करै फिरै धाये ॥ मोहिं सता-
वतहै विरहा अबलों सखी श्याम घरै नहीं आये ॥

(२८२)

रसमोदक ।

दोहा ।

विन माधो आधी घरी, कल न परत पलएक ।
विरह व्यथा छिन छिन बढै, अनत कराई टेक ॥

पुनर्यथा-कवित्त ।

येरी वीर धीर तनु नाहिं मनमोहनके,
करि निठुराई गये आई ऋतु वेश लूह ।
पापी पपीहा पिय पिय करि पुकारे जोर,
चहुँधा दिखात मालतीके फूल फूले जूह ॥
भनत अस्कंद तरु सफल सलोहिनपै,
कोइल कजाखी करि करत करारी कूह ।
झौरन रसाल वेश मौरन रसाल तापै,
अति विकाराल रूप देखे है अली समूह ८७७॥

दोहा ।

बोलै पिक डोलै विटप, त्रिविध सुगंध समीर
गुंज करै अलि कुंजमें, मीन हिलोरे नीर ।

पुनर्यथा-कवित्त ।

नटखट बातें करि झटपट लीन्होंमोहिं,
 खटपट मचाकै गये दीन्ही तजि गोकुला ।
 कीन्हीहूँ न कीन्ही चीन्हीमनदै सुहीनी भई,
 तनकी दिखात ऐसी तनुकी नवो कला ॥
 भनत अस्कंद देख ताको चंद मंद होत,
 तारागण वृंद साथ ऊवत समो कला ।
 अबलौनआयो सो रमायो मन भायो कियो,
 आयोरी वसंत कूक दीन्ही आन कोकिला॥

दोहा ।

जग जाहिर जानत सबै, यह सनेहकी रीति ।
 पै नकीजिये रेदई, निरमोहीसों प्रीति ॥ ८८० ॥
 सो विवोक शृंगार यह, तीन भाँति निरधार ।
 कहि पूरब अनुराग पुनि, मान प्रवास प्रकार ॥

पूर्वाअनुराग लक्षण-दोहा ।

व्याकुलता जो मिलनते, प्रथम होइ कुछ आइ ।

(२८४)

स्समोदक ।

सो पूरवं अनुराग कहि, रसग्रंथन में गाइ ॥८८२॥

पूर्वाअनुरागका उदाहरण-कवित्त ।

धीरज सुधार तेरे प्रेम हिय वाके बस्यो,
कसन कसौटी रूप कंचन भलो बनो ।
भनत अस्कंद मंज कंज कर देख तेरे,
अलिमकरंद चाहि वा मन यही ठनो ॥
लगन लगी है तुव लगन लगी है खरी,
मगन मनोज तैसो विरह विलोकनो ।
सघन मयूरचंद चाहत चकोर जैसे,
सदृश दिखात नेम बढ़त घनो घनो ॥८८३॥

दोहा ।

सुमन जुराफासे भये, राधा माधो राध
प्रेमनेम दोहुन बढ्यो, मिलिबेकी हिय साध ॥८८४॥

पुनर्यथा-कवित्त ।

प्रथम विलोकतही दृगन लगाई लाग,
श्रवण डराई डीठ बाँसुरी बजैया पै ।

उल्लास ६.

(२८५)

मतगुण गावत न और मत भावतहै,
विरह भभूक हूक उठत जुन्हैयापै ॥
भनत अस्कंद अंग बढ़त तरंग काम,
सरस उमंग हिये धोरज धरैयापै ।
झटकन आवै अलि खटकर हैहै मन,
अटक रही है छवि लटक कन्हैयापै ॥८८५॥

दोहा ।

कहा वान मेरी सखी, येरी परी विचार ।
जित देखत तित दगनहो, मूरति मृदुल मुरार ॥

पुनर्यथा-कवित्त ।

ऐसी बरजोरी कहूँ होरीमें सुनी है वीर,
मेलिकै अवीर मूठी ऊपर उड़ाइगो ।
रोरी मलि मृदुल कपोल गोल गालनमें,
लोने गोल लोचनसों सैनन बताइगो ॥
भनत अस्कंद छैल छलिया छबीलो वह,
मुरली बजाइ के सनेह सरसाइगो ।

(२८६)

रसमोदक ।

छोड़ि पिचकारी घोरि केसर अवीर मोपै,
नंदको किशोर चोर चितलै चुराइगो॥८८७

दोहा ।

कछु दैगयो न लैगयो, चित चुराइ चितचोर
अरे निरदयी निरदयी, कैसो कठिन कठोर ८८

पुनर्यथा—दोहा ।

ज्यों ज्यों त्रिविध समीर चल, तनु परशतहै आ
त्यों त्यों लगन सनेहकी, दूनी ही दरशाइ॥८८९

मान लक्षण—दोहा ।

जो त्रिय पियके दोष ते, हियमें ठानै मान
त्रिविध भाँति सो जानिये, लघु मध्यम गुरु भान

लघुमान लक्षण—दोहा ।

रोष करै त्रिय पीयसों, परत्रिय देखत दोष
सो लघुमान बखानहीं, कविजन चतुर विशेष

लघुमान उदाहरण—सवैया ।

दधि बेचन आइ गुवालिनसों दग जोरत ते

उल्लास ६.

(२८७)

विषाद बढ्यो । पलकापर पौढ़ रही रिसकै चितमें
कछु नेक न मान चढ्यो॥ अस्कंद भनै भरि अंक
लियो कहियेतो सयान कहाँते पढ्यो । मुख सारी
हरीते उधारयो जबै, मनो धानके खेतते चंद
कढ्यो ॥ ८९२ ॥

दोहा ।

कछुक पियासँग रिस करी, परी पलँग पर जाइ ।
अंक भरत खोल्यो वदन, देखत इंदु लजाइ ॥

मध्यम मान लक्षण-दोहा ।

जो पियके मुखते सुनै, और त्रियाको नाम ।
होत मान मध्यम छुटै, सौँह करे अभिराम ८९४ ॥

मध्यम मानका उदाहरण-कवित्त ।

बूझत बतायो होंतौ सहज सुभावहीते,
प्रति प्रति नाम लै नक्षत्रन गनायोहै ।
तापर इतेक रिस ठानि रसखान प्यारी,
कौन अपराध जानि मान हिय छायोहै ॥

(२८८)

रसमोदक ।

भनत अस्कंद सौंह करन कहाँलौं कहाँ,
तुव उर संभ छोड़ि कौन मन भायोहै ।
कर परशाइ तापै दुविध मिटाइलीजै,
वचन विचित्र सुनो वदन हँसायोहै ॥ ८९५ ॥

दोहा ।

सौ सौ सौहन के करे, ह्याँलग आई बाम ।
भूल न लीजौ श्याम अब, परतिरियाको नाम ॥ ८९६ ॥

गुरुमान लक्षण-दोहा ।

पिय रत औरी नारि लखि, उपजत है गुरुमान
छूटत पाँइनके परे, वरणस बद्धि निधान ॥ ८९७ ॥

गुरुमानका उदाहरण-कवित्त ।

विनय हमारी मानिलीजै तौन लीजै दोष,
बनत न बात करें ऐसी मत टेकहूँ ।
तुव मुख चंदको चकोर ब्रजचंद आली,
अधर सुधारस तृषारिन सु दे कहूँ ॥
भनत अस्कंद रहै मेरी बान एरी वीर,

उल्लास ६.

(२८९)

भूषण शरीर साजि येतौ यश ले कहूँ ।
मानरी कहाँ लौं कहौं मानरी सुएक याम,
रजनी व्यतीत नीरजनैनी न नेकहूँ ॥८९८॥

दोहा ।

चल नाहीं नाहीं न कर, न कर अली यह टेक ।
सौत न वाहीं चल अबै, गलवाहीं लै नेक ॥८९९॥

पुनर्यथा--कवित्त ।

तोहिं बुलवायो मोहिं हेत सों पठायो कह्यो,
नेहको घटायो सो तो नेकहू न नीको है ।
चल अब नीको है सुकान्ह वश कीको तुव,
शशि मुख नीको वह पियासो अमीको है ॥
भनत अस्कंद सो मजा न कछु फीको यह,
रिसान कह नीको तू मान डर कीको है ।
मान कर नीको अब न मान कर नीकोरी,
सुमान कर नीको व मान कर नीको है ९००

(२९०)

रसमोदक ।

दोहा ।

मान न कर अब हे अली, मान सु कर यह बात ।
मान सु कर नीको अधिक, बढ़त मान वह गात ॥

पुनर्यथा-कवित्त ।

सघन लतान कुंज रहस मचायो कान्ह,
तोहिं बुलवायो आई मैं चल समाज तै ।
तूतो अतिचतुर सुजान रसरीति जानै,
कर ना विलम्ब अंग भूषण सुसाज तै ॥
भनत अस्कंद दियो उत्तर न ताहि कछू,
बोली अनखाइ कहा करत सुभाज तै ।
कौन मति ऐसी बात कहत अनैसी बाल,
कबहुँ न रूठी नई रूठी ब्रजराज तै ॥९०२॥

दोहा ।

बनै न बात प्रवीणबल, मनमें आनँद आन ।

उल्लास ६. (२९१)

कहा देउँगी जाइकै, उत्तर उतै सुजान ॥ ९०३ ॥

पुनर्यथा-सवैया ।

चोप चढ्यो रसके वशमें, चसक्यो नहिं
काहु सनेह लगाये । का दियो चंद चकोरनको,
जो सुधा लियो ताहि अँगार चुगाये ॥ त्यों
अरु कंद मयूरनको घन, का कियो बार पुकार
मचाये । हे अलि बात कहौं किहि भाँति वृथा
अलि गुंज गुलाबके पाये ॥ ९०४ ॥

दोहा ।

जे सनेह चाहत घनो, तिनहिं न व्यापत पीर ।
उदधि माँझ मुकतान हित, पैठिजात मतिधीर ॥

पुनर्यथा-सवैया ।

आई पठाई लिवाइबेको सब, जानती रीति
कहा कहेमें है । देखेविना यो मनोहर रूप, टरै
पल साल सुकैसे बितै है ॥ त्यों अरु कंद कहै

(२९२) रसमोदक ।

सुन वैन, कहा उर सौत प्रतीति न लैहै । सैहै न
मान गुमान भटू, हम जाव मनोज व्यथा न
बढ़ैहै ॥ ९०६ ॥

दोहा ।

सौतनकी परतीत हिय, बढीलालके ऐन ।
कहा भटू तुमसों परी, जाव कहे इमि वैन ९०७ ॥

दोहा ।

जो सौतिन सँग हित क्यो, पिय न कीजिये मान ।
जानतहै रसरतीको, सब विधि चतुर सुजान ॥
सेज सवाँरि शृंगार सजि, हिय मिलाप सुखमान ।
जान आन पति स्यान त्रिय, दुख विछोह पछितान ।
सो प्रवास कहिये पिया, जो विदेशमें होइ ।
ताते दुख नारीनको, अतिशय जानो सोइ ९१० ॥
सो प्रवास द्वै भाँतिको, विंजन कहत बनाइ ।
इक भविष्य इक भूतहै, रसग्रंथनमें पाइ ॥ ९११ ॥

भविष्यप्रवासका उदाहरण—सवैया ।

अब कौन कहौ तुम्हें कैसी भई, मति कौन
लई कहा वैन कहौ । ऋतु माधवी फैलरही चहुँ
ओर, करै अलि गुंज विदेश चहौ ॥ यह कोयल
कूक सम्हारिहै को, अस्कंद भनै मिलिमोद लहौ ।
विन कारज काज विचारिबेकी, यह टेक कुटेक
तजौ न गहौ ॥ ९१२ ॥

दोहा ।

चरचा सुनत विदेशकी, बाल रही दुख पाइ ।
ज्यों पंकज रवि अंतमें, सहज जाइ कुम्हिलाइ ॥

भूतप्रवासका उदाहरण—कवित्त ।

वनविन परश नवीन वन पत्र शाखा,
मृदुल मनोहर वितान न लतानभो ॥
कल कल पिकन मलिंदन मचायो जोर,
शोरकरि राख्यो तहाँ बैठक प्रमानभो ।

(२९४)

रसमौदक ।

भनत अस्कंद वैन चातक विदेश छाये,
उनाविन विरह महीपति सुजानभो ॥
सेवकन मानभो सरोज गुणवानभो,
सुगुरुजन भानभो निशापति दिवानभो ॥

दोहा ।

जित देखो मधुऋतु फबी, चहूँ ओर दरशात ।
पिक पापी तापर करत, बोलि बोलि उतपात ॥

पुनर्यथा-सवैया ।

या ऋतुराज समाजको साज, सखी विरहानल
आन पठायो । त्यों असकंद भनै अलि गुंजसु,
कोइल कोकिल शोर मचायो ॥ औधि गई चलि
आवनकी, मनमानै न नेक कछू समझायो ॥
नाथ कहाइकै गोपिनके अब, कूबरी संग सनेह
लगायो ॥ ९९६ ॥

दोहा ।

अरेनिरदयी निरदयी, ऐसी लगन लगाइ ।

कुवजाके रस वश भये, फिर न लई सुधि आइ ॥
 विरह अवस्था दश कहीं, जो विवोग शृंगार ।
 षटसंचारिनमें कही, अब वरणतहों चार ॥९१८॥
 कहि अभिलाष सुगुण कथन, अरु उद्वेग प्रलाप।
 जेराखे पंडित कविन, रसग्रंथनमें थाप ॥९१९॥

अभिलाष लक्षण-दोहा ।

चाह करै अति मिलनकी, जो त्रिय पिय हिय ऐन।
 अभिलाषा तासों कहत, कछु ललचौहै बैन ॥

अभिलाषका उदाहरण-कवित्त ।

क्षण क्षण आवत विचार मन ऐसो सखि,
 छोड़ि कुलकान और काज चित दीजै ना ।
 वेई केलि कलन मनोभव तरंगनमें,
 अधर सुधाको छोड़ि और रस पीजै ना ॥
 भनत अस्कंद देखि हँसन बतान बाँकी,
 मृदु मुसक्यान नाम लाजको सुलीजै ना ।

(२९६) रसमोदक ।

मोहनकी मूरति विशाल मनमोहनीको,
हियसों लगाइ जुदो एक पल कीजै ना॥९२१॥

दोहा ।

वदन इंदु घनश्यामको, मो मन भयो चकोर ।
इकटकही देखत रहौं, यों चित चाहत मोर ॥

गुण कथन लक्षण-दोहा ।

गुण बखान जो विरहमय, करै सुपियकी चाह ।
जतन सहित गुणकथनसो, वरणतहै कविनाह ॥

गुणकथनका उदाहरण-कवित्त ।

खेलन चली ज्यों फाग सखिन समाज लैकै,
ताही समै श्याम धूमधाम करि आगयो ।
भनत अस्कंद नैन सैनन घलाघलमें,
रूपकी झलाझलमें मन धौं कहागयो ॥
करि सरवोर रंग केसर झकोरनसों,
अंग अंग मदन उमंगहि बढ़ागयो ।

उल्लास ६.

(२९७)

नजर बचाकर छिपाकर गुलाल लाल,
अंकभरि कुचन कपोलन लगा गयो॥९२४॥

दोहा ।

वा बनवारी कुंजमें, गजब गुवालिन आइ ।
हँसि हेरन मुसक्यानमें, मो मन लियो चुराइ॥९२५॥

उद्वेग लक्षण-दोहा ।

चितन लगत कहूँ विरहवश, मन अतिही अकुलाइ ।
सो उद्वेग बखानहीं, कविजन ताहि बनाइ॥९२६॥

उद्वेगका उदाहरण-कवित्त ।

इत उत जाइ धाइ चढ़त अटाननपै,
मन पछताइ नहीं धीरज धरतहै ।
कछु न सुहाइ चित अति अकुलाइ ताको,
सखिन सहेलिनसों बात न करतहै ॥
भनत अस्कंद जैसे लगत वसंत हीमें,
विन मकरंद अलि दौरत फिरतहै ।

(२९८)

रसमोदक ।

कल क्षण परत न एक पल एक ठाम,
श्यामविन राधा भौँरि भाँवर भरतहै॥९२७॥

दोहा ।

खान पान भूषण वसन, दिवस न रात सुहाइ ।
जब सनेह लगजातहै, निरमोहीसों जाइ ॥९२८॥

प्रलाप लक्षण-दोहा ।

कहत निअर्थिक वैन जहँ, विरहीजन दुखपाइ ।
तासों कहत प्रलापहैं, जे प्रवीन कविराइ ९२९ ॥

प्रलापका उदाहरण-कवित्त ।

तारन बतावै इंद्रवधुन समाज फैली,
चंदहि बतावै रवि सुमत तरंगसों ।
रैनहि बतावै दिन दिनहि बतावै रात,
पाननको पात कहै विरह उचंगसों ॥
भनत अस्कंद श्याम नाम तुव टेर टेर,
सुतरु तमालनके मोहत कुरंगसों ।
काम कर व्याकुल न धीरज धरत बाल,

उल्लास ६.


(२९९)

देख घन उठत सुभेटन उमंगसों ॥ ९३० ॥

दोहा ।

जब जब मदन उमंग उठि, विरहरूप दरशाइ ।
पिय पिय करि त्रिय ननद हिय, लपटजात अकुलाइ

नवरस निरूप्यते ।



अथ हासरस-दोहा ।

अस्थायीको हास जो, सो रस हास बखान ।
कूदब कहब कुरूपता, तहँ विभाव मत जान ॥
हँसिबोई अनुभाव कहि, उच्च मंद मुसक्यान ।
तहँ संचारिनको हरष, और चपलता आन ॥
रंग श्वेतहै हासरस, नारद देव बखान ।
ताको वरणों विधि सहित, सुनि हरषैं बुधवान ९३४

हासका उदाहरण-कवित्त ।

चरित विवाहमें गिरीश गिरिजाके भयो,

(३००)

रसमोदक ।

नेगी नेग माँगत दुहूँदिश चुकाइकै ।
देतजात अलख निरंजन कहाँलौं कहाँ,
जापै द्विज और कछू माँग्यो हिय चाइकै ॥
भनत अस्कंद शंभु नजर बचाइ एक,
फुंकरत साँप दियो करमें गहाइकै ।
देखतही उझक झपाक तजि ठाढ़ो भयो,
विहस उठीहै सभा अति सुखपाइकै ९३५ ॥

दोहा ।

बाल बजावत बाँसुरी, लख्यो त्रिभंगी रूप ।
विहँसि कह्यो यह कूबरी, को सतसंग अनूप ॥

पुनर्यथा-सवैया ।

एक समै हरि शंभुके पास, चले हियमें अति
मोद बढ़ाइकै । ते चले आवत ते उतते, अस्कंद
भनै उनके गुण गाइकै ॥ भेंटतही खगके पति
देख, भजे तजि अंग भुजंग डराइकै । कौतुकलौं
सुर औगण भूत, हँसे जितके तितही मुसक्याइकै ॥

उल्लास ६. (३०१)

दोहा ।

हम जानी नँदलालहौ, पै दलालके पूत ।
विहँसि कह्यो ब्रजबालने, फिरत लगावत सूत ॥

करुणारस लक्षण-दोहा ।

अस्थायीको शोक मिलि, करुणारस पहिंचान ।
आलंबनको निरस रस, विरह उदीपन जान ॥
अनुभावहिको महिषतन, अरुरोदन जो भाव ।
संचारी निर्वेद तहँ, वरणे कहि कविराव ॥
रंग कबूतरके लसत, वरुण देवता तास ।
करुणारस इहिविधि कहैं, जे कवि सुमति हुलास ॥

करुणारसका उदाहरण-कवित्त ।

मारचो इंद्रजीतको अनंत बलवंत वीर,
भनत अस्कंद जाकी शूरनमें थाप है ।
जाइ भुज निकट गिरी है सो सुलोचनाके,

(३०२) रसमोदक ।

रोदन सहित परी महिमें सुकाँप है ॥
वंदि सब छूटी दुखद्वंद्वमै भई है भूर,
भाँवर भरत ताके कहिकै प्रताप है ।
शिरधुनि कहत मुहाय विधि कीन्ह्यो कहा,
निपट विहाल करै विकल विलाप है॥९३९॥

दोहा ।

लखत जटायूको मरण, रघुपति करुणा कीन ॥
दीनबंधु दुखके दरन, परमधाम तिहि दीन९४०॥

रौद्ररस लक्षण-दोहा ।

क्रोधभाव थायी लहै, वहै रौद्ररस माहि ।
आलंबन ह्वै अरुजुरन, उद्दीपन कहि ताहि॥९४१॥
कुटिलभौंह दृग अरुणई, अधर दाबि अरुभाव ।
गर्व और कहि चपलता, तहँ संचारी भाव ९४२॥
रक्तवरण रस रौद्रहै, रुद्र देवता तास ।

ताको लक्षण लक्षकर, वरणौं सुमतिप्रकाश॥

रौद्ररसका उदाहरण-कवित्त ।

बढ़त विवाद भयो अंगद सुकोपमान,
वचन दशाननसों कहत रिसाइकै ।
येरे मतिमंद मेरे देख भुजदंड तोहि,
खंड खंड डारौं करि दाँतन चबाइकै ॥
भनत अस्कंद यो त्रिकूटाचल टारिडारौं,
मारिडारौं निश्चर सँहारिडारौं धाइकै ।
फारिडारौं धरणी रसातल पताल मध्य,
तुरत पठाउँ दुष्ट लंकहि दबाइकै ॥ ९४४ ॥

दोहा ।

कटकटाइ कर पटकि महि, बोल्यो वचन कराल ।
जानतहौं दशशीश तुव, निश्चय चाह्यो काल ९४५

वीररस लक्षण-दोहा ।

थायीको उत्साह जहँ, वहै वीररस जान ॥

(३०४)

रसमोदक ।

सो कहि चार प्रकारसों, युद्ध वीर इक मान ९४६॥
दया वीर कहि पुनि कह्यो, दान वीर पहिंचान ।
धर्मवीर नीको अमित, भाषत बुद्धिनिधान ९४७॥
आलंबन रिपु कौनु रण, युद्धवीर महँ जान ।
सैना शोर सुनै बढै, उद्दीपन अनुमान ॥ ९४८ ॥
दृग लाली अरु फरक गो, अंग तहाँ अनुभाव ।
संचारी तहँ उग्रता, गर्व असूया भाव ॥ ९४९ ॥
इंद्रदेव कुंदन वरण, युद्ध वीरको ऐन ।
ताको कहत उदाहरण, सुनत होइ मति चैन ९५०॥

युद्धवीरका उदाहरण—कवित्त ।

आयो कुंभकरण विसैन रणवीर गाढो,
युद्ध करिवेकी क्रुद्धकरि विकरालहै ।
धरि धरि खान लाग्यो कपिन समूह यूह,
क्रूह करि भागे भालु निपट विहालहै ॥
भनत अस्कंद रामचंद्र कर चाप लीन्ह्यो,

उल्लास ६. (३०५)

दौरत दबाइदेत दिग्गज सुकालहै ।
सपट झपेट ताकी रुकत न नेक तऊ,
गिरत न भूमि शर निकरेकपालहै ॥ ९५१ ॥

दोहा ।

इत रिसरातो पवनसुत, उत दशशीश प्रचंड ।
भिरत दुहुँनके हालगो, अतल वितल महिमंड ॥

पुनर्यथा-कवित्त ।

प्रबल प्रचंड धायो छायो शोर मंडलमें,
आयो मेघनाद नाद करत झडाकसे ।
हाहाकार माची सब भागे सुर देख वाको,
इंद्र करि कोप शर छाडत सडाकसे ॥
भनत अस्कंद लखि उपमा पुराणनकी,
युद्ध भयो प्रबल सुभटन चड़ाकस ।
भागत लखत दूर लागत गयंद शूर,

(३०६) रसमोदक ।

फूटें मूड़खलनके तड़के तड़ाकसे ॥ ९५३ ॥

दोहा ।

कोटिन भटके बीचमें, अनिरुध एक प्रचंड ।
लै कपाट मारत भयो, दुष्ट करे सब खंड ॥

दयावीर लक्षण-दोहा ।

दयावीर विच देखि बो, है विभाव दुख दीन ।
हावभाव मृदु बोलबो, अरु करिबो दुख छीन ॥
तहँ संचारीभाव धृत, और चपलता जान ।
दयावीर वर्णन करै, इहिविधि बुद्धि निधान ॥

दयावीरका उदाहरण-कवित्त ।

मच्छहै आयो कहूँ कच्छ है आयो कहूँ,
धारचोहै वराह रूप सुखद सुहायो है ।
बावन भयोहै अरि रावण भयोहै कहूँ,
बोध नरसिंह रूप विकट बनायो है ॥
हैकैअनुराग आय क्षत्रिन जतायो कहूँ,

उल्लास ६.

(३०७)

भनत अस्कंद कृष्णचंद यज्ञगायोहै ।
जब जब दीननपै संकट परयोहै आइ,
तब तब दीनबंधु तुरत बचायोहै॥९५७॥

दोहा ।

दीन सुदामा देखिकै, दया करी अभिराम ।
कृपासिंधु करिकै कृपा, दीन्हें कंचनधाम ॥

पुनर्यथा-कवित्त ।

करुणा निधानके समान कौन दूसरोहै,
गीध गणिकासे धर्मधामको पठायेहैं ।
भारत प्रचंड दल दोहुँनके बीच परे,
भारहीके अंड घंट तूरिकै बचाये हैं ॥
भनत अस्कंद करी द्रौपदी पुकार जबै,
चीरको बढ़ाय द्वारका से आप धाये हैं ।
दीननके कारज सुधारत हमेश आये,
या हितसों दीनबंधु विरद कहायेहैं ॥ ९५९ ॥

(३०८)

रसमोदक ।

दोहा ।

अरि विचार कीन्ह्यो नहीं, ऐसे दीनदयाल ।
दीन विभीषण जानिकै, तुरत कियो प्रतिपाल ॥

दानवीर लक्षण-दोहा ।

दानवीरको जानिये, याचक ज्ञान विभाव ।
धनको कछू न लेखि बो, सोईहै अनुभाव ॥९६१॥
संचारिनके भाव जहँ, बीडा हरष मिलाइ ।
दानवीर वर्णन करै, इहिविधि कवि सुख पाइ ॥

दानवीरका उदाहरण-कवित्त ।

दीन्ह्यो गढ़लंकऔ निशंक करि दीन्ह्यो वंक,
रावण को नेकही कृपाकरि निहारयो है ।
दीन्ह्यो जलबुंद गंग भागीरथ संग जाके,
चरित सुनेते यमराज मन हारयो है ॥
भनत अस्कंद दीन्ह्यो हिरणाकुशहि राज,
भस्मासुर काज नहीं नेकहू विचारयो है ।

उल्लास ६. (३०९)

येरे मन ध्यान आन करुणानिधान जान,
शंकर समान कौन दानदेनवारचोहै ॥९६३॥

दोहा ।

दीन्ह्यो शुंभनिशुंभको, आप दान वरदान ।
चक्रवती महिमें कियो, कोहै शंभु समान ॥९६४॥

धर्मवीर लक्षण—दोहा ।

धर्मवीरके जानिये, वेद पुराण विभाव ।
अरु ताहीकी विधि चलब, स्मृति लौ अनुभाव ॥
संचारीके भाव जो, तिनमें को धृतभाव ।
रसग्रंथनमें कहतहैं, जे प्रवीण कविराव ॥ ९६५ ॥

धर्मवीरका उदाहरण—कवित्त ।

आये हरिद्वारपै स्वरूप धरि बावनको,
मोको यह जानीजात छलयो विशेषई ।
दान मत दीजै यह मानिमत लीजै मोर,

(३१०) रसमोदक ।

और इत हेरौ तुम्हैं कुमति कहा ठई ॥
शुक्रने सिखायो तौन मनमें न लायो कछू,
भनत अरु कंद झारी करसों उठालई ।
पैज प्रण पाल्यो नेक उरसे न हाल्यो बलि,
धरम निबाह्यो पीठ पगन नपादई ॥ ९६६ ॥

दाहा ।

रामचंद्र सँग वन गये, लक्ष्मण धर्मनिवाहि ।
को ऐसो प्रण पालिहै, भरतरूप अवगाहि ९६७ ॥

पुनर्यथा-कवित्त ।

राम वन फिरत विलोकत प्रणाम कीन्ह्यो,
देखन गईती तहाँ करि भ्रम भारी है ।
भनत अरु कंद कहा कौतुक विलोकि आई,
बोली करजोरि वही सुमति तुम्हारी है ॥
ध्यान धर देख जानि कीन्ह्योहै सियाको रूप,

दीन्ह्यो तजि तुरत सतीको त्रिपुरारी है ।
धरम धुरंधर सो धरम निवाहिवेको,
शंकर समान ऐसो कौन प्रणधारी है ॥९६८॥

दोहा ।

यदपि प्रथम प्रण पालिकै, ऐसो धरम निवाह ।
कीन्ह्यो है त्रिपुरारिने, गिरिजा संग विवाह ९६९॥

भयानक रस लक्षण—दोहा ।

थायीको भय जासुमें, सुरस भयानक जान ।
कछू भयंकर देखिबो, सो विभाव तहँ मान ॥
तहँ जो तनुको काँपबो, सोई है अनुभाव ।
मोहादिक तहँ कहतहँ, कवि संचारीभाव ॥९७०॥
ताको कहिये देवता, कालसुक्यैला रंग ।
रसग्रंथनमें देखिकै, वरणत सुमति उमंग ॥९७१॥

भयानकका उदाहरण—छप्पय ।

फटत शेषशिर चटक पीठ कच्छप अति

(३१२)

रसमोदक ।

गाढ़िय । डग डग दिग्गज डुलत शंक त्रैलोकहि
बाढ़िय ॥ समर मध्य करि कोप कालमूरति वह
धारिया एक डाढ़ कर भूमि एक नभ विच्च पसा-
रिय ॥ इमि भनत नृपति अस्कंद गिरि, मेरु हलत
नहिं को डारिव । तहँ शुंभ निशुंभहि आदिदै,
शत्रु भक्ष कालिय करिव ॥ ९७२ ॥

दोहा ।

पुच्छ शीशधर क्रुद्ध करि, गरज्यो सिंह अपार ।
सुनत भयानक शब्द वह, निश्चर भये सँहार ॥

पुनर्यथा--कवित्त ।

इतउत असुर गिरेहैं घूमि घाइलसे,
विकल सुत्रासमान सुनत अरारचोहै ।
उठत सुएकनको बूझत न एक एक,
थर थर कंपत ससात मन हारचोहै ॥
भनत अस्कंद और कौतुक कहालों कहौं,

उल्लास ६.

(३१३)

हरिणाकुश महीको उदर विदारचोहै ।
धरणि हलीहै खम्भ चटकफटचोहै जब,
विकट भयंकर नृसिंहरूप धारचोहै ॥९७४॥

दोहा ।

मेघनादको शिर हत्यो, अट्टहाटकरिहास ।
भालु कपिनके उरविषे, व्यापिगई तहँ त्रास ॥

वीभत्सरस लक्षण-दोहा ।

सो विभत्सरस जानिये, थायी जासु गिलान ।
पीव रुधिर दुरगंध अति, तेविभाव तहँ जान ॥
कंपादिक रोमांच तहँ, नाक मूँदि अनुभाव ।
तहँ संचारी मूरछा, मोह असूया भाव ॥ ९७७ ॥
वाको सुर सब कहतहँ, महाकाल रँग नील ।
ताको वरणन करतहँ, समझौ सुजन सुशील ९७८

वीभत्सरसका उदाहरण-कवित्त ।

आयो छल करन अवासुर पठायो कंस,

(३१४) रसमोदक ।

बैद्यो मग वदन पसारि अति भारीहै ।
भनत अस्कंद तहाँ ग्वालनकी भीर मग,
पैठेसब किलकत हाँक दैदै तारीहै ॥
मूत्र मल थूक ताकी अतिदुरगंध महा,
पित्त कफ लार की न नेकहू विचारीहै ।
सखनसुकष्ट जानि उरमें सुकोप ठानि ॥
फारिडारचोतुरत चड़ाक गिरिधारीहै ९७९॥

दोहा ।

दुरगंधादिकको कछू, कीन्ह्यो नहीं विचार ।
सुरसाके मुखमें धर्यो, तुरताहि पवनकुमार ॥

अद्भुतरस लक्षण-दोहा ।

अचरज थायीभावको, सो अद्भुतरस जान ।
असंभवतको देखिवो, सो विभाव तहँ मान ॥
कँपनो वचन विचित्र अरु, रोम उठव अनुभाव ।
शंका मोह वितर्कते, कहि संचारीभाव ॥ ९८२ ॥

उल्लास ६. (३१५)

पीत वरणहै जासुको, देव विरंचि वखान ।
ताको कहत उदाहरण, सो अद्भुतरस जान ९८३॥

अद्भुतरसका उदाहरण—कवित्त ।
देख्यो दधिखात ग्वालबालनके संग जबै,
करि भ्रमभारी ताहि हितसों हितैरह्यो ।
बछरा चुराइ जाइ बंदकरे कंदरमें,
भनत अस्कंद कृष्ण गुणको गितै रह्यो ॥
आयो इत देखिबेको करि अनुराग भयो,
अद्भुत चरित्र ताको मनधौं कितै रह्यो ।
रचिकै त्रिमंडली सुकुंडली लिये करमें,
देखिब्रह्ममंडली कमंडली चितै रह्यो ॥९८४॥
दोहा ।

अद्भुत भयो चरित्र जब, कियो शम्भुने गान ।
भये विष्णु तहँ नीर सुन, सो गंगाजल जान ९८५

(३१६) रसमोदक ।

पुनर्यथा--कवित्त ।

कोप करि अमित प्रचंड कर बुंद एक,
तुरत अगस्त्य शोषलीन्ह्यो सिंधुपानी है ।
शंकर पिनाक जबै खंडन कियो है राम,
नृपति समाजनकी सुमति भुलानी है ॥
भनत अस्कंद कृष्णचंदने फणिंद नाथ्यो,
वामन बढ्यो है ताहि सब जग जानी है ।
शम्भुके जटान बीच गंगाजी भुलानी रहीं,
रावणको फेंक दीन्ह्यो जठरि पुरानी है ॥ ९८६ ॥

दोहा ।

लाल भाल लीलो उचटि, चटि समीरके लाल ।
रामचंद्रको लैगयो, अहिरावण पाताल ॥ ९८७ ॥

शांतरस लक्षण-दोहा ।

थायीको निर्वेद कहि, सोइ शांतरस जान ।

तहँ विभाव गुरु तपोवन, साध संग उर आन ॥
रोम उठव अश्रूपरत, तहँ अनुभाव विचार ।
संचारिनके धृत हरष, वरणत बुद्धि अगार ॥
नारायण है देवता, तासु रंगहै श्वेत ।
सोइ शांतरस जानिये, वरणत प्रेम समेत ॥९९०॥

शांतरसका उदाहरण सवैया ।

वही भाष्यो विरंचि चतुर्मुखहै, अरु वेद पुरा-
णन बाच्यो वही । वही पालत पोषत जीवनको
जग झूठो सबै अरु साँचो वही । वही संतशिरो-
मणि एक लख्यो, अस्कंद निरूपकै जाच्यो वही ।
वही पूरण ब्रह्म निरंजनको, जित देखो उतै रँग-
राँच्यो वही ॥ ९९१ ॥

दोहा ।

वही भक्तरस जानिये, वही जगत कर्तार ।
वही शक्त चर अचरपै, वही शक्त आधार ९९२

(३१८)

रसमोदक ।

पुनर्यथा-सवैया ।

शत्रुनके मुख भंजिवेको, जन आपनेके दुख-
द्वंद्व दरैया । संतति संपति भूरि करै, गुणगान
करै भवसिंधु तरैया ॥ त्यों अस्कंद भनै प्रणपा-
लक, या कलिको मल पाप हरैया । या जगमें
हम जाँचलियो, रघुनंदन एक अनंद करैया ९९३

दोहा ।

एक नजरही के लखे, जो करिदेत निहाल ।
सो प्रभु मन तेरो अरे, शंकर दीनदयाल ॥ ९९४ ॥

पुनर्यथा-सवैया ।

चार पदारथके फलदायक, हैं सब लायक
दुःख दरैया । पातक छार अनेक करै, भ्रमजाल
होैं यमजाल टरैया ॥ आतुर शत्रुको अत्र हनै,
अस्कंद भनै भुवभार धरैया । या जगमें जन
आपनेको, रघुनंदन येक अनंद करैया ९९५ ॥

उल्लास ६.

(३१९)

दोहा ।

तनु पुलकित, हरषित सुमन, हिये प्रेम सरसाइ ।
धन्य धन्य नर धन्य वे, राम कहत सुख पाइ ॥

कवित्त ।

जो मैंने किये हैं छल पातक अनेक तो मैं,
तेरही भरोसे एक नाम अवगाहेके ।
ज्ञानहू न जानों कछू ध्यानहू न जानों नेक
कीन्ह्यों जौन काज तौन सुमति सराहेके ॥
भनत अस्कंद गुण गावत सुरेश तेरे,
सुनियो महेश हो दिवैया हित चाहेके ।
आपने करे जो कर्म आपहीं भुगतौं गा तौ,
हौं हूँ करतार करतार तुम काहेके ॥ ९९७॥

दोहा ।

याचेंते तुम देत हौ, बिनयाचें नहिं देत ।

(३२०) रसमोदक ।

हौ वरजोरी शंभु नित, नाम तुम्हारो लेत ९९८ ॥

पुनर्यथा-कवित्त ।

रंजन मुनिन्द्र और खंडन सुरारि वृंद,
भरै सुख भूरि दुख दारिद दरनहैं ।
तेजधर सूर अघ तिमिर सुनाश करै,
पूरण प्रकाश करै शोभाके धरनहैं ॥
भनत अस्कंद ध्यान धरत महेश शेष,
पावत न वेद भेद पंकज वरनहैं ।
छोड़ि छल छंद मोद मान कर वंद ऐसे,
आनंदके कंद नंदनंदन चरनहैं ॥ ९९९ ॥

दोहा ।

सुख संपतिको देतहैं, बड़े गरीबनिवाज ।
गोकुल चंद गुविंद मन, नंदलाल ब्रजराज १०००

पुनर्यथा-सवैया ।

मनोरथ प्रेमसे पूरो करै, अरुहेत करै करिदेत

उल्लास ६.

(३२१)

निहाल । हरै कलिकष्ट अरिष्ट सबै, औ बड़ावत
कीरति बुद्धि विशाल ॥ भनै अस्कंद अनंद करै
गुण औ गुण है जे करै नहिं ख्याल । सदा जनको
प्रतिप्राल करै सो कृपा करै दीनपै दीनदयाल ॥

दोहा ।

जासु तेज दिनकर लसत, विदित अवनि आकाश
प्रगट चराचरमें लख्यो, पानी पवन प्रकाश ॥

पुनर्यथा-कवित्त ।

निशिदिन आठो याम हरष हियेमें करि,
पागो रहै कुमति कुसंगत सुभावरे ।
मानत न नेक तेरी कौन यह टेक तू तो,
बूझत अबूझ नहीं तनक बचावरे ॥
कुटिल कुपाट कर्म कुटिल करेहैं जाँन,
भनत अस्कंद तिन्हें अबतौ भुलावरे ।
येरे मन जगत प्रभाकर कृपानिधान,
गौरीपति सुखद गुणानुवाद गावरे ॥ १००३ ॥

(३२२)

रसमोक्ष ।

दोहा ।

विधि साँचो राँचो वही, बाँचो वेद पुरान ।
तिह याँचौ अस्कंदगिरि, शंकर कृपानिधान ॥

पुनर्यथा-कवित्त ।

मंगल प्रदायिनी अमंगल नशायिनीहै,
शम्भु ठकुरायिनी हमेशहू सुरक्ष है ।
शेष गुणगावत सुरेश मुनि ध्यावत सु,
दास प्रणपाल करै कारज ततक्ष है ॥
भनत अस्कंद दुख द्वंद्व सबै दूर करै,
भरत अनंद सो अपक्षनकी पक्ष है ।
गच्छ करि आतुर सुभक्ष करि शत्रुनको,
जक्तमें शिवाकी शक्ति राजत प्रत्यक्षहै १००५

दोहा ।

ऋद्धि सिद्धि पावै घनी, होइ सुपूरण काम ।
सिंह वाहिनी दाहिनी, जोकोइ आठो याम १००६

पुनर्यथा-कवित्त ।

आश करि याचत सुराचत हमेश भक्त,
सकल सुपास कर अमित विलास कर ।
ऋद्धि सिद्धि सहित सुअष्ट नवनिद्धि और,
वचन प्रसिद्ध स्वच्छ बुद्धिको प्रकाश कर ॥
भनत अस्कंद जक्त अंब तू कृपा करकै,
अष्टभुज मूरति सु उरमें निवास कर ।
पातक निराश कर शत्रुनको नाशकर,
दुष्ट उपहास कर विघन विनाशकर ॥१००७॥

दोहा ।

जगदंबे अंबे सुनौ, विनै करै कर जोर ।
देहु सुख सुत संपदा, तेज ज्ञान गुण जोर १००८॥

पुनर्यथा-कवित्त ।

हरिजात शोक दुखदारिद बिदरिजात,
टरिजात गज व गुनाह डरि डरि जात ।

(३२४) रसमोदक ।

छरिजात कुमति कुसंगतिमि टरिजात,
संपदा करोरि सो कुबेर धरि धरि जात ॥
भनत अस्कंद प्रेम पूरण करै जो मन,
सृष्टिके अनेकन अरिष्ट दरि दरिजात ।
नामके लिये ते पाप जरि जरि जात जैसे,
लगत समीर वोस बुंद ढरि ढरि जात ॥ १००९ ॥

दोहा ।

उमा शम्भु उरमें बसैं, सुवश प्रेमके आन ।
महिमा अगम अपार है, को करिसकत बखान ॥

पुनर्यथा-कवित्त ।

याच्यों अस्कंद प्रेम पूरण हियेमें करि,
देहु सुत संपति कृपा करि कृपालु जस्तु ।
कीजिये मनोरथ दयानिधि दयानिधान,
जन प्रणपालक कहावत पढी न वस्तु ॥
विनय सुनेते मन अधिक प्रसन्न ह्वैकै,

उल्लास ६.

(३२५)

गौरी है गिरीशक है सेवक सुयेज मस्तु ।
तेजवान अमित सुरूप सुत बुद्धहोहि,
कुल बलवान धन धान्य समृद्धि रस्तु १०११

दोहा ।

जो याचै ताको मिलै, ऐसो यह उपदेश ।
भनत कुवैर अस्कंद गिरि, ऐसे उमा महेश १०१२॥

कवित्त ।

हिम्मतबहादुर अतिप्रबल प्रचंडकरे,
शिष्य सहजादगिरि सुयश अपारा है ।
कंचनगिरि कुँवर सुकामतागिरीश करै,
तेज बल बुद्धिवान धरम सुधाराहै ॥
तिनकेभयेहैं सुत शंकरकृपाते चारु,
गुणन गँभीर नाम देवी गिरिधाराहै ।
तासुत महेशकी कृपाते अस्कंदगिरि,
विरच्यो अनूप रसमोदक हजारहै॥१०१३॥

(३२६)

रसमोदक ।

दोहा ।

दशनौसै अरु पाँचको, संवत भादौमास ।
शुक्लपक्ष द्वादश रवौ, पूरण ग्रंथप्रकाश ॥ १०१४ ॥
राधा माधवको कियो, यामें रूप शृंगार ।
भूल चूक जो होइकछु, लीजौ सुजन सुधार १०१५

इति श्रीशिवसुत षोडश नाम प्रतापअनुभारतीक्षः

श्रीमन्महाराजकुमार श्रीमत्कुँवर स्कंदगिरि विरचिते

रसमोदकाभिधेकाव्ये श्रीमहाराजाधिराज राधाकृ-

ष्णविहारे कविजनरसिक हृदयप्रमोददायिने

नवरसभाव प्रकरणं नाम

षष्ठोल्लासः ॥ ६ ॥

इति रसमोदक हजारा सम्पूर्ण ।

पुस्तक मिलनेका ठिकाना-

खेमराज श्रीकृष्णदास,

“श्रीवेङ्कटेश्वर” छापाखाना, खेतवाड़ी-बंबई.

विक्रय्यपुस्तकें ।

नाम.

कि०रु०आ०

- रसिकप्रिया सटीक ... १-४
- काव्यनिर्णयभाषा छन्दबद्ध [भिखारीदासकृत]
- मनहरण छन्दोंमें कठिन (अलंकार) वर्णन १-४
- जगद्विनोद [पद्माकरकृत नायकाभेद] ... ०-८
- रसराज [मतिरामकृत नायकाभेद] ... ०-६
- दंपतिवाक्यविलास—जिसमें सब देशांतर की
- यात्रा और धंधेके सुखको पुरुषने मंडन
- और स्त्रीने खंडन कियाहै दोहा कवित्तोंमें
- (सुभाषित) ... ०-१२
- नैषधकाव्य मनहरण छन्दोंमें राजा नल दम-
- यन्तीका सम्पूर्ण उदाहरणों समेत चरित्र १-०
- सुन्दरीतिलक (शृंगाररसके चुहचुहाते हुए
- कवित्त भारतेंदु बाबूहरिश्चन्द्र संगृहीत) ०-६
- काव्यसंग्रह (प्राचीन रोचक कवित्त सवैया) ०-८

(३२८)

जाहिरात ।

काव्यरत्नाकार (एक २ समस्यामें रोचकता	
पर्वक अनेक कवियोंकी चातुरीके कवित्त)	०-८
भाषाभूषण (नायकाभेद मधुर छंदबद्ध)...	०-२
अनुरागरसभाषा नारायणस्वामीकृत पद्योंमें	०-३
गोपीवियोगकी बारहखडी [लालाशालि-	
ग्रामकृत इत्तलालकी बारहखडी सहित ...	०-२
नखशिख शिखनख—इसमें भगवान्का शृंगार	
नखसे ले शिख पर्यन्तका कवित्तों में	
वर्णितहै.....	०-१।
काव्यमंजरी	१-८

संपूर्ण पुस्तकोंका “बड़ासूचीपत्र” अलगहै देखना हो तो
आध आनेका टिकट भेजेके मँगालीजिये.

पुस्तकोंके मिलनेका ठिकाना—
खेमराज श्रीकृष्णदास,
“श्रीवेङ्कटेश्वर” छापाखाना, खेतवाड़ी—बंबई